

ବୀଳକଥା

এক

বেলা যায়-যায়। অন্ত্যমান সূর্যের শেষ রশ্মিধারা আকাশের বৃকে ক্ষণে ক্ষণে নবরূপ গ্রহণ করিতেছে। পৃথিবীর কোল হইতে অন্ধকার যেন ক্রমশ মাথা তুলিয়া উপরে উঠিতেছে। পল্লীপথ ধরিয়া একদল ছেলে কলরব করিতে করিতে বাড়ি ফিরিতেছিল। সকলেই সমান ভাবে চিৎকার করিয়া ব্যঙ্গ-তীক্ষ্ণ প্রশ্ন বর্ষণ করিতেছিল—একটি ছেলের উপর।

অভিমত্যাঁকে বেঠন করিয়াছিল সপ্তরথী—কিন্তু শ্রীমন্তের চতুর্দিক বহুরথীর সমবেত আক্রমণ। শ্রীমন্ত আর যাই হোক কাপুরুষ নয়—সে সকল প্রশ্নের যথাসাধ্য জবাব দিতেছিল। পেয়ারা চুরি করিতে গিয়া শ্রীমন্ত ধরা পড়িয়াছে; বাবুদের বাগান যে-খোঁট্টাটা এবার জমা করিয়া লইয়াছে তাহার হাতে বেশ ঘা-কতক থাইয়াছে।

শ্রীমন্তের একটিমাত্র জবাব সম্বল—ধ'রে ফেললে ত কি করব?

রামকেইট কহিল—তুই ত গাছে গাছে চলে গিয়ে সন্টারই আগে বাগান পার হয়ে গেলি। তবে তোকে ধরেফেললে কি ক'রে?

—কে যে পড়ে গিয়ে চিৎকার করে উঠল। আমি ভাবলাম নস্থ পড়ে গিয়েছে! তাই ফের পাঁচিল ভিড়িয়ে বাগানে গেলাম—তা দেখি কেউ কোথাও নাই! পিছু থেকে—

বাকিটা ধরা পড়ার লজ্জাকর ইতিহাস। সেটুকু বেচারার মুখে ফুটল না। কিন্তু ব্যঙ্গবিষে ঝাঁজালো করিয়া সেটুকু বলিয়া দিল ওই নস্থই।

—পিছু থেকে আগলদার এসে কাঁক ক'রে ধরে ফেললে। শেষালে যেমন ভেড়া ধরে—ঠিক তেমনি ক'রে নয় রে?

বিদ্রূপ-তীক্ষ্ণ হাস্য-রোল আরও উদ্বেল উচ্ছল হইয়া উঠিল।

শ্রীমন্ত ফ্যাল ফ্যাল করিয়া সকলের মুখপানে চাহিয়া থাকে। এতগুলো মুখ চাপা দিবার মত কিছুই খুঁজিয়া পায় না।

হাসির বেগ ক্ষীণ হইয়া আসিলে বিপিন কহিল—তুই একটা ভাবাকান্ত রে! সে ত মিথ্যে ক'রে চোঁচালাম আমি। নস্থ তখনও গাছ থেকে নামতে পারে নি—তাই বাগানের কোণে গাছ থেকে লাফ দিয়ে পড়ে মিথ্যে ক'রে চিৎকার ক'রে উঠলাম। বেটা খোঁট্টা যেমনি এদিকে ছুটে এসেছে, অমনি নস্থও গাছ থেকে নেমে পয়ষট্টি। আর মাঝখান থেকে ভাবা-গন্ধারাম এসে নাড়ুগোপালের মত ধরা পড়লেন। আহা-হা!

আবার হাসির রোল আবর্তের মত ফেনাইয়া উঠিল, পরম কৌতুকে সবাই উপভোগ করিয়া হাসিয়া এ উহার গায়ে ঢলিয়া পড়িল।

চণ্ডীচরণ কহিল—আচ্ছা তুই বলি না কেন যে, বাগানের পাশ দিয়ে যেতে যেতে গুনলাম কে চিৎকার ক'রে উঠল। কেউ পড়ে গিয়েছে মনে ক'রে আমি দেখতে এসেছি—আমার ধরবে কেন?

একটুখানি আমতা-আমতা করিয়া সে কৈফিয়ৎ দিল—বাঃ, দাঁতে যে পেয়ারার কুচি লেগেছিল—

—দস্ত-বিকাশ রে আমার! ধরা পড়বামাত্রই বুঝি দাঁত 'মেলে বসেছিলেন? ছিমস্ত কিনা?

—নামেও ছিমস্ত কাজেও ছিমস্ত রে তুই!

—ছিমস্ত নয় রে—শ্রীমস্ত—কানার নাম পদ্মলোচন!

শ্রীমস্ত এবার মরিয়ার মত একটা কৈফিয়ৎ দিল—ছিমস্ত হই আর যাই হই—তোদের নাম ত করি নি আমি।

—নিজে ত মার খেলি।

এবার শ্রীমস্ত যেন একটা মনের মত জবাব পাইল; খুব একটোট তাচ্ছিল্যের হাসি হাসিয়া সে কহিল—লাগেই নাই আমাকে। সেই বেটা ছাত্তুরই হাত ফুলে উঠবে দেখতে পাবি!—খাটি রক্ত জমে যাবে। বাবা, এ পিঠে যিনি চাপড় মারবেন তিনিই ঠালা বুঝবেন—হেঁ: হেঁ:—।

—না—মেলে আবার লাগে না!

মাইরী বলছি—লাগে না। দেখছিস ত, পণ্ডিত মেরে মেরে আর আমার পিঠে হাত ঠেকায় না। আর বিশ্বাস না হয় ত দেখে তোরা—

তাহার কথা শেষ হইতে না হইতে একজন সটান আসিয়া যা চার বসাইয়া দিল। সঙ্গে সঙ্গে আর একজন—আর একজন—আর একজন; মোট কথা বাকী কেহ রহিল না। যাহাকে বলে চাঁদা করিয়া মার, সেই মার শ্রীমস্তের পিঠে পড়িয়া গেল।

শ্রীমস্ত দাঁতে দাঁত টিপিয়া থাকে—কোনক্রমে বেদনা উপলব্ধির বিন্দুমাত্র আভাসও প্রকাশ হইতে দেয় না। সকলের পরীক্ষা শেষ হইলে গোটা দুই দম লইয়া সে হাসিতে চেষ্টা করিয়া কহিল—ওস্তাদের মস্তুর আছে রে। আর জানিস দম বন্ধ ক'রে থাকলে কিচ্ছু লাগে না।

পাথর কাঁদে না বলিয়া মাছুষ পাথরে চাপড় মারে না। চাপড় মারিয়া অভিজ্ঞ মাছুষ প্রবচন রচনা করিয়া গেছে—পাথরে তুল' না হাত—পরাজয় নির্ধাত।

শ্রীমস্ত নী কাদিয়া আজ জিতিয়া গেল; ছেলের দল এ উহার মুখের পানে চাহিয়া পরাজয় স্বীকার করিয়া লইল।

বেশ সদস্তে কয় পা অগ্রসর হইয়া শ্রীমস্ত বিজয়ের মত কহিল—বাবা—গুরুমশায়ের কব্বি, বাবার-পাঁচন, মায়ের হাতা, আর ওস্তাদের লাঠি প'ড়ে প'ড়ে পিঠ হয়েছে পাথর। ন'সে—দেখি তোর হাতটা। শুধুই কচলাচ্ছিস কেন, রক্ত জমেছে বুঝি? দেখি!

মার খাইয়া শ্রীমস্ত বিজয়ীর মত চলিল।

রামকেষ্টর তাহা বোধ করি সহ্য হইল না, সে কহিল—মার খেয়ে তোমার না লাগুক, তোমাকে কিন্তু এই ধরা পড়ার জন্তে জরিমানা দিতে হবে। চুরি করতে গিয়ে যে ধরা পড়বে তাকেই কিন্তু জরিমানা দিতে হবে; আমাদের দলে এই নিয়ম হ'ল আজ থেকে।

শ্রীমস্তের ইহাতে প্রবল আপত্তি, সে কহিল—বাঃ, মারও খাব আবার জরিমানাও দেব। বাঃ! না ভাই—

নৌকর্ক

রামকেষ্ট কহিল—বাঃ কি রকম—জেলের দেখনি ? মাছ চুরি ক'রে ধরা পড়লে সমাজে ওদের জরিমানা দিতে হয় ।

—আমরা ত জেলে নই ।

—জেলে না হই না কেন, আমাদের ওই নিয়ম হবে । আচ্ছা ভোট হোক । কে কে আমাদের দলে হাত তোল ।

উপস্থিত-প্রাপ্তির আশায় সবাই রামকেষ্টের দলে ঝুঁকিয়া পড়িল, সকলেই হাত তুলিয়া বসিল । ভোটযুদ্ধে পরাজিত শ্রীমন্তকে সমষ্টির রায় মানিয়া লইতে হইল ।

শ্রীমন্ত বিষন্নভাবে কহিল—আচ্ছা কি জরিমানা লাগবে বল ।

রামকেষ্ট দলের সদস্য গণনা শুরু করিয়া দিল । গণনা শেষ হইলে সে কহিল—চৌদ্দ জনের চৌদ্দ আনা ।

শ্রীমন্তের মুখ শুকাইয়া গেল, এই পয়সার জ্ঞাতাহার যত বিপদ । পাঠশালায় পণ্ডিত ঠাণ্ডান পয়সার জ্ঞাত—ছিদাম মূর্দার দোকানের সম্মুখ দিয়া হাঁটিবার যো নাই এই পয়সার জ্ঞাত, পয়সা চাহিলে বাপ পাঁচন তুলিয়া মারিতে আসে, মা হাতার আঘাত বসাইয়া দেয় । আবার সঙ্গীরা চাহে পয়সা ?

সে কহিল—না ভাই, পয়সা-টয়সা আমার নাই, আমি বরং দুটো হাঁস দেব তোমাদের ।

রামকেষ্ট হিসেবী ছেলে, সে কহিল—মশলার দাম কে দেবে শুনি ? তুমি ত মুখুজ্জদের হাঁস গেঁড়া মারবে ।

বিপিন অবস্থাপন্ন ঘরের ছেলে, তার উপর একটু লোভী, সে কহিল—আমি দেব—আমি দেব ; ছিমস্ত, আনিস তুই হাঁস ।

রামকেষ্ট কহিল—এই বিপনে চূপ ।

পল্লীর বসতির মধ্যে তখন তাহারা আশিয়া পরিয়াছে । সম্মুখেই হালদারের মজলিস । তিন বুড়া সেখানে চব্বিশ ঘণ্টা বসিয়া থাকে আর দাবা খেলে ।

ছেলেরা স্ট্রটসার্ট করিয়া এদিক ওদিক খসিয়া পড়ে, যে যাহার আপন আপন পথ ধরে শ্রীমন্ত আপন বাড়ির পথ ধরিল ।

মাঝার উপরে আকাশ এখনও স্বচ্ছ, পশ্চিম আকাশে শুধু একটি উজ্জ্বল তারা দেখা দিয়াছে । মাটির বৃকের উপর অন্ধকার গাঢ় হইয়া উঠিয়াছে । জনবিরল পল্লীপথে চলিতে চলিতে শ্রীমন্ত এতক্ষণে আপনার পিঠে ধীরে ধীরে হাত বুলাইল । হাতের লবণাক্ত স্পর্শে পিঠটা জ্বালা করিয়া উঠিল, বেদনাও বেশ হইয়াছে—খানিকটা তেল হইলে বেশ হইত ।

কিন্তু তেল পাইতে হইলে যে মাকে পিঠটা দেখাইতে হয়—সঙ্গে সঙ্গে মনে পড়িল মায়ের লোহার হাতাখানার কথা ।

অবশেষে কয়টা আগাছার ডাল ভাঙিয়া শ্রীমন্ত পিঠে বুলাইয়া লইল । এগুলি নাকি বিশলাকরণীর ডাল । লক্ষণের শক্তিশেলের আঘাত ইহাতে আরোগ্য হইয়াছিল—এ ত কয়টা চড়চাপড় ।

বাড়ির দুয়ার হঠাৎই সে শুনিল তাহার ভাগ্নী গৌরী সন্ধ্যাকাশে তারা গুনিতেছে—এক তারা নাড়াচাড়া, দুই তারা কাপাশের খাড়া—

শ্রীমন্ত বেদনার কথা কুণিয়া গেল—সেও বহির্দ্বার হইতে আরম্ভ করিল—তিন তারা পাটে বসি—চার তারা ঘোর মোর ।

দুই

নামের মধ্যে মানে খুঁজিলে শ্রীমন্তের কোন অর্থ-ই হয় না ;—দুনিয়ার অভিধান হইতে বাদ পড়িতে হয় । ঐ ছেলেটা বলিয়াছে ঠিক—শ্রীমন্তের নাম শ্রীমন্ত আর অঙ্কের নাম পদ্মলোচন প্রায় সমান শোভন । শ্রীমন্তের কোন শ্রীই ছিল না । দেহের শ্রী—রূপ, অন্তরের শ্রী—গুণ, ঘরের শ্রী—লক্ষ্মী, এ তিনের একটিও শ্রীমন্তের ভাগ্যালিপিতে বিধাতা বোধ হয় লেখেন নাই ।

কর্কশ পাক-দেওয়া কঠোর-গিঁঠ-গিঁঠ দেহ, দীপ্তিমান চোখ, তামাটে চুল, মুখে অজস্র তিল—সর্বোপরি কর্কশ তাম্রাভ দেহবর্ণ তাহাকে বেশী শ্রীহীন করিয়াছিল । সে যেন কালো হইলে এর চেয়ে অনেক শ্রীমন্ত হইত ।

সতাই হয়ত সে এর চেয়ে অনেকটা শ্রীমন্ত হইলেও হইতে পারিত । মাটির বৃকে শিশু প্রথম যখন আসে তখন সঙ্গে আনে সে আকার, লাভণ্য আনে না । সে দেহে লাভণ্য রূপ সঞ্চারিত করে ধরণীর প্রসাদ ।

শৈশবের শিশু শ্রীমন্তেরও আর পাঁচটা ছেলের মতই ফুলো ফুলো গাল, নরম নরম হাত-পা, মোট কথা—একটি মানবশিশুর যাহা যতটুকু প্রয়োজন সবই ছিল । ছিল না—দারিদ্র্যলীর্ণা জননীর বৃকে দুধ—ছিল না বাপের গোয়ালে গাই বা বাপের বাস্কে দুধ কিনিবার কড়ি ।

গুকাইয়া গুকাইয়া শৈশব কাটিল, আসিল কৈশোর । কিন্তু সে যেন এক অনাবৃষ্টির বর্ষা—দেহে পুষ্ট, অন্নবে লাভণ্য, ফসলের ফুলের মত অভাবের শোষণে কুঁড়িতে উঁকি মারিয়া গুকাইয়া গেল । ‘স্বথের ঘরে রূপের বাসা’ কথাটা সংসারে অতি সঙ্গত সত্য । তাই বাপ-মায়ের শ্রীমন্ত দুনিয়ার কাছে ছিমস্ত হইয়া গেল । পাড়া-প্রতিবেশীর দল অপরিমেয় সহানুভূতিতে শ্রীমন্তের বাপ-মায়ের চরম অববেচনার অপরাধ সংশোধন করিয়া লইল । আবার ছিমস্তের—ছি-তে একটা লম্বা টান মারিয়া স্বর দিয়া হৃৎসঙ্গত করিয়া তুলিল ।

শ্রীমন্তের তাহাতে রাগ রোষ নাই । সে বেশ হাসি মুখে এ-নামেই সাড়া দেয় । মা রাগ করে, বলে—খেতে পরতে দেয় কেউ ? আর নিজেরা ত সব মদনমোহন ।

শ্রীমন্ত আশ্চর্য হইয়া যায় ; মায়ের রোষের হেতু সে খুঁজিয়া পায় না । সে বলে—বললেই বা !

—বললেই বা ?—তোমার দেহে কি পিত্তি নাই রে ?

বাপ ঘরের ভিতর হইতে কহে—পিত্তি বেশ আছে, কাজের জন্তে দু’টো কড়া কথা বলে দেখ না, ছেলের লাল চোখ । মনে হয় দিলে বা খুন করে । আবার বেহারী বাঙ্গী ওস্তাদের

কাছে লাঠি খেলা শেখা হচ্ছে। ঘটে নাই বুদ্ধি—ছিমন্ত বললে কি বলা হয় তা কি মাথায় চোকে ?

শ্রীমন্ত আড়ালে গিয়া দেওয়ালকে দাঁত দেখাইয়া বাপকে ভেঙেচি কাটে, কহে,—নাঃ মাথায় চোকে না, ওর মত সবাই কিনা ? ছিমন্ত বললে আমার গায়ে ফোকা পড়ে না কি ?

যাক্ ওসব গত ইতিহাস।

শেয়ারা চুরির পরের দিনের কথা। সেদিন শ্রীমন্ত পাঠশালায় যায় নাই। বইদপ্তর বগলে মুখ্জেবাবড়ির খিড়কী পুকুরের চারিপাশে সে ঘুরিতেছিল। পুকুরের মধ্যস্থলে একপাল হাঁস কলরব করিয়া ফিরিতেছে।

মুখ্জেবাবড়ীর ঘটি মাজা শেষ হয় না ! শ্রীমন্ত বুড়ীকে মনে মনে অভিসম্পাত দিল।

একটা ঝোপের আড়ালে দাঁড়াইয়া সে আঁচল হইতে একমুঠা ধান জলের ধারে ধারে ছিটাইয়া দিতে শুরু করিল। তবু হাঁসগুলো এদিকে আসে না। শ্রীমন্ত একটা ঢেলা লইয়া হাঁস-গুলোকে লক্ষ্য করিয়া ছুঁড়িয়া মারিল। কোনটার গায়ে ঢেলা লাগিল না বটে কিন্তু হাঁসের দল কলরব করিয়া উঠিল। মুখ্জেবাবড়ীর নজর গিয়াছে কিন্তু কান বড় সজাগ। বুড়ী কাঁপাগলায় চিলের চিংকার করিয়া উঠিল—কে রে মুখপোড়া দস্তি, বলি কার পেটে আগুন লাগল ?—কে ঢেলা মারছিস ? এঁা—ওই যে, দাঁড়া দাঁড়া, চিনেছি আমি তোকে। যাই আমি পাঠশালায় পণ্ডিতের কাছে।

শ্রীমন্ত কিন্তু ভয় খাইল না। সে বুড়ীর এ পুরানো ধাক্কাবাজি বেশ জানিত ;—শ্রীমন্ত দাঁড়াইয়াছিল দক্ষিণ পাড়ে আর বুড়ী লোক চিনিতেছিল পূর্ব পাড়ের দিকে মুখ ফিরাইয়া। সে বুড়ীকে মুখ ভেঙাইয়া আপন মনেই হাসিতেছিল।

—কে-রে, কে-রে—

মুখের কথা মুখেই থাকিয়া গেল। শ্রীমন্ত ঘাড় ফিরাইয়া দেখিল খোট্টা ফলগুয়ালোটা তাহার ঘাড় চাপিয়া ধরিয়াছে !—খোট্টাটার পিছনে রামকেটে দাঁড়াইয়া হাসিতেছে।

রামকেটে কহিল—চল, পণ্ডিত তোকে ডাক্ছে !

জোয়াল ঘাড়ে নতুন গরুর মত ঘাড় বাঁকি দিয়া শ্রীমন্ত আপনাকে ছাড়াইয়া লইয়া কহিল—যা—ও, আমি যাব না। যা—ও।

খোট্টাটা এবার তাহাকে শিশুর মত কোলে তুলিয়া লইয়া পাঠশালামুখে চলিল। খোট্টাটার কোলে যাইতে যাইতে শ্রীমন্ত পণ্ডিতের কক্ষটার কথা ভাবিতেছিল। সরু লিকলিকে পাকা কাঁশের কক্ষ—যেখানে পড়িবে সেইখানেই কাটিয়া বসিবে। পাঠশালাও আসিয়া পড়িয়াছে।

গণেশ পালের দাওয়ার পর মথুর ঘোষের থামারবাড়ি, তারপর গড়াগ্রীদেব ঘানিঘর, তার পরই পাঠশালা।

গণেশ পালের দাওয়া পার হইল, মথুর ঘোষের থামারবাড়ির অর্ধেকটা চলিয়া গেল। শ্রীমন্ত আকাশ-পাতাল ভাবিতেছিল। কিন্তু এ বন্দী অবস্থায় কোন উপায়ই আর নাই।

গড়াগড়ীদের ঘানিঘরও পার হইল। পাঠশালার দরজার মুখে ছেলের দল ভিড় করিয়া দাঁড়াইয়া আছে।

মহা খোটাটা তীব্র বেদনায় আর্তনাদ করিয়া শ্রীমন্তকে ছাড়িয়া দিল ; শ্রীমন্ত মাটিতে পড়িয়া গেল না, সে খোটাটার বিপুল গোঁফ জোড়াটার একপ্রান্ত ধরিয়া ঝুলিতেছিল।

মাটিতে পদস্পর্শ হইবা মাত্র শ্রীমন্ত খাড়া হইয়া দাঁড়াইয়া লম্বা টানা এক দৌড় দিল। অনেকটা গিয়া সে ফিরিয়া দাঁড়াইয়া দেখিল—ছেলের দল কলরোল করিয়া হাসিতেছে ; খোটা গোঁফের গোড়ায় হাত বুলাইতে বুলাইতে করুণ বিলাপের স্বরে পণ্ডিতকে কি নিবেদন করিতেছে। আপনার হাতের দিকে তাকাইয়া শ্রীমন্ত দেখিল, এখনও কয় গাছা বড় বড় গৌক আঙ্গুলে তাহার জড়াইয়া আছে। সে নিজেও খুব খানিকটা হাসিল।

—আমার পাঠশালায় খবরদার আসবে না তুমি।

মুখ তুলিয়া শ্রীমন্ত দেখিল পণ্ডিত পাঠশালার দুয়ারে দাঁড়াইয়া তাহাকেই সম্বোধন করিতেছে—আজ থেকে তোমার নাম কেটে দিলাম আমি।

শ্রীমন্ত জিভ বাহির করিয়া পণ্ডিতকে দেখাইয়া দিল।

তারপর বগলের বই-প্লেট বেশ করিয়া গুছাইয়া লইয়া বেশ উঁচু মাথা করিয়া বাড়ি ফিরিল। বাহির দুয়ার হইতেই সে ইঁকিল—গোঁরী—এই নে।

এই মাতৃহীনা ক্ষয়া-ক্ষয়া ফুটফুটে মেয়েটি শ্রীমন্তের বড় প্রিয়। বছর চারেকের মেয়েটি অপটু পদে ছুটিয়া আসিয়া শ্রীমন্তকে জড়াইয়া ধরিয়া কহিল—কি মামা ?—পেয়ারা ? দা—ও।

প্লেট আর হেঁড়া বইখানি আগাইয়া দিয়া শ্রীমন্ত কহিল—না বইদপ্তর।

এই বস্ত্র কয়টির উপর গোঁরীর লোভের পরিসীমা ছিল না। নতুন বোধোদয়খানার মলাট গোঁরী প্রথম দিনই ছিঁড়িয়াছিল ; প্লেটখানায় পাথর দিয়া দাগ কাটিয়া স্থায়ী হিজিবিজি সে-ই রচনা করিয়া রাখিয়াছে।

পরম আগ্রহে হাত বাড়াইয়া গোঁরী কহিল—দাও মামা, দা—ও।

রান্নাঘরের দাওয়া হইতে শ্রীমন্তের মা ইঁ হাঁ করিয়া উঠিল—ছিঁড়ে দেবে, ছিঁড়ে দেবে।

পরম ঔদাসভরে শ্রীমন্ত কহিল—যা করবে করুক—আমার আর চাই না ওসব।

—কেন ?

—পণ্ডিত আজ তাড়িয়ে দিয়েছে, আর আমাকে নেবে না পাঠশালায়। খাতা থেকে নামও কেটে দিয়েছে।

—কেন ?

—মাইনে দেবে না—কিছু না। তাছাড়া কিহা হবে না আমার পণ্ডিত রোজ বলে—

কথাগুলির মধ্যে এতটুকু হৃৎখবোধের পরিচয় ছিল না। মা তাহার অবাক হইয়া গেল। কিন্তু বলিবারও কিছু নাই। বেতন না দিলে গুরুমশাই যদি বেত মারেন তবে শ্রীমন্তের অপরাধ কি ?

যাক, তবু অপচয় নারীর সহ হয় না, একটা দীর্ঘনিশ্বাস ফেলিয়া মা কহিল—তবু তুলে রেখে দে। মেয়েমানুষ বই নিয়ে কি করবে—যত্ন করে তুলে রেখে দে—তোমার ছেলে হয়ে পড়বে।

শ্রীমন্ত বেশ একটু সলজ্জ পুলক অনুভব করিল, কিন্তু প্রথানুযায়ী আপত্তি জানাইতেই হয়, সে ঘাড় নাড়িয়া কহিল—খ্যেৎ।

কার্ধাস্তরে যাইতে যাইতে মা বিরক্তিতে কহিল—তবে যা মন চায় তাই কর। ওই ত মেয়েকে মানুষ করছি, ঘরের দোরে বাপ থাকতে একটা খোজখবর নাই! তার ওপর দে, মেয়েকে আকাশের চাঁদ ধরে দে।

মা অন্তরালে যাইতেই কিন্তু শ্রীমন্ত গৌরীর হাত হইতে বই স্লেট লইয়া সমস্তে তুলিয়া রাখিল।

গৌরী কাদিতে আরম্ভ করিল—বই নেব—ছেলেট—

মা ঘরের ভিতর হইতে শ্রীমন্তকে তিরস্কার করিল—ওরে ও মুখপোড়া! আকাট মুখ্য, আবার ওকে কাদাতে শুরু করলি? দেখবি দেব গিয়ে হাতার বাড়ি!

শ্রীমন্ত তাড়াতাড়ি গৌরীকে কোলে তুলিয়া লইয়া চুপি চুপি কহিল—পেয়ারা খাবি গৌরী, পেয়ারা?—ইয়া বড় তুলতুলে পাকা!

গৌরীর সেই এক বায়না—বই—ছেলেট!

বাড়ির বাহিরে গিয়া শ্রীমন্ত চুমু খাইয়া কহিল—ছি মা, বই ছেলেট নিতে নাই; তোমার ভাইটি হয়ে পড়বে। তোমাকে দিদি বলবে।

ভাই-এর নামে গৌরী প্রবোধ মানিল, সে উৎফুল্ল হইয়া কহিল—ভাইটি মামা, আঙা টুকটুকে!

—চুপ—চুপ চোঁচায় না। ছি!

মামার কর্কশ তাম্রাভ মুখখানা ঈশৎ কোমল রক্তাভ হইয়া উঠিল।

তিন

পুত্রের এই মা-সরস্বতী বিসর্জনের সংবাদ শুনিয়া শ্রীমন্তের বাপ অকারণে অতিমাত্রায় উৎসাহ প্রকাশ করিয়া ফেলিল; কহিল—বেশ করেছিস, আচ্ছা করেছিস—ও বেটা জানে কি যে ওর কাছে শিখবি? আবার বেটার মাইনের তাগিদ কত!

শ্রীমন্তের মা কহিল—তা হলে না হয় আমোদপুরের মাইনের ইস্কুলে—

শ্রীমন্তের বাপ দাঁত খিঁচাইয়া কহিল—মাইনে দেবে কে শুনি—আমোদপুরের মাইনের ইস্কুলে—। ইদিকে লম্বাচওড়া বাত খুব আছে। হঁঃ!

শ্রীমন্তের মা আর কথা কহিল না। মনে মনে আপন অন্তায়টুকু সে স্বীকার করিয়া লইল। মাত্র ওই ক'টি কথা বলিয়া শ্রীমন্তের বাপের যেন তৃপ্তি হয় নাই, সে তামাক খাইতে খাইতে আপন মনেই কহিল—আর চাষার ছেলে লেখাপড়া শিখে হবেই বা কি শুনি? সেই ত বাবা শেষকালে হালগরু হোৎ—ত্যা—ত্যা।

শ্রীমন্তের মা তবু কোন উত্তর করিল না। বাপ পুত্রকে লক্ষ্য করিয়া কহিল—সেই ভাল, তুই কাল থেকে আপনার কুলকর্ম শেখ। কাগজের বৃকে কালির আঁচড়ে কি হয় শুনি? তার চেয়ে মাটির বৃকে ফালের আঁচড় দে—ফুল ফুটবে, ফসল হবে, মাফাৎ লক্ষ্মী ঘরে এসে ঢুকবে।

শ্রীমন্তের বাপ চলিয়া গেল।

শ্রীমন্ত কহিল—সেই ভাল মা, এবার বাপবেটাতে আলুর চাষ করব। দোগাছির সবজান শেখ আলুর চাষে এমন ফেঁপে উঠেছে মা—কি আর বলব তোমাকে। ওর নাতি ইঙ্কলে আসে মাটিনের জামা গায়ে দিয়ে, মাথায় জরির তাজ।

মা হাসিয়া কহিল—তাই কর।

শ্রীমন্ত রুক্ষভাবে কহিল—তোমার ত কিছুই মনে ধরে না দেখি। চাষার ছেলে লেখাপড়া শিখে কি হবে শুনি?

—কিছু হয় না শ্রীমন্ত। কিন্তু তোদের সংসারে আমার কি একদণ্ড দুঃখ করবারও অধিকার নেই রে? স্বখ দুঃখ নিয়েই ত মানুষের দেহ।

মায়ের উত্তর শ্রীমন্তের মনঃপূত হইল না; কিন্তু এ কথাই উত্তরে সে কিছু বলিতেও পারিল না। বাড়ি হইতে বাতির হইয়া হালের গর জোড়াটার পাশে দাঁড়াইয়া সে তাহাদের পিঠে হাত বুলাইতে লাগিল। গর দুইটার পায়ের কাছে গোবরে চোনায কাদা হইয়া উঠিয়াছে, ডাবায় এককুটি খড়ও নাই।

শ্রীমন্ত আপন মনেই কহিল—হুঁঃ। গর দুটো অনসেবায় হয়েছে দেখ দেখি? এই গরুর সেবায় অবহেলা ক'রে ক'রেই এই লক্ষ্মীছাড়ার দশ।

কোমরে কাপড় সাঁটিয়া সে গোবর সাফ করিতে লাগিয়া গেল।

—আরে বাপ রে বাপ, তিন দিনকা যোগী, ইসকে অন্দর পাঁও বরাবর জটা নিকাল গিয়া!

কণ্ঠস্বর শ্রীমন্তের ভগ্নীপতি হরিলাল—গোঁরীর বাপের।

হরিলালের কথাই এমনি। হিন্দী বাত বলিতে সে কেমন ভালবাসে। সে গেকয়া কাপড় পরে, গোঁকদাড়ি রাখে, তেল মাখে না। বাম বাহুতে একটা লোহার তাগা পরিধান করিয়া রাখে। গাঁজা খায়, তানপুরা লইয়া গলা সাধে।

শ্রীমন্ত হরিলালের কথাটা ঠিক বুঝিতে পারে নাই। সে তাহার মুখপানে চাহিয়া রহিল। হরিলাল হা হা করিয়া হাসিয়া শ্রীমন্তের পিঠে চাপড় দিয়া কহিল—কেয়া বাবুজী—সমঝা নেহি? বলি পাঠশালা ছাড়তে না ছাড়তেই ঘোর সংসারী? একদম গোবরে হাত? তিনদিনের যোগী হ'তে না হ'তেই পা পর্যন্ত জটা গজিয়ে গেল বন্ধু? বহুং আচ্ছা, জীতা রহো!

শ্রীমন্ত একটু অপ্রস্তুত হইয়া গেল; সে যত্নস্বরে কহিল—গর দুটোর চেহারা হয়েছে দেখ না? এতে কি চাষ চলে?

তাহার মাথায় এক টাট বসাইয়া দিয়া হরিলাল তাহার হাতখানা ধরিয়া টানিয়া কহিল—ভাগ্। আয়, আমার সঙ্গে আয়। চাষ ক'বে কে কবে বড়লোক হয়েছে? আমি তিনদিনে তোকে মানুষ ক'রে দোব।

শ্রীমন্ত চলিল ।

হরিলালের চেলা হইতে শ্রীমন্তের অনেক দিন হইতে সাধ । হরিলালের ভাড়া বাড়িতে হরিলালের আড্ডা । দক্ষিণদুয়ারী কোঠাঘরখানা ভাড়া পড়িয়াছে, পূর্বদুয়ারী গোয়ালঘরখানা কোনরূপে বজায় রাখিয়া হরিলাল সেইখানে বাস করে । চালে খড় নাই, বাহির দরজায় দুয়ার নাই, কিন্তু উঠান ভরা ফুলের বাগান । ঘরের মধ্যে একটা তানপুরা, একজোড়া বাঁয়া তবলা— একটা পাখোয়াজ, দেওয়ালের গায়ে একটা পেরেকে খুলানো একজোড়া মন্দিরা ।

শ্রীমন্তের সেই দিনই দীক্ষা হইয়া গেল । গাঁজা খাইয়া সে অল্পভব করিল সঙ্গীতশাস্ত্রে তাহার একটা বোধ জন্মাইয়া গেছে । হরিলালের আসোয়ারী আলাপটা তাহার বড়ই মধুর বোধ হইল । সে আপন মনেই স্বরটা ভাঁজিতে ভাঁজিতে বাড়ি ফিরিল—তানে নানে নানে নানা না—তানে নানে—নানে—

মা সেদিন তাহার আহারের পরিমাণ দেখিয়া অবাক হইয়া গেল । ইহার পর হইতে শ্রীমন্ত চাষও করে, হরিলালের হাতে মান্নসও হয়, আবার দেহারী ওস্তাদের আখড়ায় লাঠিও থেলে । লোকে দু'নোঁকা ধরে, শ্রীমন্ত তিন নোঁকা !

শ্রীমন্তের আহার অকস্মাৎ পরিমাণে বৃদ্ধি পাওয়ায় মা ভাবিল, চাষের পরিশ্রম আর ছেলের বাড়ার বয়স, তাই বোধ হয় আহার এমন বাড়িয়াছে । সময়ে অসময়ে চোখের লালিমা দেখিয়া ভাবিত রোদ্রে ঘোরাঘুরির জগ্ন এমন হইয়াছে । কিন্তু সন্দেহ জন্মাইয়া দিল শ্রীমন্তের ঐ আসোয়ারী আলাপ । সহসা ছেলের এরূপ সঙ্গীতানুরাগের কারণ অনুসন্ধান করিতে গিয়া সমস্তই মা জানিয়া ফেলিল । হরিলালের আড্ডা হইতে সেদিন বোধ হয় ভৈরবী সাধিতে সাধিতে শ্রীমন্ত বাড়ি ঢুকিয়া ডাকিল—মা !

পিছন হইতে মা বাড়ি ঢুকিয়া কহিল—আমার কপালে কি এমনি ক'রেই আগুন ধরিয়ে দেয় শ্রীমন্ত ?

প্রশ্নটার অর্থ শ্রীমন্ত একবিন্দু বুঝিল না, কিন্তু গুরুত্ব বেশ অনুভব করিল । ভৈরবীর আলাপ স্বগিত রাখিয়া মায়ের মুখপানে সে চাহিয়া রহিল ।

মা কহিল—শেষে তুই হরিলালের সঙ্গে—

শ্রীমন্ত বুঝিল সে ধরা পড়িয়া গেছে ; তাহার বোধ হইল তাহাকে কে যেন গলায় ধরিয়া জলের মধ্যে ডুবাইয়া ধরিতেছে ।

মা আমার কহিল—ছি—ছি—ছি রে আমার কপাল !

শ্রীমন্ত ধীরে ধীরে ঘরে গিয়া শুইয়া পড়িল । হরিলালের সহিত মেলা-মেশায় মা যে এমনভাবে উত্তেজিত হইয়া উঠিয়াছিল—তাহার মূলে একটা কারণ ছিল । জামাইটিকে শ্রীমন্তের মা বেশ স্ননজরে দেখিত না । তাহার ধারণা ছিল গৌরীর মায়ের যে হঠাৎ বাকরোধ হইয়া মৃত্যু হইয়াছিল তাহার হেতু কোন রোগ নয় ; তাহার হেতু ওই কাণ্ডজ্ঞানহীন নেশাখোর জামাতার অত্যাচার—সে লাথি হোক, কিল হোক, চড় হোক, বা যাই হোক । আপনার মেয়ের মেয়ে, তাই দায়ে পড়িয়া গৌরীকে বৃকে করিতে হইয়াছে নতুবা ও কণ্ঠের

ছায়াতেও তাহার বিষদৃষ্টি ছিল ! আরও, তাহাদের পর্যায়ের সাধারণের চেয়ে তাহার আশা-আকাঙ্ক্ষা যেন একটু উঁচু ছিল । মা সেদিন আর ছেলেকে খাইতে পর্বস্ত ডাকিল না ।

রাত্রে স্বামীকে সে কহিল—ছেলেকে হরিলালের সঙ্গে ছাড়াও । মাঠে কখন যায় কি করে জানি না কিন্তু ঘরবাস ত ছেড়েছে ।

বাপ একটু অধিক পরিমাণে বাস্তব-রাজ্যের লোক, সে কহিল—তা হরিলালের সঙ্গে মিশলে দোষ কি ? জান ওর অনেক কিছু মাথায় খেলে ? রোজগারে ওর মত মাথাই হয় না ! শিখতে পারলে আথেরে ভাল হবে ।

শ্রীমন্তের মা ভৎসনাপূর্ণ দৃষ্টিতে স্বামীর পানে ক্ষণেক চাহিয়া রহিল ; তারপর ধীরে ধীরে সে কহিল—তা হলে ত রাধারাণীর মরণে তোমার কোন কষ্ট হয় নি ?

স্বামী চমকিয়া উঠিল, কহিল—কেন ?

—নইলে তুমি ওই জামাই-এর প্রশংসায় পঞ্চমুখ হও, না ছেলেকে তারই কাছে তার আচার-ব্যবহার শিখতে মত দাও ।

শ্রীমন্তের বাপ এমন ভাবে নাই । এ কথাই মানে যে এমন হইতে পারে এ তাহার ধারণারও অতীত ছিল । কিন্তু মনে মনে সে ভাবিয়া দেখিল, শ্রীমন্তের মা ধরিয়াছে অনেকটা ঠিক । কতাহস্তা জামাতাকে সে মার্জনা করিয়াছে এটা সত্য । ফন্দিবাজ হরিলাল নানা ফন্দিতে উপায় করে—অভাবী সে, তাহার জ্ঞান তাহাকে প্রশংসা করে এও ঠিক । মাঝে মাঝে হাত পাতিলে সে কিছু কিছু পাইয়াও থাকে । নীরবে খতাইয়া দেখিল তাহার স্ত্রীর কথা সম্পূর্ণ সত্য । বৃকের ভিতরটা তাহার কেমন করিয়া উঠে । অভাবের নির্মম পেষণে তাহার অন্তরাঙ্গার বিকৃত স্বরূপ দেখিয়া সে আজ শিহরিয়া উঠিল ।

বহুক্ষণ নীরব থাকিয়া সে উঠিয়া যাইতে যাইতে কহিল—রাধুর মা ! তুমি কথাটা বলেছ ঠিক । কিন্তু কি করব বল, অ-ভর পেট সন্তান খেয়েও ভরে নি, তাই শিশুদের জালায় কার কাছে হাত পাকতে হয় না হয় তাও ভুলেছি—উপায় নাই ।

স্ত্রীও এমন উত্তর প্রত্যাশা করে নাই । সেও এই উত্তরে অভিভূতের মতই স্বামীর দিকে চাহিয়া রহিল, কোন সাহুনা-বাক্যও যোগাইল না ।

পরদিন দ্বিপ্রহরে স্বামী আহারে বসিলে শ্রীমন্তের মা কহিল—ছেলের বিয়ে দাও ।

স্বামী তাহার মুখপানে তাকাইয়া থাকিল ।

শ্রীমন্তের মা আবার কহিল—বিয়ে দিলে ছেলের ঘরে মন বসবে, তখন একটু বাগিয়ে ধরলেই ছেলে বশ মানবে ।

শ্রীমন্তের বাপের মন এই শোকস্মৃতিটা ভুলিবার জ্ঞান এমনি বিষয়ান্তর অগ্ৰসন্ধান করিতেছিল । সে সোৎসাহে কহিল—বেশ বলেছ তুমি ; হাতির গলায় ঘণ্টা না হলে হাতি ভাল চলে না ; তালে তালে পা ফেলতে তার মন ওঠে না ।

ঘরের মধ্যে লুকাইয়া চুল ঝাঁচড়াইতে ঝাঁচড়াইতে শ্রীমন্ত কথা কয়টা শুনিла । একটা অপূর্ব প্লকে তাহার চিত্ত কেমন সরস হইয়া উঠিল । উৎসাহে সেদিন সে গোটা মাথাটা

ব্যাপিয়াই সিঁথি চিরিয়া টেরি কাটিয়া ফেলিল। তারপর গাড়ি জুতিয়া ধান আনিতে চলিল। মনোরথ তাহার উড়িয়া চলিয়াছে। কিন্তু বুড়া বলদ দুইটার গতি বড় মশ্বর! সে তাহার সহ্য হয় না। বুড়ো বলদ দুইটার পিঠে আব্বল টিপিয়া, পেটে পায়ের গুঁতো দিয়া শেষ পর্যন্ত শ্রীমন্ত গরু দুইটাকে ছুটাইল। গাড়ি ছুটিয়া চলে, শ্রীমন্ত হাতের পাচনগাছটা উঁচু করিয়া তুলিয়া ধরিয়া ইঁাকে—হৈও চলে মটরগাড়ি ভরর ভরর ভেঁ ভেঁ।

চার

ঠিক ওই দিন হইতে শ্রীমন্ত যেন আর একটি মানুষ হইয়া উঠিল। ঘণ্টার নামেই হাতি তালে তালে পা ফেলিতে শুরু করিয়াছে। হরিলালের আড্ডায় যাওয়া-আসা যথাসম্ভর কম করিল। অতি সন্তর্পণে আঁকা-বাঁকা জনহীন পথ দিয়া মোতাতের সে সময় আড্ডায় গিয়া উঠে। রাগিনী আলাপ সে একরকম ছাড়িয়াই দিল। ঘর-দুয়ারের কাজকর্মে এখন সে অসম্ভব রকমের মনোযোগী হইয়া উঠিল। খামারখানি নিকাওয়া তক্তকে ঝকঝকে করিয়া তুলিয়াছে; ক্ষেতের মাটি কোদালের কোপে মাথনের মত নরম হইয়া উঠিল। কসলের পল্লবগুলি সতেজ শ্রামলতায় মনোহর শ্রী ধারণ করিয়াছে।

লোকে কহিল—এইবার বলাই পালের ঘরে লক্ষ্মী হবে। ছিমন্ত লক্ষ্মীমন্ত ছেলে।

শ্রীমন্ত মনে মনে হাসিয়া ভাবিত—তবু ত লক্ষ্মী এখনও ঘরে আসে নাই।

মা ইঙ্গিতে স্বামীকে কথাটা বুঝাইয়া মৃদু হাসি হাসিত। বলাই পালও ঘাড় নাড়িয়া সেটুকু উপভোগ করিত।

সেবার উত্তরায়ণ সংক্রান্তির মেলায় গিয়া শ্রীমন্ত খান-বয় পট কিনিয়া আপন ঘরটির চারিদিকের দেওয়ালে টাঙাইয়া দিল।

গৌরী পাশে দাঁড়াইয়া মামার এই রূপ-রচনা দেখিতেছিল। শ্রীমন্ত জিজ্ঞাসা করিল—কেমন হ'ল গৌরী?

গৌরী উচ্ছ্বসিত হইয়া কহিল—খু—ব ভাল, তা—রী সুন্দর।

শ্রীমন্ত চুমা খাইয়া সাদরে কহিল—ভারী লক্ষ্মী মেয়ে তুমি।

গৌরী চুপি চুপি কহিল—মামীমা আসবে, নয় মামা?

গৌরীর বুদ্ধিমত্তায় শ্রীমন্ত আশ্চর্য হইয়া গেল। গৌরী আবার কহিল—ভা—রী সুন্দর হয়েছে মামা! আমাকেও পট কিনে দিয়ো, আমারও বিয়ে হবে।

শ্রীমন্ত গৌরীর বিবাহের কথাটা আমলেই আনিব না, চিত্রশোভিত দেওয়ালের দিকে চাহিয়া থাকিতে থাকিতে সে কহিল—দেখবি, দোরের পাশে-পাশে কেমন পদ্ম আঁকব। মুখুজ্জদের রামের কাছে কম্পাস নিয়ে আসব।

মোট কথা, ভাবী গৃহলক্ষ্মীর আগমন-প্রত্যাশায় শ্রীমন্ত রক্ষ-দারিদ্র্যের মধ্যেও শ্রী-শতদল রচনা শুরু করিয়া দিল।

উত্তরাংশ সংক্রান্তির মেলা হইতেই সে চার পয়সার দু'খানা গোলাপী রঙের সাবান কিনিয়াছিল। মুখের দাগগুলো লুপ্ত করিতে গানের সময় প্রবল বেগে সে সাবান মাখা আরম্ভ করিল।

কয়েকদিন পর গৌরী কহিল—মামা কি সুন্দর হয়েছে দিদমা—দেখ—কেমন রাঙা টকটকে!

শ্রীমস্তের মা কহিল—তোর মুখখানা কি হয়েছে রে শ্রীমন্ত? বাঁদরের মুখের মত লাল। মুখে একটুখানি তেল বুলিয়ে নিস রাত্রে।

শ্রীমন্ত আরশি লইয়া দেখিল—সতাই ঝামা ইঁট দিয়া মুখখানা কে যেন ঘষিয়া দিয়াছে, তাহার উপর শীতের হাওয়ায় ফাট ধরিয়াছে।

যাই হোক, মুখের কাটে তাহার বিবাহ আটক রহিল না। ঐ রূপেই সে বর সাজিয়া বোঁ লইয়া হাসিমুখে ঘরে ফিরিল।

বোঁটি নেহাৎ ছোট নয়, বারো-তেরো বছরের মেয়ে;—নাম গিরিবালা।

দেখিতে শুনিতে নিতান্তই সাধারণ, কিন্তু কুৎসিত নয়। শ্রামলা রং, মাঝারি চোখ, নাকটি একটু চাপা কিন্তু তাহাতেই যেন মেয়েটির মুখখানি ভাল মানাইয়াছে। দেহের গঠন-ভঙ্গীটি কিন্তু অনবদ্য, দীঘল দেহখানি হৃস্মিবিষ্ট—দৃঢ়—স্পষ্ট। গরীবের মেয়ে আবালা পরিশ্রমে সর্বাঙ্গ সুগঠিত দৃঢ় করিয়া নিজেই গড়িয়া তুলিয়াছে। আরও—সে গঠন-ভঙ্গীর মধ্যে মধুর একটি লাবণ্যময় পারিপাট্য আছে।

ব্যবহারেও গিরি মেয়েটি বেশ সপ্রতিভ; কয়দিনের মধ্যেই নতুন সংসারে আপনাকে বেশ মিশাইয়া লইল। স্বচ্ছন্দ ভাবে ঘুরিয়া দিুরিয়া বেড়ায়, হাতের কাজ কাড়িয়া করে; গৌরীর মুখ মুছাইয়া দেয়; যেন কতদিনের পুরানো এই সংসারেরই একজন সে। শ্রীমস্তের মা বোঁটিকে বড় ভালবাসিয়া ফেলিল। সে ভালবাসা আরও বাড়িয়া গেল—সেদিন রাত্রে পুত্র-পুত্রবধূর গোপন আলাপ শুনিয়া।

সেদিন সন্ধ্যায় শ্রীমস্তের ফিরিতে একটু দেরি হইয়াছিল। গিরি বোধ করি তাই লইয়া অভিমান করিয়াছিল।

শ্রীমস্তের অনেক সাধ্য-সাধনার পর সে কহিল—যাও, তুমি আমার সঙ্গে কথা কয়ো না বলছি।

শ্রীমন্ত কহিল—আর দেরি হবে না গো!

—না, তুমি ওই ঠাকুর-জামায়ের সঙ্গে যদি না ছাড়—

—তার ওপর রাগ কেন? সে কি করলে?

—সে কি করলে? আমি কিছু জানি না বুঝি? ওই ত ঠাকুরঝিকে খুন ক'রে ফেলেছে।

লজ্জা করে না তোমার?

শ্রীমস্তের আর কথা যোগাইল না। গিরি আবার কহিল—ওই আজডায় যাও—গিয়ে পরিবার খুন করা শিখে এসে আমাকেও তুমি কোনদিন খুন ক'রে ফেলবে।

শ্রীমন্ত নীরব। গিরি আবার কহিল—বল আর ওখানে যাবে না ?

শ্রীমন্ত তবু নীরব। গিরি এবার কাঁদিয়া কহিল—আমার মা নাই, বাপ নাই, খুড়ো-খুড়ীর কাঁটা-লাথি খেয়ে এতকাল কাটল। তেবেছিলাম এইবার সুখের মুখ দেখব, তা—পোড়াকপালে হবে কেন ?

শ্রীমন্ত এবার একটা দীর্ঘনিশ্বাস ফেলিয়া কহিল—আচ্ছা আর যাব না।

গিরি বলিল—আমার গায়ে হাত দিয়ে সত্যি কর। কর—। চূপ ক'রে রইলে যে ? দেখ—তুমি গাঁজা খাও ত ? সে আমি জানি। আমি গাঁজার জন্তে রোজ একটা ক'রে পয়সা দেব। সত্যি ক'রে বল আর যাবে না তুমি ?

শ্রীমন্ত এবার উৎফুল্ল ভাবেই শপথ করিয়া ফেলিল।

শ্রীমন্তের মায়ের বধূপ্রীতি উচ্ছ্বসিত হইয়া উঠিল, মনে মনে বহু আশীর্বাদ তিনি বধুর শিরে বর্ষণ করিলেন।

শ্রীমন্ত ইহার পর হইতে আরও তালে তালে চলিতে আরম্ভ করিল। তবু মায়ের সম্পূর্ণ আক্ষেপ মিটিল না, বাপেরও না। মায়ের আক্ষেপ—শ্রীমন্ত হরিলালের সঙ্গ ছাড়িল কিন্তু গাঁজা ছাড়িল না। কিন্তু মা ভরসা এখনও একেবারে পরিত্যাগ করে নাই—কারণ সে বুঝিয়াছে যে দেহের ওজনে বধু মেয়েটি লঘুভার হইলে কি হয়—মনের ওজনে গিরি গিরির মতই গুরুভার, সে যখন ঘাড়ে চাপিয়াছে তখন শ্রীমন্ত কায়দায় আসিবে।

বাপের আক্ষেপ—ছেলেটা হরিলালের রোজগারী-ফন্দির ষোল আনার এক আনা দূরে থাক্, এক অণুও আয়ত্ত করিতে পারিল না।

এদিকে হরিলালের আড্ডায় শ্রীমন্তের এই নিয়মিত গরহাজিরায় একটু চাকল্যা উঠিল। এ দল ত ছাড়িয়া যাওয়া মোজা নয়, একটা কোকিল এই আড্ডায় পোষা হইয়াছিল, সেটাকে ছাড়িয়া দেওয়া হইয়াছে। কিন্তু মৃত্ত পাখিটাকে আজও দুধ আফিংএর টানে নিত্য বৈকালে হাজিরা দিতে হয়। আর একটা হোঁড়া কিনা শিকল কাটিল !

হরিলাল গাঁজা টিপিতে টিপিতে ঘাড় নাড়িয়া গান ধরিল—

রমণী-রতন মনের মতন, ও-হায় ভুলিয়াছে মন।

—শালাকো নয়! নিশা মিলা হায়, আচ্ছা রহে দেও, তিন খাল্লড়মে শালাকো নিশা টুটায়গা হাম।

শ্রীমন্তের সঙ্গী বিপিন, সেও এ পাঠশালায় নতুন পড়ুয়া ; সে কহিল—গাঁজা না খেয়ে বোয়ের সঙ্গে আলাপ জমায় কি ক'রে ?

হরিলাল ওধার দিয়া যায় না, সে কহিল—জমুক আর ফেসে যাক্, হাম লোককা কেয়া ? যিস্কা ফাটে, উস্কা ফাটে, ধোবিকা কেয়া ? অগরু হামলোককা একরোজ খিলানা চাহি।

হরিলাল সেদিন শ্রীমন্তকে ধরিল। শ্রীমন্ত মাঠ হইতে ফিরিতেছিল—পথে হরিলালের সহিত দেখা। হরিলাল কহিল—এ-ও, পাঠাশালমে কেঁও নেহি যাতা ?

শ্রীমন্ত চলিতে চলিতেই বেশ গম্ভীর ভাবে কহিল—আর যাবো না।

—কৈও ? হরিলালের চোখ দুইটা বিস্ফারিত হইয়া উঠিল ।

—কৈও আবার কি ? তোমার সঙ্গে মাহুঘ মেশে ? মিশে ত শেষে বউ খুন করিতে শিখব ।

আর যায় কোথা ! হরিলাল খড়ের আগুনের মত জলিয়া উঠে, সে থপ্ করিয়া শ্রীমন্তের চুলের মুঠা ধরিয়া টান মারিয়া কহে—কোন্ শালা এ কথা বোলতা হায়, কোন্ হারামজাদ—খুন করেছে, কাট ডালেঙ্গে—

হরিলালের ওই একটা বিশেষত্ব, রাগিলেই সে তলোয়ার ভাঁজিত, শত্রুর শির সে আর রাখিত না—অন্তত মুখে ।

লাঠি-খেলা-কঠোর কর্কশ-হাতে হরিলালের প্যাকাটির মত হাতখানা ম্চ্ড়াইয়া শ্রীমন্ত আপনাকে মুক্ত করিয়া লইয়া কহিল—এই দেখ, আমার সঙ্গে বেশি চালাকি করো না বলচি, তোমাকে দুমড়ে ভেঙে দেব ।

শ্রীমন্তের কথাটা বলা বাহুল্য হইল ; হরিলাল সেটা পূর্বেই বুঝিয়া সরিয়া দাঁড়াইয়াছিল । কিন্তু লক্ষ্যবস্তু ত্যাগ করে নাই ।

—দেখ্ লেঙ্গে—হাম দেখ্ লেঙ্গে, হামরা সাথমে রহেনেসে তেরা আখের মে ভাল হোতা, আচ্ছা যাও—যাও—তুমকো কুছ বোলা বুট, মাহুঘ হলে বুঝতিস্, বুঝলি—মাহুঘ হলে বোঝে কচু হলে সেজে—তোম দকর কচু হায়...দকর কচু !

হরিলাল তখন এই বলিয়া সরিয়া পড়িল বটে, কিন্তু একেবারে ব্যাপারটা ছাড়িল না । আবার গিয়া আসর পাতিল শ্রীমন্তের বাড়িতে ।—হাজার হোক শস্তুরবাড়ি, শাস্ত্রী সুনজরে দেখুক—না দেখুক—অন্তত খেদাইয়া দিতে পারিবে না । আরও ভরসা—শস্তুর অবাধ্য নয় । সে এবার এক ছুরি হাতে করিয়াই হাজির—মুখে একটু মদের গন্ধ !

—এ প্রাণ আর রাখবই না, ছিমস্তে আমার অপমান করে !

শাস্ত্রীর পায়ে হাত দিয়া প্রণাম করে—শস্তুর পায়ে প্রণাম করে—দাঁও পায়ের ধুলো দাঁও—এ প্রাণ আর রাখবই না । একটা ছোটলোকের মেয়ের পরামর্শে ছিমস্তে কিনা—নাঃ—এ প্রাণ আর রাখবই না ।

শাস্ত্রী বিরত হইয়া কহে—দোহাই, বাবা আমার, আন্থক শ্রীমন্তে—

—কভি নেহি—এ জ্ঞান নেহি রাখে গা । বলিয়া সে ছুরিটা উচু করিয়া তোলে ।

শস্তুর হাত চাপিয়া ধরে, শাস্ত্রী চোঁচাইয়া উঠে । গিরি পিছন হইতে শাস্ত্রীকে কহে—মা, শস্তরকে হাত ছেড়ে দিতে বল ।

—সে কি গো—খুন-খারাপী হবে !

বউ বলে—হ্যাঁ, খুন কতজনা হয়েছে, ও হবে ; বলে একটা কাঁটার ঘা মাহুঘের নয় না, নিজের বুকে ছুরি বসাবে নিজে ।

কথাটা শস্তরের কানেও গিয়াছিল, বাস্তব রাজ্যের লোক সে, কথাটা একদণ্ডেই কানের ভিতর দিয়া মরমেও গিয়া পশিল । সে সত্যই হরিলালের উদ্ধত হাতখানা ছাড়িয়া দিল ।

কেহ ধরে না দেখিয়া হরিলালকেও ছুরি নামাইতে হইল। শুধু ছুরি নামাইতে হইল না, ওই একরকমি মেয়েটার কুবুদ্ধির নিকট মাথা নামাইয়াও সরিয়া পড়িতে হইল। ওড়া পাখি আর ধরা পড়িল না!

পাঁচ

দিন দাড়াইয়া থাকে না, দিনের সঙ্গে সঙ্গে ছুনিয়ার বয়স বাড়ে। বয়সের সঙ্গে সঙ্গে শ্রীমন্ত পুরা জোয়ান হইয়া উঠিল, গিরিও ঘরপী হইয়া উঠিল, শ্রীমন্তের বাপ মা বৃদ্ধ হইয়া একে একে চলিয়া গেলেন।

শ্রীমন্তের তাহাতে বড় আক্ষেপ নাই, সময়ের সঙ্গে সঙ্গে সে মা বাপের শোক ভুলিয়াছে। কিন্তু গিরির আক্ষেপের সীমা নাই—সে শাশুড়ীর আক্ষেপ মিটাইতে পারে নাই—নারী হইয়া একটি পৌত্র শাশুড়ীর কোলে সে ভুলিয়া দিতে পারে নাই। শুধু ত আক্ষেপ নয়, এ নিষ্ফলতা তাহার নারীত্বের কলঙ্ক। শাশুড়ী রাজ্যের মাদুলী তাহার গলায় দিয়া তাহাকে কত বার ব্রত করাইয়াও যখন কিছুতে কিছু ফল পায় নাই—তখন সে কথা একদিন মুখ ফুটিয়া বলিয়াও ছিল, নাতির জন্তে পাতা কোল আমার খালিই রইল। আমার যেমন ভাগ্যি—নইলে এমন অফলা হতভাগা মেয়ে আমার ঘরে আসবে কেন?

বিপিনের মা ছিল কাছে বসিয়া, সে বলিয়াছিল—এক কাজ কর শ্রীমন্তের মা—কার্তিক পূজা কর।

শ্রীমন্তের মা অতি স্নান হাসি হাসিয়া উত্তর দিয়াছিল—কি যে বল বিপিনের মা? কথায় আছে জান—‘হবে না রে বাঁজার ছেলে কার্তিক রে তোঁর বাবা এলে!’ ও সব মিছে—ভাগ্যি, আমার ভাগ্যি!

ওই কথাগুলি গিরি আজও ভুলিতে পারে নাই! যখনই তাহার সন্তান-স্বধাতুর নারীমন আপন শূন্য কোলের পানে তাকাইয়া উদাস হইয়া উঠে, তখনই ওই কথাগুলি মনে জাগিয়া উঠে। এখনও শাশুড়ীর সে আক্ষেপ তীব্রকণ্ঠে তাহাকে ধিক্কার দেয়। নিরুপায়ে গৌরীকেই সে বৃকে জড়াইয়া ধরিল, সাঙ্ঘনাও পাইল। সংসারে পালনের মমতাটাই বোধ করি সব চেয়ে বড়। ভূমিষ্ঠ হইয়া যে সন্তানটি মরিয়া যায়—তাহার শোক মায়ের ভুলিতে বড় বেশি দিন লাগে না। কিন্তু লালনে-পালনে বর্ধিত বয়স্ক সন্তানে মায়ের বৃকে যে শক্তিশেল হানিয়া যায়—সে শক্তিশেলের বেদনা কোন বিশল্যকরণীতেই উপশম হয় না। যৌবনের পরিণতির সঙ্গে সঙ্গে নারীর জীবন-পাত্র যে স্নেহ-রসধারা উচ্ছল হইয়া উঠে, তাহাই মাতৃত্বের উপাদান। নারী সন্তান চায় শুধু ওই স্নেহরস-ধারায় তাকে শিক্ষিত করিতে। ভ্রূণ সৃষ্টি করে অদৃশ্য হস্ত, সে ভ্রূণকে আপন স্তনে স্নেহ-সুন্দর হস্তে, দিন দিন সুন্দরতর, পরিপুষ্ট করিয়া পূর্ণাঙ্গ সক্ষম মানবে সৃষ্টি করে—নারী। সেইখানেই তার প্রত্যক্ষ সৃষ্টির আনন্দ।

গৌরীকে পাইয়া সে আনন্দে গিরি আপন ব্যথতার বেদনা অনেকটা ভুলিয়াছিল। হয়ত
তা. র. ৩—২

সবটাই ভুলিতে পারিত—কিন্তু মাঝে মাঝে হরিলাল আসিয়া কন্ঠার উপর দাবী জানাইয়া যায়, তখন গৌরী যে আপনার নয়—এই বেদনায় আপনার ব্যথতার ব্যথা তাহার মনে পড়িয়া যায়।

ইদানীং হরিলালের সে দাবীটা কিছু প্রবল ও ঘন ঘন হইয়া উঠিয়াছিল। তাহার আর অনেক কমিয়া গিয়াছে, থাকতির বাজার, পেটের ভাত জোটে না—গাজা জোটে কেমন করিয়া? কাজেই সে মেয়ের দাবীতে শ্রীমস্তের ঘরে ভাতের ব্যবস্থাটা করিয়া লইতে চাহিল। এখানে ওখানে যায়, ভগবান যেখানে মাপেন সেইখানেই খায়, কিন্তু গ্রামে ফিরিলেই শ্রীমস্তের বাড়িতে ঢুকিয়াই হাঁকে—গৌরী, তোর মামীকে—না—মা বলিস্, তুই বল্ যে আমি খাব।

এক দিন, দুই দিন, চার দিন, শেষে পাঁচ দিনের দিন গিরির আর সহ হইল না; সেদিন সে ঘোমটার ভিতর হইতেই গর্জন করিয়া উঠিল। কিন্তু সে গর্জন হয়ত হরিলালের কানে গেল না, বা গেলেও সে তা আমলে আনিল না—দুর্লোকের কথা আবার ধরে!

গিরির আসল বিরক্তি কিন্তু ভাতের জন্ত নয়। হরিলাল যে আসিয়া গৌরীর উপর একটা ভাব-ভঙ্গীতে কথার সুরে পিতৃষের দাবী জানায় আপত্তি তাহার তাহাতেই। সেটা বোঝা গেল যখন গৌরী শ্রীমস্তের নিকট হইতে ভিতরে ছুটিয়া পলাইয়া আসিয়া কহিল—মাগো, সেই মাতাল জামাইটা এসেছে, বিদেয় কর, বিদেয় কর, ভাত দিয়ে বিদেয় কর মা, বিদেয় কর—ভাত নইলে ও যাবে না।

তখন গিরির অধরে হাসি দেখা দিল। সে গৌরীকে একটু পরখ করিয়া লইতে কহিল—সে কি লো—ওই কি বলে! ও যে তোর বাবা হয়।

গৌরী মুখ ঝাকাইয়া কহিল—হ্যাঁ হয়। ওকে কক্ষনো আমি বাবা বলবো না।

গিরির আর আক্ষেপ থাকে না, বরং করুণাই হয় একটু হরিলালের উপর। আহা, দুনিয়ায় আপনার বলিতে ত কেহ নাই ঐ লোকটির! সে দুই খালা ভাত বাড়িয়া শিকল বাজাইয়া শ্রীমস্তকে ইঙ্গিত করিল।

দু'খানি খালায় আহাৰ্শ সাজানো, কুটুম্বের খালাতেই পরিচর্যা বেশি।

রাত্রে ঘুমন্ত গৌরীর মাথায় হাত বুলাইতে বুলাইতে শ্রীমস্তকে গিরি কহিল—দেখ, আপন জন তোমার, তোমার একটু খোঁজখবর করা উচিত।

শ্রীমস্ত কথা না বুঝিয়া স্ত্রীর মুখপানে চাহিল।

গিরি কথাটা ভাঙিয়া কহিল—তোমার ভয়পোতের কথা বলছি—মাঝুঘটা কি হয়ে গেল, শুধু ষড়্ভাঙ্গির অভাবে। যদি ঠাকুরঝি বেঁচে থাকত তবে কি এমনি হ'ত?

শ্রীমস্ত এবারও স্ত্রীর মুখপানে চাহিয়া রহিল, গিরির সহসা এ পরিবর্তনের কারণ সে বুঝিয়া উঠিতে পারিল না।

স্বামীর নীরবতায় ঠিক ওই কথাটাই গিরিরও স্মরণ হইল, সে বুঝিল হরিলালের জন্ত এতটা ওকালতি তাহার পক্ষে নিতান্ত অশোভন হইয়াছে। তাই কথাটা সে ঘুরাইয়া কহিল—আপনার জন বলেই বলছি, হাজার হ'লেও গৌরীর বাপ, গৌরীই ত ধর আমাদের সব।

একটা দীর্ঘশ্বাস ফেলিয়া শ্রীমন্ত কহিল—কাজেই, যার নিজের নাই, তার—

কথাটা শেষ করিতে পারিল না, ক্ষীণ-রশ্মি প্রদীপটির স্নান আলোকেই গিরির মুখ দোঁখিয়া সে কথাটা শেষ করিতে পারিল না। কিন্তু যে কথাটা মনের মধ্যে ফেরে সেটা চাপিয়া রাখিতে পারে মানুষ কতক্ষণ? অল্প একটুকুণ উভয়েই নীরব, আবার শ্রীমন্ত কহিল—জান, একটা কথা আজও আমি ভুলতে পারি নি। যেদিন আমি পাঠশাল ছাড়ি, সেইদিন পাঠশাল থেকে এসে বই-দপ্তর দিয়েছিলাম গৌরীকে। গৌরীর লোভ ছিল বই শেলেটের উপর। তা মা বললে, ‘য়েথে দে, মেয়েতে বই-দপ্তর নিয়ে কি করবে, তোর ছেলে হয়ে পড়বে।’ সে বই শেলেট আজও তোলা আছে, ওই বেতের কাঁপিতে।

গিরি আর শুনিতে পারিল না। সে নিস্তব্ধ হইয়া রহিল, উদগত অশ্রু গোপন করিতে পাশ ফিরিয়া গুইল।

গিরির এ ব্যথার নীরবতায় শ্রীমন্ত মনে করে গিরি ঘুমাইল বুঝি, একটা দীর্ঘনিশ্বাস ফেলিয়া সেও পাশ ফিরিয়া শোয়। পরদিন শ্রীমন্ত মাঠ হইতে ফিরিয়া বাহির হইতেই শোনে গৌরীর উচ্চকণ্ঠে বাড়িখানা মুখর হইয়া উঠিয়াছে, অবোধ্য একঘেয়ে অবিশ্রান্ত ভাবে গৌরী কি বলিয়া চলিয়াছে। সে বাড়ি ঢুকিতে ঢুকিতেই কহিল—কি গো, গৌরী মা?

গৌরী ব্যতিব্যস্ত ভাবে বাধা দিয়া কহিল—চুপ কর, পড়ছি আমি, এই দেখ বই, এই দেখ শেলেট।

সেই বই, সেই শেলেট, ছেড়া মলাটে তাহারই বাঁকা হাতে নাম লেখা, সেই শেলেটের কোণ-গুলি সে-আমলের সেই বুড়াকামারের হাতের তার দিয়া বাঁধা। দুটি পয়সা সে লইয়াছিল।

শ্রীমন্ত নীরব হইয়া দাড়াইয়া ওই বই-শেলেটের পানে চাহিয়া থাকিল।

কাহার স্পর্শে ফিরিয়া দেখিল গিরি পিছনে দাড়াইয়া। কিন্তু এ গিরি ত সে গিরি নয়; এর দৃষ্টিতে ভিষ্কার ভাষা, ভঙ্গীতে ভিষ্কার ভাব। শ্রীমন্তও ব্যথা পাইল, রেহাস্পদের কাতরতা তাহার সহ্য হইল না। সে আদর করিয়া কহিল—কি?

গিরি কহিল—কিছু বলো না!

—বলবার মতো ত কিছু করনি তুমি গিরি।

—বই-শেলেট আমি দিয়েছি।

—বেশ করেছ, তাতে কি হয়েছে?

—দেখ ছেলেকে কিছুতে বঞ্চিত করতে নাই, তুমি দিয়ে কেড়ে নিয়েছিলে, তাতে ত ওর মনে দুঃখ হয়েছিল, দীর্ঘনিশ্বাস পড়েছিল, হয়ত তাতেই—

গিরির কণ্ঠস্বর ভাঙিয়া পড়ে, চোখ সজল হইয়া আসে। শ্রীমন্ত অতি আদরে তাহার হাত ধরিয়া কহিল—কেন্দ না, তোমার কোন্ কাজে আমি না করি বল?

গিরি একটু নীরব থাকিয়া নিজেকে সামলাইয়া লইয়া হাসিয়া কহিল—তুমি যা ক’রে চেয়ে দেখছিলে বই-শেলেটের পানে।

শ্রীমন্ত হা হা করিয়া হাসিয়া কহিল—দেখলাম কি জান, বইএর মলাটে নিজের হাতের লেখা,

সেই পাঠশাল মনে পড়ছিল—

এবার গিরি কোঁতুক করিয়া কছিল—আর গুরুমশায়ের মার—

শ্রীমন্ত আবার হাসিয়া উঠে ।

গৌরী ওদিকে নিবিষ্ট চিত্তে পড়িতেছিল ক, খ, ল, ঘ, মা—বা বা—গরু, গ, চ, ট, প

ছয়

ইহার পর কিছুদিন বেশ স্বখেই কাটিতেছিল । গৌরী বই-শেলেট লইয়া অনর্গল পড়ে, কোন দিন বা প্রতিবেশীদের ছেলেদের সঙ্গে পাঠশালে গিয়াই হাজির হয় ।

গিরি রাঁধিতে রাঁধিতে দশবার এদিক ওদিক তাহাকে খুঁজিয়া ফেরে ।

শ্রীমন্ত আসিতেই গিরি কহে—দেখ ত, গৌরী বোধ হয় পাঠশালা গিয়ে বঁসে আছে—কি বাই হ'ল মেয়ের মা, আমুক ত আজ, তার বই-শেলেট শেষ করব আমি ।

শ্রীমন্ত হাসিতে হাসিতে গিয়া তাহাকে লইয়া আসে । গৌরী আসে—একেবারে অভিধানের মত অনর্গল বানান আওড়াইতে আওড়াইতে—‘ব-এ আকার ল-এ আকার—বাবা, ম-এ আকার ল-এ আকার—মামা ।’ শ্রীমন্ত হাসে, গিরিও হাসে—সে স্পষ্ট না বুঝিলেও বোঝে যে গৌরী নব নব অভিধানের সৃষ্টি করিতেছে ।

মোট কথা ওই শিশুকে কেন্দ্র করিয়া এই দুইটি নরনারী জীবনে যে একটি মধুচক্র রচনা করিয়া তুলিয়াছিল সেটি দিনে দিনে বেশ রসঘন হইয়া উঠিল । কিন্তু দিন সমান যায় না, সেদিন মাস দেড়েক পরে সহসা ধুমকেতুর মত হরিলাল আসিয়া উপস্থিত হইল ।

পড়ন্ত বেলা, সন্ধ্যা হয়-হয়, গিরি রান্না চাপাইয়া গৌরীকে পড়াইতেছে, গৌরী পড়িতেছে । যেমন গুরু তেমনি শিষ্য, ভুলচূকের বালাই নাই, শাসন নাই, সংশোধন নাই, আছে শুধু শিষ্যের সপ্রতিভ উত্তর—আর গুরুর সপ্রশংস অজস্র উচ্ছ্বাস, শিষ্যের প্রতিভায় অগাধ বিশ্বাস ।

উনানে কাঠটা ঠেলিতে ঠেলিতে গিরি গুরুগিরি করিল, আচ্ছা বানান কর দেখি—‘কাঠ’ ।

সঙ্গে সঙ্গে গৌরীর উত্তর—ক-এ আকার ল-এ আকার ।

—বাঃ বাঃ—আচ্ছা বানান কর ত—‘রান্না’ ।

—র, ব-এ আকার ।

—বাঃ বাঃ—সোনামণি রে আমার ।

—এইবার কিন্তু দ্বিতীয় ভাগ কিনে দিতে হবে আমাকে—হঁ ।

—আচ্ছা এই বানান বলতে পারলেই দোব, বানান কর—‘ডিম’ ।

—বাঃ—রে, ও যে দ্বিতীয় ভাগের বানান, আমি বুঝি জানি ?

এমন সময় পায়ের আঙ্গুলের উপর ভর দিয়া শীর্ণ কুজ লোকটি বাড়ি ঢুকিয়া ডাকিল—গৌরী !

অতিরিক্ত গাঁজা খাইয়া হরিলালের পায়ের শিরায় টান ধরিয়াছিল—গোড়ালী আর পড়িত না ।

লোকটির আবির্ভাবে এমন অভিনব বিচার আদান-প্রদানটুকু বন্ধ হইয়া গেল।

হরিলাল বিনা ভূমিকায় কহিল—একবার বাইরে আয় দেখি।

গৌরীর মুখ শুকাইয়া গেল—সে গিরির কোল ঘেঁষিয়া তাহার আঁচল ধরিয়া দাঁড়াইয়া রহিল।

হরিলালের রুক্ষ মেজাজে এটা সহ্য হইল না, সে কটু কণ্ঠে কহিল—কানমে কেতনা ভরি সোনা উঠা হয় ?

গৌরী কঁাদ কঁাদ স্নরে কহিল—আমি পড়ছি যে।

হরিলালের চোখ দুইটা বিফারিত হইয়া উঠিল, সে অন্তরূপ বিকৃত কণ্ঠে কহিল—পড়ছি ? —পড়ছি কি ?

গৌরীর কথা আর ফুটিল না, গিরিও ঘোমটার অন্তরাল হইতে জবাব দিতে পারিল না। কিন্তু জবাব হরিলাল নিজেই খুঁজিয়া লইল, বই-শেলেটগুলা তাহার নজরে ঠেকিতেই ‘পড়া’র অর্থ করিয়া লইল—সে অতি কর্কশ কণ্ঠে ব্যঙ্গভরে কহিল—ও—লি-খা প-ঢ়ি। আরে বাপু রে বাপু। চাষার মেয়ে ধানভানা ছোড়কে—লি-খা প-ঢ়ি। তাজ্জব কি বাত্ ! নাঃ, এরাই দেখছি আমার মেয়ের মাথাটা খেলে। —নে—নে, এখন আয় দেখি এক ঘটি জল নিয়ে, বাইরে লোক এসেছে।

‘আমার মেয়ে !’ গিরির অন্তরটা টগবগ করিয়া উঠিল। সে চট করিয়া উঠিয়া একঘটি জল গৌরীর হাতে ধরাইয়া দিয়া তাহাকে ঠেলিয়া বাপের কাছে দাঁড় করাইয়া দিল।

সঙ্গে সঙ্গে হরিলাল মেয়ের হাত ধরিয়া টানিয়া লইয়া গেল। যাইবার সময় বলিয়া গেল—আমার সঙ্গে আর একজন ভদ্রলোক আছে, দুজন খাব—উমদা রান্না বানাও, মাছ-টাছ না থাকে—কেনো।

ধূমায়মানা গিরি জলিয়া আগ্নেয়গিরি হইয়া উঠে—সে হরিলালের পশ্চাতে বেশ উচ্চকণ্ঠেই কহে—বলে নিজের ঠাই হয়নাক শঙ্করাকে ডাকে, সেই বৃত্তান্ত। পারব না আমি—পারব না বলে দিচ্ছি, আপন ব্যবস্থা সময় থেকে করুক য়েয়ে ! এঃ—আবার মাছ চাই, ভাল রান্না চাই।

আপন মনেই গিরি গর্জন করিয়া চলে, কড়ার উপর হাতার শব্দটা সঙ্গে সঙ্গে সঘন এবং হুউচ্চ হইয়া উঠে।

এমন সময় গৌরী ফিরিয়া আসিল, গিয়াছিল সে কাদিতে কাদিতে কিন্তু আসিল বেশ হাসিমুখে। গিরি ভাবিল বাপের কবল হইতে নিস্তার পাইয়া গৌরীর হাসি ফুটিয়াছে। তাহার অন্তরটাও একটু প্রশস্ত হইয়া উঠিল। ঐ হাতে উনানের মুখের কাঠখানা ঠেলিয়া দিতে দিতে সে জিজ্ঞাসা করিল—কে লো—গৌরী ?

ঈশ্বর ঝঙ্কার হানিয়া গৌরী কহিল—জানি না।

কিন্তু ঐ ঝঙ্কারটুকুর মধ্যে লজ্জার বেশ একটু আভাস। গিরির হাতের হাতা স্থির হইয়া গেল, সে মুখ তুলিয়া গৌরীর মুখপানে তাকাইল।

গৌরী আপন ছোট হাতখানির ছোট মুঠাটি চট করিয়া খুলিয়া আবার সঙ্গে সঙ্গে বন্ধ

করিয়া ঘাড় নাড়িয়া ইঙ্গিতে ভঙ্গীতে কহিল—দেখেছ, পোব না তোমায় ।

চকিতের মত ঝণটুকু ক্ষণ হইলেও গৌরীর হাতের জিনিসটা কি তাহা বোঝা গেল—
টাকা !

বিশ্বয়ের উপর বিশ্বয় ! তারও উপর গিরির ঈর্ষা । হরিনাথ মেয়েকে আদর করিয়া
টাকা দিয়াছে, মুখের কথায় নয়, কাজকর্মে পিতৃত্বের অধিকার স্থাপন করিয়াছে ইহা গিরির মন
হইল না ; সে বেশ একটু প্লেষের সঙ্গে কহিল—

একশো বছর গিয়েছে চলে,

ভাগ্যি আমার, ভাগ্যি ভাল—

পড়ল মনে এতদিনে হুখিনী বলে ।

—ভাল—তাও ভাল । রেখে দে লো বাপের দেওয়া প্রথম টাকা ।

গৌরীর শিশুমন এই স্লেষ বুঝিল না, সে এতগুলি কথার মধ্যে বুঝিল শুধু ‘বাপের দেওয়া
টাকা’ । এ কথাটারই সঙ্গে সঙ্গে প্রতিবাদ করিয়া সে কহিল—মাঃ, জামাই দেবে কেন, ও
গাঁজাল টাকা দেবে ? আর পাবেই বা কোথা ? দিলে সেই লোকটা ।

—সে লোকটা ? কে সে ?

আবার সেই সলজ্জ বাস্তব দিয়া গৌরী কহিল—জানি না ।

হরিনাথ টাকা দেয় নাই শুনিয়া গিরি একটু লম্বুভার হইয়াছিল । সে এবার একটু হাসিয়া
কহিল—সে লোকটার নামে তোর লজ্জা কেন ? সে তোর শ্বশুর নাকি ? তোকে দেখতে
এসেছে ?

গৌরী এবার টুক করিয়া ঘাড় নাড়িয়া চট করিয়া কহিল—হঁ ।

—হঁ ! সে কি ?

গৌরী কহিল—বলছিল যে জামাই ।

গিরি আর শুনিল না—সে উঠিয়া গিয়া বাহিরের ঘরের পিছনে আড়ি পাতিয়া দাঁড়াইল ।
কিন্তু অতি অল্পক্ষণের মধ্যেই তাহার সর্ব অঙ্গ যেন হিম হইয়া গেল । অতি কষ্টে কিরিয়া আসিয়া
ঘরে গৌরীকে বুকে জড়াইয়া ধরিয়া বসিল । গৌরী অবাক হইয়া গিরির মুখপানে চাহিতেই দেখিল
গিরির চোখে জল ; সে ছোট হাতখানি দিয়া তাহার চোখ মুছাইয়া দিয়া কহিল—কাদছ মা !

‘গিরি কথা কহিল না, তাহার অশ্রুধারার বেগ বাড়িয়া গেল ।

গৌরী কহিল—মা, ওদের টাকা ফিরে দিয়ে আসব মা ?

গিরি তবুও নীরব, চিন্তাকুল স্তিমিত নেত্রে অন্তহীন ভাবনা সে ভাবিয়া যায় । কতবার
তাহার চিন্তা ধারণার সীমা পার হইয়া অর্থহীন হইয়া পড়ে, সচকিত হইয়া আবার সজাগ হইয়া
সে ভাবিতে বসে ।

গৌরী সেই মুখপানে চাহিয়া বসিয়া ছিল । তাহার পরনির্ভর শিশু-চিন্তাখানি সশব্দ আগ্রহে
ওই চিন্তাকুলার মুখপানে চাহিয়া থাকে, এটুকু বোঝে যে ভাবনার কেন্দ্র সে-ই, তাহাকে লইয়াই
একটা কিছু ঘটিতে বসিয়াছে ।

সহসা গিরি যেন সহজভাবে নড়িয়া চড়িয়া বসিল, বোধ হয় সে একটা কুল পাইয়াছে—
গৌরীর হাতটা ধরিয়া উজ্জল নেত্রে সে বলিল—খবরদার যাবি না তুই। ওই মাতাল, তোর
বাপ যদি নিয়ে যেতে চায় তোকে—খবরদার যাবি না তুই।

গৌরীর কেমন শব্দ হয়, ওই মাতুষটাকে দেখিলেই তাহার যে ভয় হয়! সে তাহার কথা
প্রতিবাদ করিবে কেমন করিয়া? সে শঙ্কিত কণ্ঠে কহিল—যদি ধ'রে নিয়ে যায় মা জোর
ক'রে।

—আমার জোর নাই? আমি যে তোকে এত বড় করলাম, আমার জোর নাই?

—মামা এলে ওকে ভাড়িয়ে দিতে ব'ল মা, দিক লাঠির বাড়ি।

সঙ্গে সঙ্গেই শ্রীমন্ত কোদাল হাতে আসিয়া খিড়কির দরজায় বাড়ি ঢুকিল। বাহির
হইতেই সে গৌরীর কথাটা শুনিয়াছিল, হাসিতে হাসিতে সে কহিল—কাকে মারতে হবে মা-
মনি?

শ্রীমন্তকে দেখিয়া গৌরীর বুকখানা সাহসে ফুলিয়া উঠিল। সে ঝঙ্কার দিয়া কহিল—ওই
মুখপোড়া মাতালকে, তোমাদেরই ওই লক্ষ্মীছাড়া জামাইকে গো।

মেয়ের পিছু-ভক্তির ঘটা দেখিয়া শ্রীমন্ত হা-হা করিয়া হাসিয়া উঠিল। গিরির কিন্তু তাহা
ভাল লাগিল না, তাহার চিন্তা-পীড়িত ক্ষুদ্র অন্তর অতিমাত্রায় অসহিষ্ণু হইয়া উঠিয়াছিল, সে
অস্থির কণ্ঠে আত্মহারার মত বলিয়া উঠিল—আমি মাথাগুড় খুঁড়ে মরব বলছি।

শ্রীমন্তের প্রাণখোলা হাসি অর্ধ পথেই থামিয়া গেল, সে হতভম্বের মত তাল হারাইয়া গিরির
মুখপানে চাহিয়া রহিল।

গিরি উঠিয়া শ্রীমন্তের পায়ে সতাই মাথা কুটিতে কুটিতে কহিল—বল, বল, তুমি এর বিহিত
করবে কিনা বল।

তাড়াতাড়ি শ্রীমন্ত তাহাকে ধরিয়া তুলিতে তুলিতেই শাস্তনা দিল—করবো, করবো, করবো,
তিন সত্য করছি, থাম গিরি-বো, থাম।

গিরি সজল নেত্রে তাহার মুখের দিকে তাকাইয়া কহিল—তা যদি হয় তা হ'লে মরে যাব
আমি।

অন্ধকারে দিশাহারার মতই ব্যাকুল ভাবে শ্রীমন্ত জিজ্ঞাসা করিল—কি, হ'ল কি?

গিরি কি যেন বলিতে গিয়া গৌরীর দিকে চাহিয়া থামিয়া গেল, কহিল—বলব এর পর।

তারপর গৌরীর হাত ধরিয়া টানিয়া রান্নাঘরে লইয়া যাইতে যাইতে কহিল—মেয়ের চোখে
ঘুম নাই মা, রাত দু'পহর পর্যন্ত চোখ চেয়ে বসে আছেন। আয়, খেয়ে ঘুমাবি আয়।

শ্রীমন্ত একটা উদ্বেগ লইয়াই তামাক সাজিতে বসিল। এমন সময় বাহির হইতে ডাক
আসিল—আরে ছিমন্ত নাকি? বহুৎ আচ্ছা রে ময়না, একদমুসে পিজরাকে ভিতর থাকে বৈঠা!
পড়ো আত্মারাম 'রাধাকিষণ লীলা রাম'! তারপর উচ্চ হাসি!

শ্রীমন্ত কলিকাটা হাতে করিয়া উঠিয়া আপন মনেই কহিল—হরিলাল নাকি? এলে
কখন?

গিরি ঘরের মধ্য হইতে আগ্নেয়গিরির মতই অগ্ন্যুৎসার করিল—দেখ আমি কিছু দানছদ্দে খুলি নাই।

শ্রীমন্ত আন্দাজেই তাল মারিল—নিশ্চয়ই।

—তাই বল তোমার ভগ্নিপোতকে, নিজে বোল আনা বাঁধবেন, আমার অল্পধ্বংস করবেন, আবার আমারই সর্বনাশের চেষ্টা—ব'লে দাও বলছি ভাত আমার নাই।

শ্রীমন্ত কিন্তু এটা পারিল না। যতই ঘৃণা সে হরিলালকে করুক কিন্তু একমুঠো ভাত—না—তাহা সে মুখ দিয়া বাহির করিবে কি করিয়া? সে যুদ্ধস্বরে স্তম্ভভাবে কহিল—তুমিই ব'লে দিয়ো।

—তোমার আঁকল ত খুব, আমি ওর সঙ্গে কথা কই যে কথা কইব।

শ্রীমন্ত বিব্রত হইয়া কিছুক্ষণ চূপ করিয়া থাকিয়া কহিল—সে শুনে পেয়েছে ঠিক, আর বলতে হবে না।

সঙ্গে সঙ্গে বাহির হইতে বেশ অধিকারভরা কণ্ঠে ডাকও আসিল, হরিলাল হাঁকিল—গৌরী, গৌরী, চলে আয় বলছি, চলে আয়।

গৌরী ভয়ে ফোঁপাইয়া কাঁদিয়া উঠিল, তাহার সেই নিজের কথাটাই বোধ করি মনে পড়িয়া গেল—যদি জোর করে ধরে নিয়ে যায় মা!

আগ্নেয়গিরির অগ্ন্যুৎসারী মুখও বন্ধ হইয়া গেল। চিরন্তন চলিত সমাজ-বিধান অনুসারে সন্তানের উপর পিতার অধিকার, তা সে পিতা যেমনই হউক না কেন, সে বিধান অমাত্য করিবার মত জোর কই তাহার নাই।

হরিলাল কিন্তু নিরস্ত হইল না, সে বাড়ির ভিতর পর্যন্ত আগাইয়া আসিয়া দাবীভরা কণ্ঠে ডাকিল—গৌরী!

শ্রীমন্ত ঘটনাটার মোড় ফিরাইয়া দিতে হাসিমুখে আপ্যায়ন করিল—আরে ওস্তাদ যে, এলে কখন? তোমার ডাক শুনে তামাক নিয়ে—

হরিলাল ও প্রচ্ছন্ন অঙ্গনয় গায়ে মাখিল না, সে বেশ গম্ভীর কণ্ঠেই কহিল—ছিমস্বে, গৌরীকে দে দেখি।

আজ হরিলালের সম্মুখেও গিরির চাপা গলা শোনা গেল—সে গৌরীর জন্ত দুখে ভাতে মাখিতে মাখিতে কহিল—বল না সে ঘুমিয়েছে।

শ্রীমন্তকে আর কথাটা হরিলালের কানে তুলিয়া দিতে হয় না, সে নিজেই শুনিতে পাইল, উদ্ভরে সে কহিল—যুমোক, আমার মেয়ে আমায় দাও, ঢের হয়েছে, ঢের ভাত দিয়েছ, আর না।

এমন গম্ভীর ভাবে কথা কওয়া হরিলালের পক্ষে অস্বাভাবিক। ইহাতেই গিরি বেশি দমিয়া গেল। হরিলাল বকিয়াই যান—ভাত, আরে ভাত দেখলাতা হামকো? ভাত? ভাত তো ঘাসকা বীচ, কেয়া দাম উলকো? আর দেখলাতা কিনা একঠো আওরং। আরে তুলসীদাস কেয়া বোলা জানতা—

শিরকা তাজ, মরদকা মান,
জুতি আও জরু হুঁহি সমান ।

পাওকা পরজার তুমি শিরমে উঠায়া ?

কথাটা শ্রীমন্তকে বড় লাগিল, তাহার জিহ্বাগ্রে একটা কটু উত্তর আসিয়া পড়িয়াছিল—হ্যাঁ, পরিবারকে যে খুন করতে পারে তার কাছে পরিবার ‘জুতি’ বই আর কি ?

কিন্তু সন্তানকাঙালী মানুষটিরও যে নারীর মতই দুর্বলতা আছে, কাজেই অন্তরের বিদ্রোহ অন্তরেই চাপিয়া তোষামোদ তাহাকে করিতে হয় । মহাজন আর খাতক—এদের মধ্যে খাতকের যে ওই ছাড়া উপায় নাই ।

শ্রীমন্ত কাষ্ঠহাসি হাসিয়া কহিল—আরে ভাই ওস্তাদ, আগরৎ কি বাত্ ধরতে আছে, এস, এস, তৈরি তামাক, তোমার সে বাত্‌টা কি হে—‘তৈয়ার তামকুল, বিছাওনা, খানা, মৎ ছোড়না’—না কি ?

হরিলাল কহিল—গৌরীকে এনে দাও ।

গিরি পুনরায় ঘর হইতে কহিল—বল না রাত্রে কাঁদবে ।

—কাঁদুক, কাঁদবে বলে ত হতচ্ছেদ্য মেয়েটাকে ফেলে রাখতে পারি না ।

হতচ্ছেদ্য ! অকৃত্রিম স্নেহের এত বড় অপমান গিরির সহ হয় না, সে লজ্জা শরম ভুলিয়া অতি তীব্র কণ্ঠে কহিল—এতকাল ত এই হতচ্ছেদ্য কাটল, আজ হঠাৎ বাপের স্নেহ উৎলে উঠল ।

বলিয়া মেয়েটার হাত ধরিয়া হিড় হিড় করিয়া টানিয়া হরিলালের সম্মুখে দাঁড় করাইয়া দিয়া কহিল—নাও, মেয়ে বিক্রি কর গে যাও । তোমার এ স্নেহ-রস কেন উৎলে উঠল, জানি না মনে করছ ? সব জানি ।

গিরির মাথায় ঘোমটা নাই, কণ্ঠস্থের লজ্জার মূহূতা নাই, সে বোধ করি তখন আত্মহারা ।

এবার হরিলাল চুপ হইয়া গেল । সংসারে অতি বড় পাষাণেরও বিবেক বোধ হয় নিঃশেষে মরিয়া যায় না । তাই সে যে-অন্ডায়, যে-পাপ পূর্বে করে নাই, সে-পাপ করিবার পূর্বে ধরা পরিলে লজ্জা তাহার হয়-ই হয় । ওই লজ্জাই ত সংসারে অন্ডায়-বোধ, সে লজ্জা অল্পভব করে মানুষের যে-সংস্কার তাহাই বিবেক ।

শ্রীমন্ত চকিত হইয়া গিরির দিকে চাহিল, সে কথাটা বেশ বুঝিতে পারিল না, গিরি কহিল—তখন গৌরী ছিল বলে বলতে পারি নাই আমি । যে কথা পর, হ্যাঁ পরই ত আমি, পর হয়েও আমি মেয়ের সামনে মুখে আনতে পারি নি সেই কাজ ও বাপ হয়ে করবে ঠিক করেছে, মেয়ে বিক্রি করবে, কোথায় কোন বুড়ো খোঁড়া বর ঠিক করেছে, আজ একজন দেখতেও এসেছে । এই দেখ, একটা টাকাও সে দিয়েছে গৌরীকে ।

সে গৌরীর হাত হইতে টাকাটা কাড়িয়া লইয়া হরিলালের দিকেই ছুঁড়িয়া ফেলিয়া দিল ।

শ্রীমন্তের ভাবে ভঙ্গীতে একটা পরিবর্তন খেলিয়া গেল, সে কণ্ঠের দৃষ্টিতে হরিলালের পানে চাহিতে চাহিতে দৃঢ় ভঙ্গীতে গৌরীকে আপনার কোলের কাছে টানিয়া লইল ।

সে দৃষ্টির ষিকারে এবং কঠোরতায় হরিলাল এতটুকু হইয়া গেল। সে তাড়াতাড়ি একটা কৈফিয়ৎ না দিয়া পারিল না, লজ্জাও হইতেছিল, আর আশঙ্কারও সীমা ছিল না। শ্রীমন্তের ঐ চিম্ড়ে দেহ বন্ধ-মাংসের মত নয়, পাথর-লোহার। সে কহিল—মেয়ের ত বিয়ে দিতে হবে, ভাল ঘর বর ত অমনি হয় না, টাকা চাই।

গিরি গর্জন করিয়া উঠিল—টাকার পুঁটলি বৃকে চাপিয়ে যাবেন, জমি রয়েছে—

হরিলাল ব্যঙ্গ করিয়া উত্তর দিল—জমিন্ কেন, জমিদারী হায়, ওহিঠো বেচেঙ্গে—

অপব্যয়ে, উচ্ছৃঙ্খলতায় সমস্ত খোয়াইয়া পথের ভিখারী হইয়াও যে মানুষ এমন নির্লজ্জ, সপ্রতিভ আশ্ফালন করিতে পারে এ ধারণা গিরির ছিল না, কিন্তু শ্রীমন্তের ছিল, সে হরিলালকে চিনিত।

বিশ্বয় তাহার হইল না, কিন্তু ঘৃণাতরেই সে কহিল—আচ্ছা, আচ্ছা, টাকা তোমার লাগবে না। যা খরচ হবে আমার—বিয়ে আমি দেখেত্তনে দেব।

তবু হরিলাল একটা ক্ষীণ প্রতিবাদ করিল—কুল-টুল দেখতে হবে, আমার কুল ভেঙে দেবে তোমরা।

গিরির অসহ্য হইয়া উঠিতেছিল, সে বোধ করি ওই লোকটির অন্তস্তল পর্যন্ত দেখিতে পাইতে-ছিল, সে কহিল—বৃথতে পারছ না ও চামারের চালাকি, ওই সব আবোল-তাবোল করে বিয়ে দেবার নাম করে মেয়ে বেচবে।

হরিলাল এবারে একটু সহজ ভাবেই প্রতিবাদ করিল, কিন্তু গিরির কথার উত্তরে সে কথাটা একান্ত অবাস্তব বোধ হয়। সে মনে মনে যুক্তি-সবল প্রতিবাদই খুঁজিতেছিল, কহিল—আরে, আমার মেয়ের বিয়ে তোমাদের টাকাতেই বা দিতে দেব কেন? আমার মান নাই?

গিরি ঝঙ্কার দিয়া উঠিল, অতি শ্লেষভাঙ্গ ব্যঙ্গের জালায় ভরা—ওরে আমার মানী লোক, বলে—

সেই মানভূমের মানকুণ্ডুর মানসিংহী মহারাজ,

মানের গোড়ায় চাইয়ের গাদায় বসে বসে সদাই লাজ।

সেই বিস্তাস্ত।

শ্রীমন্ত বেশ গম্ভীর ভাবেই কহিল—দেখ হরিলাল, ওসব মতলব ছাড়, গোঁরীকে জলে ফেলে দিতে আমি দেব না।

গাঙ্গীরের মধ্যে উত্তেজনা থাকে না। হরিলাল শ্রীমন্তের এই উত্তেজনাহীন গাঙ্গীরকে ভয় করিল যুদ্ধতা বলিয়া। সঙ্গে সঙ্গে তাহার রোষ হইয়া উঠিল প্রবল, সে বলিয়া উঠিল—আমার মেয়ে আমি যদি জলে ফেলেই দি—বলিয়া সে আগাইয়া আসিয়া গোঁরীর হাত ধরিয়া শ্রীমন্তের সন্নিকট হইতে টানিয়া লইবার চেষ্টা করিল।

গোঁরী শ্রীমন্তের মুখের পানে চাহিয়া কাঁদিয়া উঠিল। সঙ্গে সঙ্গে মূহুর্তে শ্রীমন্তের কঠোর দেহখানা হইয়া উঠিল স্নকঠোর, প্রত্যেকটি পেশী যেন দৃঢ়ভাবে নড়িয়া চড়িয়া বসিল, মুখ চোখ ঝুপায়, ক্রোধে হইয়া উঠিল বীভৎস—ভীষণ! সে একদৃষ্টে হরিলালের পানে চাহিয়া থাকিতে

থাকিতে অমুন্তেজিত অথচ দৃঢ়কণ্ঠে কহিল—খুন করে ফেলব।

সংসারে উজ্জ্বলিত ক্রোধকে মানুষ তত ভয় করে না ; কিন্তু এই শাস্ত ক্রোধ সত্যিই ভীতির বস্তু। উজ্জ্বলিত ক্রোধ অধিকাংশ ক্ষেত্রেই কঠোর প্রবল তিরস্কারেরই নামাস্তর, ইহার প্রকাশ প্রায়ই বাক্যে আবদ্ধ। কিন্তু এই শাস্ত ক্রোধ প্রতিহিংসারই রূপাস্তর, ইহার প্রকাশ প্রায়ই কর্মে। বাহ্যত নিরীহ বন্দুকের গুলির মত, যে কোন মুহূর্তে কাটিয়া জীবন সংশয় করিতে পারে। মানুষ ইহাকে ভয়ও করে বেশি, সব সময়ে এটা বিশ্লেষণ করিয়া না বুঝিলেও, মানুষের অন্তর এটা অমুভব করে। হরিলালও ভয় পাইল, সে গৌরীকে ছাড়িয়া দশ হাত পিছাইয়া গিয়া শ্রীমন্তের পানে চাহিয়া কহিল—আচ্ছা থাক, কাল—

সহসা তাহার নজরে গিরির ফেলিয়া-দেওয়া ঢাকাটা ঠেকিল, সে চট করিয়া ঢাকাটা কুড়াইয়া লইয়া কথাটা শেষ করিল—পুলিস এনে মেয়ে দখল করব।

বাক্য শেষের সঙ্গে সঙ্গেই তাহার পা দরজার ওপরে পড়িল এবং এক মুহূর্তে অদৃশ্য হইয়া গেল। বোধ হয় আড়ালে সে ছুটিতেই গুরু করিয়াছিল।

গৌরী বাপের এই পলায়ন-ভঙ্গীতে খিন-খিন করিয়া হাসিয়া উঠিল, গিরিও হাসিল। কিন্তু শ্রীমন্ত নীরব হইয়াই রহিল।

গিরি গৌরীকে টানিয়া লইয়া রান্নাঘরের নুখে পা বাড়াইয়া আবার ফিরিয়া কহিল—আমাদেরও আর দেরি করা নয়, শিগ্রি পাত্র দেখ !

শ্রীমন্ত ঘরের দাওয়ার উপরে বসিতে বসিতে শুধু কহিল—হঁ।

গিরি কহিল—কি ভাবছে বল দেখি ?

একটি গভীর দীর্ঘশ্বাস ফেলিয়া শ্রীমন্ত কহিল—ভাবছি সেই কথাটা, বলে যে সেই—

পরের সোনা প'রো না কানে

ছিড়ে দেবে হেঁচকা টানে।

নিজের একটা হ'ল না—

আর তাহার বলা হইল না, গিরি দ্রুত পদক্ষেপে রান্নাঘরের ভিতর চলিয়া যাওয়াতেই কথাটা অসমাপ্ত রহিয়া গেল। শ্রোতার অভাবে, না—এ নারীটির দ্রুত পদক্ষেপের ইঙ্গিতে তাহার মনের তুফানের পরিচয় পাইয়া, কে জানে !

সাত

রাত্রে গৌরীকে শোয়াইয়া দপ্ করিয়া আলোটা নিভাইয়া দিয়া গিরি শুইয়া পড়িল। গৌরী নিদ্রিতা। কিন্তু জাগ্রত দুটি প্রাণীও নীরব। অনেকক্ষণ পরে শ্রীমন্তই কথা কহিল—ঠিক বলেছ তুমি, আর দেরি করা নয়, যত শিগ্রি হয় বিয়ে দিতে হবে।

গিরি কোন উত্তর দিল না, শ্রীমন্ত পাশ ফিরিয়া গিরির পিঠের উপর হাত রাখিয়া কহিল—রাগ করেছ গিরি-বো ?

পিঠে হাত রাখিয়া শ্রীমন্ত অমুভব করিল গিরির দেহখানি ঘন ঘন কম্পিত হইয়া উঠিতেছে, সে কহিল—সত্যিই আমার দোষ হয়েছে, কেঁদো না গিরি ।

গিরি তবুও মুখ তুলিল না, শ্রীমন্ত এবার আরও একটু সরিয়া গিয়া গিরির মুখখানি তুলিয়া ধরিতে চেষ্টা করিল, কহিল—আমায় মাপ কর গিরি—করবে না ?

গিরি এবার আর থাকিতে পারিল না, সে উঠিয়া স্বামীর পা দুইটার উপর উপুড় হইয়া পড়িল, কহিল—ওগো, আর আমার লজ্জার বোঝা বাড়িয়ে না গো, আমি যে এতেই তোমায় মুখ দেখাতে পারছি নে ।

শ্রীমন্ত বুঝিল কিসের এ বেদনা । তাহারও বঞ্চনার বেদনা ছিল, কিন্তু এই নারীটি যে সে বঞ্চনার জন্ত নিজেকেই দায়ী করিয়া অহরহ বৃকের মধ্যে এত ক্ষোভ এত শোচনা পোষণ করে তাহা সে এতদিন বুঝিতে পারে নাই । আজ তাহার আভাস পাইয়া স্তম্ভিত হইয়া গেল । পরম দুঃখের মুহূর্তে আত্মহারা হইয়া যে আঘাত আজ সে আপন অজ্ঞাতে দিয়া ফেলিয়াছে, তাহার জন্ত গ্লানির আর পরিসীমা রহিল না । তাহার মুখে শাস্তনার কোন বাণী ফুটিতে পারিল না, বোধ করি মনেও যোগায় নাই । সে পরম স্নেহভরে প্রিয়তমার এলাইয়া-পড়া কেশের উপর হস্তের পরশ বুলাইয়া নীরবে শাস্তনা দিতে চাহিল ।

গিরি আবার কহিল—আমি ত জানি, এর জন্তে কত বড় দুঃখ তোমার মনে—সেই লজ্জাতেই যে আমি মরে যাই । আমার মনে হয় কি জান, মনে হয় ছুরি দিয়ে আমার এ দেহখানাকে ফেড়ে ফেড়ে দেখি ।

শ্রীমন্ত আর এ উচ্ছ্বলিত দুঃখের আঘাত সহ্য করিতে পারিতেছিল না । সে কৃত্রিম আনন্দের ভান করিয়া, লঘু হাস্যপরিহাসের বঞ্চনায় বেদনার সত্যকে তুচ্ছতাচ্ছল্য করিয়া গিরিকে ভুলাইতে গেল, সে কহিল—দর, দূর, মিছেমিছি মাথা খারাপ করা দেখ, যত সব বাজে ভাবনা ! হ্যাঃ, ছেলের স্নেহে ত দুঃখে মরে গেলাম ! ছেলে অভাবে ত রাজ্য-পাট ভেসে যাচ্ছে—তাই ছেলে ! ছেলে না ইয়েছে ভালই, হাঙ্গামা কত, থাকে কি ?

কিন্তু ফল হইল বিপরীত । গিরি স্বামীর পা ছাড়িয়া দিয়া অতি ক্ষীণ কণ্ঠে কহিল—সে কণ্ঠ-স্বর অতি দীনতায় ভরা, প্রচ্ছন্ন আক্ষেপের তাহাতে সীমা নাই, ভিক্ষুককে অপমান করিয়া ফিরাইয়া দিলে যে দীনতা, যে আত্মধিকারের স্বর তাহার পদক্ষেপে, চাহনিতে কোটে, গিরির কণ্ঠেও ঠিক সেই স্বর, সেই ধিকার ! সে কহিল—এত বড় কথাটা তুমি আমাকে বলে !

শ্রীমন্ত বুঝিল না এ কথায় গিরি বেদনা পাইল কেমন করিয়া ! কিন্তু গিরি বেদনা পাইয়াছিল, সে ত সন্তানের আশা আজও ছাড়িতে পারে নাই, তাহার মনোমন্দিরে তাহার অন্তরের নারীটি অহরহ যে কল্লিত একটি শিশু-দেবতার পরিচর্যায় বাস্তু ! সত্য সন্তানের মাতাকে যদি পরম অভাবেও স্বামী এমন কথা বলে, তাহাতে যে বেদনা সে পায়, সেই বেদনা সে পাইয়াছিল ।

তারপর সব নীরব । শ্রীমন্ত শুইয়া শুইয়া ভাবিতেছিল, এমন কথা সে কি বলিল যাহাতে গিরি বেদনা পাইল ।

আর ঐ নারীটি কি যে ভাবিতেছিল সেই জানে ।

বহুক্ষণ পরে গিরিই শ্রীমস্তের কাছে সরিয়া আসিয়া গায়ে হাত দিয়া কহিল—ঘুমোলে ?

শ্রীমন্ত বেশি কথা বলিতে সাহস করিল না, সে সংক্ষেপে সাড়া দিল—উ ।

গিরি বাহুপাশে স্বামীর কণ্ঠ বেষ্টন করিয়া কহিল—আমার একটি কথা রাখবে তুমি, বল ?

শ্রীমস্তর ভয় হইতেছিল, কি কথায় হয়ত কি হইয়া যাইবে, সে শঙ্কাভরেই কহিল—কি কথা বল ।

—আগে বল, রাখবে ?

এবার শ্রীমন্ত গিরির দেহ বেষ্টন করিয়া মাদরে কহিল—তোমার কোন্ কথা রাখি নে বল ?

—তা নয়, তিন সত্যি করতে হবে ।

শ্রীমস্তের মনে কি হইল কে জানে, সে কহিল—না, আগে বল কথাটা কি, শুনি, তারপর ।

—তুমি আবার বিয়ে কর ।

শ্রীমন্ত কথাটা শুনিল, কিন্তু কোন উত্তর দিল না, বহুক্ষণ পরে মাত্র একটা দীর্ঘশ্বাস ফেলিয়া সে পাশ ফিরিয়া গেল ।

স্বামীর এ নীরবতার অর্থ গিরি বুঝিয়াছিল, কিন্তু বিচিত্র নারীর মন, আর বিচিত্র সম্বন্ধ নর ও নারীর মধ্যে । এ অল্পরোধ হেলা করায়, বিশেষ, স্বামী এই প্রস্তাবে বেদনা পাওয়ায় গিরির একটু আনন্দই হইল । সে স্বামীকে আপনার দিকে ফিরাইতে চেষ্টা করিয়া কহিল—রাগ হ'ল বুঝি ? শোন শোন !

শ্রীমন্ত ফিরিয়া কহিল—এ সংসারে আজ ছ'শাত বছর একসঙ্গে ঘর করছি, তুমি আমার সব চেয়ে বড়, এ কি তুমি জান না ?

নারীটির অন্তর পুরুষের সোহাগে পুলকে ফুলিয়া ফুলিয়া উঠে, গিরি চটল ভাবে কণ্ঠে বিন্ময়ের স্বর টানিয়া কহিল—তাই নাকি ? কত বড় গো, তোমার ওই তেল-পাকা কালো হাঁকোটর চেয়েও বড় ?

শ্রীমন্ত এবার স্ত্রীর গালে সোহাগের চড় মারিয়া কহিল—ভাগ্ !

উত্তরে গিরি পরম সোহাগে স্বামীকে বক্ষে চাপিয়া ধরিয়া কহিল—তা জানি ব'লেই ত এত দুঃখ, এত লজ্জা আমার যে তোমার মনের খেদ মেটাতে পারলাম না !

শ্রীমন্ত তিরস্কার করিয়া কহিল—ফের ঐ কথা ? তা হলে কিন্তু আমি উঠে যাব ।

—আচ্ছা থাক্ থাক্, এই মুখ বন্ধ করছি । বলিয়া সে স্বামীর অধরে আপন অধর আবদ্ধ করিয়া দিল । অতি পুলকে গিরি স্বামীর নিকট হইতে আগে প্রেম নিবেদন পাইবার স্ত্রীর যে একটা মর্বাদা ও সলজ্জ রীতি আছে, তাহা আজ লঙ্ঘন করিয়া ফেলিল ।

সহসা গৌরী ঘুমের ঘোরে শব্দ করিয়া নড়িয়া-চড়িয়া ওঠায় গিরি গৌরীর দিকে ফিরিয়া তাহার পিঠে ঘুমপাড়ানি চাপড় মারিতে মারিতে কহিল—সত্যি আর দেবির ক'রো না, ওই ত বাপের ইচ্ছে, আর এদিকেও গৌরী যেটের কোলে ন' দশ বছরের হ'ল ।

শ্রীমন্ত কহিল—পাত্র যে মনরে মত মিলছে না, আমি কি বসে আছি ভাবছ ? দু-তিন জন

ঘটককে বলেছি, কত বন্ধুজনকে বলেছি। যার-তার হাতে ত গোঁরীকে দিতে পারব না।

—রাঙা টকটকে ছেলেটি চাই বাপু, হর-গোঁরীর মত মানান চাই।

—হুকলম লেখাপড়া জানা চাই, যে চাষাকে সেই চাষা—আমাদের মত হলে চলবে না, অন্তত ছান্দবিস্তি মাইনর।

—খুন্ডর-শান্তুড়ী ভাল চাই, সে যে কষ্ট দেবে তা হবে না। বরং খুন্ডর-শান্তুড়ী না থাকে সে ভাল। গোঁরীর ত ধর বাপের যা আছে তা পাবে।

—বাপে আছে ছাই, তবে হ্যাঁ, আমার ক্ষুদ্রকুঁড়ো যা আছে সেটুকু ত পাবেই।

গিরি একটা দীর্ঘনিঃশ্বাস ফেলিয়া চুপ করিয়া থাকে, ক্ষণ-পরে কহে—তার চেয়ে দেখেগুনে দেওয়াই ভাল, সম্পত্তি কিছু দিয়ে, সব দিয়ে না, সময় গিয়েও ত মানুষের ছেলেপিলে হয়।

শ্রীমন্ত কহিল—চল গিরি, এবার বস্তুনাথ যাই, ধন্য দিলে বাবার কি দয়া হবে না!

গিরি কহিল—তাই চল, গোঁরীর বিয়েটা হয়ে যাক।

আট

শ্রাবণের মাঝামাঝি, কয়দিন হইতে তাহার উপর বাদলা করিয়াছে। আকাশ ভরিয়া জলভরা মেঘের দাপাদাপি। দুরন্ত বর্ষণে মানুষ ঘরের বাহির হইতে পারে না।

শ্রীমন্ত সেই বর্ষা মাখায় করিয়া গিয়াছিল মহাজনের বাড়ি।

গোঁরীর পাত্র মিলিয়াছে, যেমন ঘর, তেমনি বর। যেমনটি শ্রীমন্ত ও গিরি চাহিয়াছিল তেমনটি। মেলে নাই শুধু খুন্ডর-শান্তুড়ীর কথাটা—হুইই মজুত, তবে তাহাতে কিছু আসে যায় না—তাহারা লোক খুব ভাল। এদিকে স্ত্রীবিধাও খুব, তাহারা চয় মাত্র দু'শো টাকা। তা এমন পাত্রের তুলনায় সে আর এমন বেশি কি!

কিন্তু পাত্রটির মূল্য হিসাবে দু'শো টাকা হয় ত কিছু নয়, কারণ সমাজের হাতে তাহার কদর আছে, চাহিদা আছে। কিন্তু ক্রেতার সংস্থানের ঘরটি যে শূন্য, তাহার কাছে দু'শো টাকা যে অনেক, নিঃশেষে রক্তহীন জনের কাছে দু'টি বিন্দু রক্ত!

কিন্তু কান্ডালের কি সাধ হয় না! আর সে সাধের জন্ত যদি সে জীবন পণ করিয়া বসে!

শ্রীমন্ত গিরিকে কহিল—দেখ এক কাজ করা যাক, গোঁরীকে ত কিছু জমি দোবই ঠিক করছি, তা ওই জমিটুকু বেচে-কিনে গোঁরীর বিয়েটা দিয়ে দি—কি বল?

গিরিও ভাবিয়া চিন্তিয়া কহিল—সে ভাল, তবে জমিটা যদি ওরাই নিয়ে মেয়েটি নিত তবে ভাল হ'ত। গোঁরীর ছেলে-মেয়েরা নাম করত, মায়ের মামা-মামীর দেওয়া আমাদের। নইলে যতই কর ততই কর—গোঁরীর ছেলেরা আমাদের চিনবে না, শুভকর্ম হবে—আত্ম্যতি দেবে সেই মাতামহ পাবে।

শ্রীমন্ত উৎসাহভরে কহে—তা না হয় 'দো'য়ের যে ছোট চারটুকুরো কেটে একবিঘে বাকুড়ি করেছি, সে বিঘে খানেক গোঁরীকে দান করব। লিখে দোব 'কেনারামের জমির পশ্চিম,

পুস্তকের দো'এর উত্তর ও পূর্ব, কালিকেষ্টর বাকুড়ির দক্ষিণ ইতিমধ্যে দোয়েম জমি—নাম গিরি বাকুড়ি, বুঝলে, নাম দোব.গিরি বাকুড়ি। ব্যাশ—আখ হবে, কলাই হবে, গম হবে, গৌরী র ছেলেমেয়েরা থাকবে আর বলবে 'গিরি বাকুড়ির ফসল। গিরি কে—না মায়ের মামী।'।

গিরি ঈষৎ লজ্জাভরে কহে—তোমার নামটাও জুড়ে দাও আগে, দুজনেরই নাম থাকবে।

একটু চিন্তা করিয়া শ্রীমন্ত প্রবল উঃসাহে ঘাড় নোলাইয়া কহিল—তাই হবে, নাম দিয়ে দেব, 'শ্রীগিরি বাকুড়ি', কেমন ?

সমস্তটাই গিরির মনে ধরিল।

শ্রীমন্ত উঠিয়া পড়িয়া লাগিল।

সেদিন শ্রীমন্ত গিয়াছিল সেই দু'শো টাকার যোগাড়ে। মহাজন জমি কিনিল না, শ্রীমন্তের সমস্ত ভূ-লক্ষীটুকু বাধা লইয়া আড়াই শত টাকা শ্রীমন্তকে দিল। গৌরীকে দিবার জন্ত হাতে পায়ে ধরিয়া ওই 'শ্রীগিরি বাকুড়ি'টুকু শ্রীমন্ত দলিলের বাহিরে রাখিল।

শ্রীমন্ত খুশি হইল; তাহার ভরসা হইল তাহার সমর্থ দেহে খাটিয়া সে একদিন ঋণ শোধ করিয়া তাহার ভূমি-লক্ষী মাকে পূর্ণাঙ্গ রাখিয়াই পূজা করিতে পাইবে।

মহাজনের আশা—হুদের তন্ত বয়ন করিয়া একদিন সে শ্রীমন্তের সমগ্র জমিটুকু টানিয়া লইতে পারিবে।

যাক, শ্রীমন্ত যখন টাকা লইয়া বাড়ি ফিরিল তখন সন্ধ্যা হয়-হয়। মেঘাচ্ছন্ন আকাশের ছায়ায় গাঢ় অন্ধকার চারিদিকে ছাইয়া ফেলিয়াছে, যেন কোন বিরাটপক্ষ নিকষ-কালো পাখি ধরণীর কেন্দ্রদণ্ডের শীর্ষে বসিয়া অণ্ডের মত ধরণীকে বৃকে ধরিয়া আছে। তাহার পক্ষতলে উদ্ভাপ নাই—আছে শুধু হিমালী স্পর্শ। তাহার সে পক্ষ বরে জল, আর সে পক্ষের আন্দোলনে জাগিয়া উঠে হিমতীক্ক বায়ুপ্রবাহন সে বর্ণে আর বায়ু-প্রবাহে ধরণী শীতল। সিক্ত দেহে কাপিতে কাপিতে শ্রীমন্ত বাড়ি আসিয়া পৌঁছিল। ঘরে আলো নাই, বাড়িতে মানুষের সাড়া নাই, শ্রীমন্ত পরম বিরক্তিভরে কহিল—বলি সব মরেছে, না কি ?

অন্ধকারের মাঝে খেতবজ্রাবৃত একটি মূর্তি বাহিরে আসিয়া দাঁড়াইল। শ্রীমন্ত বুঝিল গিরি।

শ্রীমন্ত কহিল—দিন ঠিক করে ফেল, কালই খোলায় খই দাও। খুব ভাল ব্যবস্থা হয়ে গেল—বুঝলে !

গিরি তবু কোন কথা কয় না।

গিরি কথা কহিল আর না কহিল তাহাতে শ্রীমন্তের কিছু আসে যায় না। সে দাওয়ার উপর বসিয়া কলিকা খুঁজিতে খুঁজিতে গোটা বিবাহের ফর্দটা মুখে মুখে বলিয়া গেল।

—তদ্বরলোকের সঙ্গে করণকর্ম, তদ্বরলোকই আসবে সব, রাস্তিরে লুচি করতাই হবে। তা ঘরের গম-ময়দা পিষে নাও, আর ছোঁলার ভাল তাও ঘরে আছে। আর গুড়—তা হোক, এবার আমার যা গুড় হয়েছে চিনি ফেলে তা খেতে হবে। না হয় চিনি কিছু আনা যাবে। কথা বিশ্বাস না হয় বিশ্বাসের রাস্তিরেই পরখ করিয়ে দেব তোমাকে, তারা গুড়ই যদি না চায়—

এতক্ষণে গিরি অতি মৃদুভাবে দুটি কথা কয়—কার বিয়ে ?

—কার বিয়ে ? বলে যে সেই সাতকাণ্ড রামায়ণ পড়ে নীতা রামের কে ? যাঃ গেল, ঘরে আলো কি হ'ল, কয়লা ধরাব যে, দেশলাইটা দাও ত । বলে কার বিয়ে ? আমার নানার বিয়ে —কেন গৌরীর বিয়ে !

গিরি কাদিয়া উঠে, কহে—তাই ত বলছি গো, কার বিয়ে দেবে ? গৌরীকে কেড়ে নিয়ে গিয়েছে ।

—কেড়ে নিয়ে গিয়েছে ? কে ? কেন ?

—যার মেয়ে, সেই মাতাল বদমাস ; আজ তার বিয়ে দেবে । পাত্রটির দু চোখ কান, বিয়ে দিয়ে টাকা পাবে । তাছাড়া তিনকুলে সে পাত্রের এক বোন আর বোনাই ছাড়া কেউ নাই, বিশ্বসম্পত্তি আছে ভাল ।

শ্রীমন্ত মাথায় হাত দিয়া বসিয়া পড়িল ।

গিরি কাদিতেছিল, রোদন-স্বর কণ্ঠেই সে কহিল—তুমি গেলে, তার দণ্ড-দুই পরেই সে এসে হাজির, সঙ্গে পাঁচজন লোক । বললে, 'ভালোয় ভালোয় মেয়ে দেবে ত দাঁও, নইলে খুঁটিতে তোমাকে বেঁধে জুতো মেয়ে মেয়ে নিয়ে যাব । গাঁয়ের দু-চারজন এল, তাদের কি সব বললে, তারা বললে, তা ওর নিজের মেয়ে ও নিয়ে যাবে তাতে কে কি বলবে বাপু, এতদিন তোমাদের কাছে রেখেছে এই—

সহসা শ্রীমন্ত উঠিয়া গা-ঝাড়া দিয়া দাঁড়াইয়া কহিল—কোথায় বিয়ে ?

—মহাদেবপুর ।

মহাদেবপুর এখান হইতে ক্রোশ-তিনেক পথ ।

শ্রীমন্ত রান্নাঘরের মাচায় তোলা একগাছা লাঠি টানিয়া লইয়া কহিল—চল্লাম ।

গিরি চমকিয়া উঠিয়া তাহার হাত ধরিয়া কহে—সে কি, কোথা যাবে ?

—দিয়ে আসি সেই শালা হ'রের মাথাটা চলিয়ে ।

—সে কি, তার মেয়ে !

—তার বাবার মেয়ে,—বলিয়া গিরির হাত সজোরে ছাড়াইয়া সেই মেঘাচ্ছন্ন সন্ধ্যার অন্ধকারের মধ্যে শ্রীমন্ত বাহির হইয়া গেল ।

গিরি বাহিরের দুয়ার পর্যন্ত ছুটিয়া আসিয়া ব্যাকুলভাবে ডাকিল—ওগো, ওগো ।

কোথায় কে !

দুয়ারের দুই পাশের বাজু দুইটা আশ্রয় করিয়া গিরি বাহিরের পানে চাহিয়া রহিল ।

আঁকা-বাঁকা পল্লী-পথখানি হাত দশ-বারো দূরে গভীর অন্ধকারের মাঝে লীন হইয়া গেছে । সে অন্ধকারে তাহার অশ্রুসজল দৃষ্টি বার বার প্রতিহত হইয়া কিরিয়া আসিল ।

বর্ষণ ও বায়ুতে গাছে, ঘরের চালে চালে একটা শব্দ-প্রবাহের সৃষ্টি করিয়াছে ।

পাশের বড় গাছটার কয়টা পক্ষীশাবক আতভাবে চিঁ-চিঁ করিয়া ডাকিয়া উঠে । সঙ্গে সঙ্গে তাহাদের পিতামাতার পক্ষপ্রসারণ ও সঙ্কোচনের শব্দ পাওয়া যায়, তাহারা বৃষ্টি শাবক কয়টিকে বুকে টানিয়া লইল ।

বিপুল অন্ধকার। দিকে, দিগন্তে, উর্ধ্বে—কোন দিকে কোথাও আলোক-রশ্মির একটুকু যেথার এতটুকু আভাস নাই। মাঝে মাঝে কালো আকাশের বুক চিরিয়া আকা-বাকা বিদ্যুতের রেখা ঝলকু দিয়া যায়।

দীর্ঘশ্বাস ফেলিয়া গিরি ঘরের মধ্যে ফিরিয়া গিয়া একটি কোণে চূপ করিয়া বসিল।

তাহার মনের যত রোষ গিয়া পড়িল আজ ওই ভাগ্যহতা মেয়েটা, ওই গৌরীর উপর। কি একটা কুগ্রহের মত তাহার অদৃষ্টাকাশে সে আসিয়া জুটিয়াছিল। সমস্ত সংসারটা তাহার একদিনে বিপর্যস্ত করিয়া দিয়া সে চলিয়া গেল। আর রোষ পড়ে তাহার নিজের উপর, তাহার নিজের একটা হইলে ত আজ—

একটা হৃগভীর দীর্ঘশ্বাস তাহার বুক চিরিয়া ঝরিয়া পড়িল। সহসা সে, কে জানে কেন, আপন যৌবন-পরিপুষ্ট দেহখানা কঠিন ভাবে নিপীড়িত করিল—বুঝি সে বুঝিতে চাহিতেছিল কোথায় সে অঙ্গহীনা।

নয়

অন্ধকার !

হাত দিয়া সে অন্ধকার স্পর্শ করা যায় বোধ হয়।

তাহার উপর অজস্র বর্ষণ, এলোমেলো বাতাস বর্ষণের শৈত্যকে অসহ, তাকু করিয়া তুলিয়াছে। সে শৈত্যে ধরণী পর্যন্ত আত হইয়া কুণ্ডলী পাকাইয়া নিখর অবস্থায় পড়িয়া আছে ; তাহার বৃকের আবরণ-মাটি শিথিল, গলিত হইয়া গিয়াছে।

সেই বর্ষণ, বাতাস আর সেই অন্ধকারের মধ্য দিয়া চলিয়াছে শ্রীমন্ত। উন্মত্ত যে, সেও যদি এই বর্ষণ-মুখর অন্ধকারের মধ্যে চলে, তবে দেহের যাতনায় অস্থির হইয়া উঠে।

কিন্তু শ্রীমন্ত চলিয়াছে দৃঢ়ভাবে একটা দিক লক্ষ্য করিয়া। মুখ দিয়া ঘন ঘন পড়িতেছে ভ্রত-গমন-হেতু গভীর শ্বাস-প্রশ্বাস ; হাতে লাঠি, মাথায় জড়ানো একখানা চাদর। কিছু দূর যায় আর একবার দাঁড়াইয়া দিক ঠিক করিয়া আবার চলে।

জলকাদায় পথে বিপথে ঘুরিয়া সে শেষে মহাদেবপুরে মধ্যরাত্রির পূর্বেই আসিয়া পৌঁছিল। খোঁজ করিয়া সে রামদাস ঘোষ, পাত্রের ভগ্নীপতির বাড়িতে গিয়া উঠিল।

যাক, তখনও বিবাহ হয় নাই, শেষরাত্রে লগ্ন।

বাহিরে একটা লণ্ঠনের আলো জ্বলিতেছিল। সেই আলোয় একটা কবলের উপর আসর জমাইয়া বসিয়া আছে হরিলাল স্বয়ং।

শ্রীমন্ত আসিয়া হরিলালের মাথা ফটাইয়া দিল না, সে একেবারে তাহার পায়ে আছাড় খাইয়া পড়িল। কহিল—ওস্তাদ, গৌরীর পানে তাকাও, না হয় তার গলায় পা দিয়ে মেরে ফেল।

হরিলালও আকস্মিক আতভিক্কাই কেমন হইয়া গেল। তাহার মুখে আজ হিন্দী-বাত ফুটিল না, সে কহিল—তাই ত, টাকা নিয়েছি যে—

—কত টাকা নিয়েছ ? কেবল দাঁড় টাকা ।

—সে টাকা কি আর আছে ? দেনা ছিল, বডি-ওয়ারেন্ট ধরিয়েছিল, তাই—

শ্রীমস্তের মনে পড়িল, মহাজনের বাড়ি যে-চাদর সে ঘাড়ে করিয়া গিয়াছিল সে-চাদর তাহার মাথায় বাঁধা, আর তাহাতে আড়াই শত টাকা বাঁধা আছে ।

সে হরিলালের মুখের কথা কাড়িয়া লইয়া কহিল—কত টাকা ? আমি এখুনি দিচ্ছি, কত টাকা ?

হরিলাল তখন ঘোরটা কাটাইয়া উঠিয়াছে, সে তখন নিজের জন্ত সম্ভবমত লাভ যোগ দিয়া অন্ধ স্থির করিতেছিল; হিসাব করিয়া নিজের জন্ত গোটা ত্রিশ টাকা রাখিয়া সে কহিল—দেড় শো টাকা ।

শ্রীমন্ত সঙ্গে সঙ্গে বলিল—আমি দিচ্ছি, দাঁড় ভাই, গৌরীকে আমাকে দাঁড়, আমি দেখেত্তনে ওর বিয়ে দোব, ভিক্ষে চাইছি আমি—

বলিয়া সে মাথার চাদর খুলিয়া টাকা-বাঁধা খুঁটটা বাহির করিল । টাকার ভারী খুঁটটা সশব্দে মাটির উপর পড়িল ।

হরিলালের চোখ দুইটা লোলুপ্তায় জল-জল করিয়া উঠিল, আফসোস হইল কেন সে বেশি করিয়া বলিল না । মুহূর্তে এক মতলব ভাঁজিয়া তাড়াতাড়ি সে কহিল—কিন্তু এরা ? এরা আবার কি বলে দেখি ?

বলিয়া সে পাত্রের অভিভাবক ভগ্নীপতি রামদাসের উদ্দেশে উঠিয়া গেল ।

অলক্ষণ পরেই রামদাস নিজে আসিয়া শ্রীমন্তকে অভ্যর্থনা করিল ।—তা বেশ, তাতে আর আমাদের আপাত্ত কি ? উনি নেহাৎ ধরেছিলেন তাই, নইলে ধরুন গিয়ে কত্রে আমাদের গেরামেই ঠিক রয়েছে । আজই রাত্রে আমরা বিবাহ দিতে পারব । তা আমাদের টাকাটা আর খরচা, ধরুন গোটা পঞ্চাশেক—টাকাটা পেলেই—হেঃ—হেঃ—

বলিয়া বিনীত বিকশিত হাসি দিয়া সে শ্রীমন্তকে মুগ্ধ করিয়া দিল । নাঃ—এরা সত্যি ভদ্র-লোক ! কিন্তু উপায় নাই, পাত্রটি যে কানা—অন্ধ !

শ্রীমন্ত কহিল—তাই দেব আমি, গৌরীকে নিয়ে এস, টাকা গুনে নাও ।

রামদাস উঠিয়া গেল, আবার প্রায় সঙ্গে সঙ্গে হরিলালের সঙ্গে ফিরিয়া আসিল, হরিলালের কোলে ঘুমন্ত গৌরী । ঢেলী-পর ঘুমন্ত গৌরীর মাথাটি এলাইয়া পড়িয়াছে, হরিলাল শ্রীমস্তের কোলে তাহাকে তুলিয়া দিল । শ্রীমন্ত ডাকিল—মামণি !

—উ ।

শিশুটির ঘুমন্ত কানেও এ ডাক ব্যর্থ হইয়া ফিরিল না । গৌরী ঘুমঘোরেও মামার ডাকে সাড়া দিল, উ ।

এমনি ঘুমঘোরে সাড়া দেওয়া তাহার অভ্যাস ছিল ; প্রায়ই রাত্রে খাবার সময় গৌরী ঘুমাইয়া পড়িলে গিরি যখন ঝঙ্কার দিত, শ্রীমন্ত তখন এমনি করিয়াই তাহাকে ডাকিত—মামণি !

গৌরী সাড়া দিত—উ।

শ্রীমন্ত তখন শুরু করিত—শোন তারপর, সেই যে সেই রাজপুত্র—।

হরিলাল কহিল—টাকাটা দে ছিমন্ত। এদের আবার বিশ্বের যোগাড় আছে।

হাঁটু দিয়া ঘুমন্ত গৌরীকে বুকে চাপিয়া ধরিয়া শ্রীমন্ত গনিয়া ছুশো টাকা দিয়া, বাকি টাকাটা খুঁটে বাঁধিল, তারপর গৌরীকে ডাকিল—মামনি—একবার গুঠ ত মনি।

হরিলাল কহিল—হামকো ত কুচ মিলানা চাহি ভাই, গাজা ভাঙ পিয়েগা, দেখো, হামারা সন্তান—

শ্রীমন্ত হাসিয়া কহিল—ভাগ, চল, তুমি আমার সাথে চল, আমার বাড়িতে তোমার কান্নেমু বন্দোবস্ত, যা চাই তোমার

হরিলাল কহিল—নেহি ভাই, নগদ মূল যেৎনা মিলে ওহি ভাল। আর যে রায়বাধিনী তোমার ঘরে বাঁধা!

মোট কথা হরিলাল ছাড়িল না, আর পাঁচটা টাকা সে আদায় করিয়া লইল।

শ্রীমন্ত টাকা দিয়া গৌরীকে বুকে করিয়া উঠিয়া দাঁড়াইল, কহিল—তবে আমি চললাম।

রামদাস প্রবল আপত্তি তুলিয়া কহিল—সে কি হয়? না, সে হতে পারে না। এই দুর্ধোগে ওই দুধের মেয়ে মরে যাবে যে। তা ছাড়া যখন আমার বাড়িতে একটা কাজ আজ; আমাদের অপর কনে ত ঠিকই আছে।

হরিলাল কহিল—জরুর মর যায়েগা; শালা—বন বন হাওয়া কন কন হাড—ইসমে লেডকী মর যায়েগা।

শ্রীমন্ত বিপন্ন ভাবে কহিল—তবে?

রামদাস কথাটা পরিস্কার করিয়া কহিল—অবিশ্বাস হচ্ছে কি আমাদের ওপর?

ইহার উত্তরে ‘হ্যাঁ, অবিশ্বাস হইতেছে’ এ কথা ত বলা যায় না। শ্রীমন্তকে কান্ধেই লজ্জিত ভাবে অস্বীকার করিতে হইল—না—না—তা নয়।

রামদাস কহিল—ধরুন, আমরা যদি মেয়ে না ছাড়তাম, তবে কি করতেন আপনি? আইনেও কিছু করতে পারতেন না; জোরেও কিছু করতে পারতেন না—গাঁ ত আমাদের।

—তা ত বটেই, তবে কিনা গৌরীর মামী—

হরিলাল কহিল—কান্দবে। তা কাঁদুক, এক রজনী তোমার ছিমতী বিরহে কাঁদুক, ছিমন্ত, কাঁদুক।

শ্রীমন্ত হাসিয়া ধমক দিয়া কহিল—ভাগ, ফক্কড় কোথাকার।

রামদাস কহিল—তা উনি সে কথা বলতে পারেন বৈকি; ধরুন উনি হলেন আপনার তেনার নন্দাই। রাইএর যত রস-কথা সব হ'ল ননদের সঙ্গে; গানই আছে—ননদিনী ব-লো নাগরে। হেঁ—হেঁ—বলতে উনি পারেন বৈকি।

অগত্যা গৌরীকে পাশে শোয়াইয়া শ্রীমন্ত তাহার পাশে বসিল।

রামদাস এবার জোড় হাত করিয়া কহিল—তা হলে অল্পমতি করুন একটুকুন জল-সেবা হোক। আর কাপড় একথানা ছাড়ুন।

সত্য, এ দুইটার প্রয়োজন একান্ত ভাবে শ্রীমন্ত অল্পভব করিতেছিল। সারাটা দিনের ও এই অর্ধ-রাত্রির সমস্ত দুর্যোগ মাথার উপর দিয়া গিয়াছে; তাহার উপর পরিশ্রমে—পরিশ্রম ইহাকে বলা চলে না, ইহাকে বলে শরীরের উপর অত্যাচার, দারুণ অত্যাচার—মমন্ত দেহখানা যেন লতার মত এলাইয়া এলাইয়া পড়িতেছিল। সর্বোপরি ক্ষুধার জ্বালা আর এই হিমালী-মাথানো সিক্ত বস্ত্রখানা তাহার সর্বদেহে যেন মৃত্যুর স্পর্শ বুলাইয়া দিতেছিল।

শ্রীমন্ত কৃতার্থ হইয়া গেল—সে ভদ্রতা রক্ষা করিতে পুষ্ট একবার ‘না’ করিল না, সঙ্গে সঙ্গে কহিল—আজ্ঞে বড় ভাল হয় কিন্তু।

—দেখুন দেখি, দেখুন দেখি, বিলম্ব আমারই অন্যায়। বলিতে বলিতে রামদাস উঠিয়া গেল, সঙ্গে সঙ্গে হরিলালও গেল।

নীরবতা ঘনাইয়া আসে, সঙ্গে সঙ্গে দেহখানা ভাঙিয়া পড়ে—চোখ দুইটাও টানিয়া কে যেন জুড়িয়া দিতে চায়।

—গা তুলুন।

শ্রীমন্ত চাহিয়া দেখিল রামদাস, হাতে খাবারের পাত্র; এ-কাঁধে কাপড়, ও-কাঁধে একখান আসন।

শ্রীমন্ত মুগ্ধ হইয়া গেল।

ভিজা কাপড়খানা ছাড়িতেই শুষ্ক বস্ত্রের স্পর্শে মমন্ত দেহখানা যেন প্রফুল্ল হইয়া উঠিল, শুষ্কতার মধ্যে যে উষ্ণতা সঞ্চিত থাকে সেই উষ্ণতার স্পর্শে যেন দেহের রক্তধারায় প্রবাহ ধরিল; গায়ের চামড়ার অসাড়তা ঘুচিতে লাগিল। তারপর আহার—মুড়ি, মুড়িকি, চিড়ে, দই, সন্দেশ, কয় কোষ স্নমিষ্ট কাঠাল, তাহার উপরে মত্ততন্ত কয়খানা লুচি! বিলাসের আহার, সে শুধু পক্ষরস পরীক্ষাহেতু, কিন্তু দেহ-যন্ত্রের প্রয়োজনে অন্তরাঙ্গা যখন চিৎকার করে, তখন সে ক্ষুধা, সে ক্ষুধার আহার সত্যকার আহার, সে আহার দেখিবার বস্তু, সে রস বাছে না, সে চায় বস্তু। সে আহারের তৃপ্তিতেই ধরণীর শস্যস্রষ্টা সার্থক, গৃহস্থের আতিথেয়তা পূণ্যযুক্ত হইয়া উঠে। বোধ করি শ্রীমন্তের সেই অন্তরাঙ্গার ক্ষুধা পাইয়াছিল। সে পরম তৃপ্তির সহিত আহার করিয়া যখন ‘উঠিল তখন দেখিল কিছু গুরুভোজন হইয়া গেছে, ক্ষুধার তাড়নায় মাত্রা বজায় থাকে নাই।

রামদাস কহিল—এই ঘরে আপনি মেয়ে নিয়ে গা গড়ান, আমি একটু আগুন আনি।

শ্রীমন্ত গৌরাকে তুলিয়া কলসটা ঘরে পাতিয়াই তাহার উপর গড়াইয়া পড়িল। পরিশ্রমের পর পরিচর্যায় মাছুষের অবসাদ আসন্ন ঘর হইয়া উঠে।

রামদাস আসিয়া ছঁকাটি আগাইয়া দিয়া কহিল—চাচুন।

তারপর সে বস্ত্রাভ্যন্তর হইতে অপর হাতখানি বাহির করিয়া কহিল—দেখুন, সেবা করবেন? শরীরটা একটু গরম হবে।

শ্রীমন্ত চাহিয়া দেখিল গাঁজা । সে এবার বেশ সজাগ হইয়া উঠিল, রামদাস গাঁজার কলিকাট মাটিতে বসাইয়া আধ-ভৈয়ারী গাঁজাটা শ্রীমন্তের হাতে দিয়া টিকা ধরাইতে বসিল ।

শ্রীমন্ত এবার ভক্তিমন্ত হইয়া উঠিল ; এই জিনিসটুকুর সত্যই তাহার পরম প্রয়োজন ছিল ।

কলিকায় গাঁজা চড়াইয়া শ্রীমন্ত রামদাসের দিকে আগাইয়া দিতেই সে জোড়হাত করিয়া কহিল—মার্জনা করবেন, আমি ও পান করি না । আপনি সেবা করুন ।

শ্রীমন্তের চোখ দুইটা বিষয়ে বড় হইয়া উঠিল, সে কহিল—তবে !

রামদাস হাত কচলাইতে কচলাইতে পরম বৈষ্ণব বিনয় সহকারে কহিল—আজ্ঞে ওস্তাদের মুখে গুনলাম কিনা যে নিয়মিত পান আপনার অভ্যাস—তাই ।

শ্রীমন্ত কলিকাটায় টান মারিতে মারিতে ভাবিতেছিল, সত্যই রীতিমত ভক্তির পাত্র রামদাস, প্রায় দাতাকর্ণের সমতুল্য !

রামদাস কহিল—ওস্তাদ আপনার একবার আমাদের হয়েই ওপাড়া গেলেন সেই কথ্যাটির বাড়ি । বেশ বক্তা লোক । ধরুন এই রাতেই ত বিয়ে ঠিক করতে হবে ।

শ্রীমন্ত একটা পুরা দম লইয়া পরম তপ্পির সন্নিহিত ভুলিতে ভুলিতে রহিয়া রহিয়া ধোঁয়া ছাড়িতে লাগিল ।

রামদাস হাসিয়া কহিল—ও রসে বঞ্চিত গোবিন্দদাস—তাই হয়েছে আমার ; নইলে দেব-দুগ্ধভ দ্রব্য ।

শ্রীমন্তের আনন্দটা বেশ ঘনীভূত হইয়া উঠিতেছিল, সে পরম আনন্দে গান ধরিয়া দিল—হঁ—হঁ—দেবদুগ্ধভ—সত্যিই দেবদুগ্ধভ, শিব-বন্দনার গানে আছে—

ও গাঁজা তোর পাতায় পাতায় রস,

গাঁজা থেয়ে পাগ্‌লা ভোলা কার্লমায়ের বশ ।

পুনরায় সে একটা প্রাণ ভরিয়া দম দিল । অতঃপর রামদাস কি বলিয়া যায়, সে কথাগুলো আর তাহার কানে ভাল যায় না । দেহের অবসাদও যেন বড় অসম্ব হইয়া উঠে ! সে চোখ মুদিয়া ধোঁয়া ছাড়িতে ছাড়িতে একহাতে বিছানা হাতড়াইতে লাগিল আর আপন মনেই বিড়বিড় করিয়া কহিল—গৌরী, গৌরী, বালিশটা দে ত মা, বা-বালিশ ।

রামদাস হাঁ হাঁ করিয়া ঠোঁটে তালুতে আঙ্গুপের চুক চুক করিয়া শ্রীমন্তকে সজাগ করিয়া কহে—আহা—জিনিসটা মাটি হ'ল, আছে আছে আরও একটান দিবিয়া হবে ।

শ্রীমন্ত চকিত হইয়া কলিকাটা বাড়াইয়া ধরিয়া টান দিতে দিতে কহিল—এসা বিয়ে এবার দোব গৌরী-মার—সেই গৌরী বেটি কনে, শিবে বেটা বর, ঝুম কড়া কুড়—বাগ্‌টিটা মুখেই রহিয়া গেল, শ্রীমন্ত কলিকা হাতেই ঘরের মেঝের উপর গড়াইয়া পড়িল ।

রামদাস কয়েক মুহূর্ত পরে ঈষৎ হাসিয়া গাঁজার কলিকার আগুন সাবধান করিয়া, দরজা খুলিয়া বাহিরে আসিল । হবিলাল পাশ হইতে ঝাঁক বকের মত গলা বাড়াইয়া জিজ্ঞাসা করিল—ফেলাট হো গিয়া ?

রামদাস কহিল—হবে না ? দুটি ইয়া বড় সুপক ধূতীর বোজ মিশ্রিত করে দিয়েছি ।

কাল স্বর্ধান্তর পূর্বে বোধ হয় আর চৈতন্য -বলিয়া বেশ মৃদু গভীর ভাবে 'না'র ভঙ্গীতে ঘাড় নাড়িয়া কথা শেষ করিল।

হরিলাল কহিল—এইবার তা হ'লে মেয়েটাকে—

রামদাস বলিল—হ্যাঁ।

*

*

*

শেষ রাত্রে একটা প্রবল গর্জনে শ্রীমন্ত চমকিয়া জাগিয়া উঠিল। মাথার ভিতরটা কেমন বিষম্বিম্ব করিতেছিল। বাহিরের বর্ষণ-শব্দ, বাতাসের ছ হ র ব কানের মধ্যে আসিতেছে, কিন্তু মস্তিষ্কের মধ্যে সে শব্দের অমুভূতি যেন তন্দ্রা-ঘোরে ;—তন্দ্রাটা আবার ধীরে ধীরে গভীর হইয়া আসে, সে পাশ ফিরিয়া আরাম করিয়া শুইল।

সহসা বর্ষণ-বাতাসের শব্দ চিরিয়া একটা উচ্চ স্ফূর্তল তীক্ষ্ণ শব্দ ভাসিয়া উঠিল। শঙ্কনি ! আবার !

সঙ্গে সঙ্গে নারী-কণ্ঠের হলধ্বনি। সমবেত শব্দে আচ্ছন্ন শ্রীমন্তের মস্তিষ্ক সজাগ হইয়া উঠিল। তাহার এবার সব মনে পড়িয়া গেল ; ওঃ, এদের বিবাহ তাহা হইলে হইতেছে। সে তাড়াতাড়ি গৌরীকে কোলের কাছে টানিয়া লইতে হাত বাড়াইল, হাত পড়িল মাটিতে ; এ-পাশ, ও- পাশ, সকল পাশই খালি, গৌরী নাই !

মুহূর্তে একটা সন্দেহ তাহার অবলাদ-আচ্ছন্ন মস্তিষ্কের মধ্যে বিদ্যুতের মত চিড় খাইয়া জাগিয়া উঠে, সে-বিদ্যুতের আগুনে, তাহার মস্তিষ্কের উপর আচ্ছন্নতার যে একখানি আবরণ ছিল, তাহা নিঃশেষ হইয়া গেল। সে লাফ দিয়া উঠিয়া গিয়া দরজাটা সবলে টানিল ; বাহির হইতে দরজা বন্ধ !

নির্মম নিষ্ঠুর বঞ্চনার ক্ষোভে মাঝুখের বুক জাগে উন্নত প্রতিহিংসা, সে-প্রতিহিংসায় মাঝুখের ভিতরের সকল শিক্ষা-মভ্যতার আবরণ ছিন্নভিন্ন করিয়া পুণ্ড্র যে দুর্নিবার ক্রোধে ও উন্নত আত্ম-হার্য-শক্তিতে জাগিয়া উঠে, সে ক্রোধের মুখে সমস্ত ছুনিয়া, এমন কি নিজের জীবনের উপরে পর্যন্ত মাঝুখের মমতা থাকে না। তখনকার শক্তি মাঝুখের বিশ্বয়ের বস্তু।

সেই ক্রোধ, সেই শক্তি তখন শ্রীমন্তের পাখরের মত দেহে ক্রিয়া করিতেছিল। তাহার কাছে ঐ পল্কা দরজা জোড়াটা কতক্ষণ ! বিপুল শক্তিতে চাড় খাইয়া দরজাটা শিকলের গোড়ায় ফাটিয়া গেল, আর এক আকর্ষণে দরজাখানা হুভাগ হইয়া গেল ; শিকলটাও থসিয়া গেল।

লাঠি-গাছটা কুড়াইয়া শ্রীমন্ত চলিল ঐ শব্দ লক্ষ্য করিয়া—ক্রত দৃঢ়, অখচ নিঃশব্দ পদক্ষেপে।

এক পাশে একটা আলোকের ধারা দেখা যাইতেছিল, শব্দগুলোও ঠিক ঐ দিকে ; শ্রীমন্ত দেখিল সেইটাই বাড়ির ভিতরের বাহির দরজা। সেখান হইতে সমস্তই দেখা যাইতেছে।

সম্মুখের উঠানের উপর ঘরের বারান্দায় বিবাহের মণ্ডপ ; ওপাশে বসিয়া বর, সম্মুখের আলো তাহার মুখের উপর পড়িয়াছে, কালো কদাকার চেহারা—কি বীভৎস ! চক্ষুদুটির চিহ্ন পর্যন্ত নাই, আছে শুধু জলসিক্ত দুটি পক্ষিল গহ্বর, তাহাতে অনর্গল মৃদু জলধারা

গড়াইতেছে। ঐ যে তাহারই পাশে বসিয়া লাল-চেনীতে মোড়া ঘুমন্ত গৌরী, তাহার ছোট হাতখানি ওই অন্ধের হাতের উপর ধরিয়া আছে হরিলাল। শীর্ণ কুর মুখে তাহার হাসির রেখা, বোধ হয় ওপাশের কুটুম্বগণের সঙ্গে পরিহাস চলিতেছে।

শ্রীমন্তের স্তম্ভিত কণ্ঠ হইতে বাহির হইল একটা অদ্ভুত শব্দ, রোষ ও রোদনে জড়িত একটা অভিব্যক্তি, ঠিক যেন আঘাতে মরণোন্মুখ হৃদাস্ত পশুর ক্রোধ ও যাতনার গর্জন!

ঐ শব্দে হরিলাল চমকিয়া কণ্ঠার হাত ছাড়িয়া উঠিয়া দাঁড়াইল; অভিপ্রায় ছিল পলাইবার।

কিন্তু সম্মুখেই তখন শ্রীমন্ত; সে তখন হাতের লাঠি দারুণ ক্রোধে হরিলালের মাখায় বসাইয়া দিল।

চারিদিক হুইতে একটা কলরোল উঠিল...

শ্রীমন্ত তখন আবার লাঠি উঠাইয়াছে ওই কদাকার চক্ষুহীন নিরীহ জীবনটির উপর; গৌরী সে কলরোলে জাগিয়া কাঁদিয়া উঠিল—মামা গো!

আর ঐ কদাকার চক্ষুহীন ছেলের চকল অবস্থায় অসহায়ের মত দৃষ্টিহীন চক্ষু লইয়া চারিদিকে চাহিল।

শ্রীমন্তের হাতের লাঠি অবশ হইয়া গেল, তাহার বড় করুণা হইল, হায় ঐ অসহায় জীবনটিরই কি দোষ!

*

*

*

গিরি সেই দাওয়াতেই বসিয়া ছিল।

সকল ভাবনা তাহার ডুবিয়া গিয়াছে। সে ভাবিতেছিল শুধু, তাহার খাখা আছে তাহাও কি যাইবে? ওই হৃদাস্ত কাণ্ডজ্ঞানহীন লোকটিকে তাহার চেয়ে ত কেউ বেশি চেনে না; সে ত জানে ঐ লোকটির কি শক্তি! তাহারই প্রাণের আবরণে না হয় সে হৃদাস্ত শাস্ত হইয়া আছে; কিন্তু আজ যখন তাহার হাত ছাড়াইয়া, তাহার মমতার সকল আবরণ ছিন্ন করিয়া উন্নতের মত সে ছুটিয়াছে, তখন যে সে কি করিয়া ঘরে ফিরিবে, সে ত গিরির চোখের উপরেই ভাসিতেছে। তাহার সর্বাঙ্গ হিম হইয়া গেল—হয় খুন করিয়া ফিরিবে,—নয় খুন হইয়া থাকিবে, রক্তাক্ত শ্রীমন্ত তাহার চোখের উপর বিভীষিকার মত নাচিতেছিল।

ভোরের আলো তখন ফুটি-ফুটি করিতেছে।

গিরির দারা রজনীর জাগ্রত স্বপ্ন বাস্তব হইয়া ঘরে ফিরিল। রক্তাক্ত দেহে শ্রীমন্ত লাঠি-গাছটা কেলিয়া দিয়া দাওয়ার উপর বসিয়া কহিল—খুন করেছি চণ্ডালকে।

গিরির মুখে বাক্য সরিল না, কপালে করাঘাত করিতে তাহার হাত উঠিল না, তাহার কণ্ঠ হইয়া গেছে মুক, অঙ্গ হইয়া গেছে অসাড়, মাটির মূর্তির মত বসিয়া সে ভাবিতেছিল একটি কথা—তারপর!

শ্রীমন্ত কথা কহিয়া যাইতেছিল, এবার তাহার কণ্ঠ ভাঙিয়া গেল, চোখে জল, সোনার প্রতিমাকে আমার মরণের হাতে তুলে দিলে গিরি, দেখনি তুমি, সে পাত্র ত নয় যেন জ্যাস্ত

মরণ । সব অন্ধকার তার ।

আবার ক্ষণেক পরে আক্কেশ-ভরা কণ্ঠে কহিল—মেয়ে বেচে টাকা নেওয়ার সাধ তার মিটিয়ে দিয়ে এসেছি ।

এতক্ষণে একটা দীর্ঘশ্বাস ফেলিয়া লকরণ তিরস্কারের স্বরে গিরি কহিল—তারপর ?

এখনও তারপরের ভাবনা শ্রীমন্তের মনে জাগে নাই, সে কহিল—তারপর আবার কি ? যেমন কর্তব্য তেমনি ফল—

গিরি কহিল—সে ফল ত তুমি ভোগ করবে ফাঁসিকাঠে, আর আমি—

সে ফোপাইয়া কাঁদিয়া উঠিল ।

শ্রীমন্ত গুম হইয়া গেল, এতক্ষণ পরে তারপরের ভাবনাটা বুঝি সে ভাবিতে বসিল ।

একটা দীর্ঘশ্বাস ফেলিয়া গিরি উঠিয়া কাপড়, গামছা, ঘটিতে জল লইয়া কাছে দাঁড়াইয়া কহিল—নাও, হাত মুখ ধোও, কাপড় ছাড় ।

শ্রীমন্ত একটা দীর্ঘশ্বাস ফেলিয়া কহিল—ধুই, ছাড়ি । শিথিল হস্তে গিরির হাত হইতে ঘটিটা লইতে লইতে শ্রীমন্ত কহিল—আচ্ছা ওই কানার হাতেই যদি পড়বে, তখন ভগবান আমার গোবী-মাকে এমন হৃন্দর ক'রে কেন গড়েছিল বল দেখি ? বলিয়া সে গিরির মুখের পানে চাহিল ।

গিরি রুদ্ধ কণ্ঠে স্বাক্ষর দিয়া উঠিল—বলো না, বলো না, তার নাম আমার কাছে ক'রো না, তার বিচার নাই, বিচার নাই । হয়ত বা সে নিজেই নাই ।

গিরির ভোরের আশঙ্কা সফল হইল ।

বৈকালের দিকে থানাপুলিসে ঘর ভরিয়া গেল । সঙ্গে রামদাস, আর মাথায় ফেটি-বাধা হরিলাল ।

শ্রীমন্তের হাতে দড়ি পড়িল, তাহার বিরুদ্ধে অভিযোগ 'হত্যার চেষ্টা', কথ্যা রাহাজানির চেষ্টা, চুরি, আরও তিন-চারিটা, কোজদারী ধারার আর শেষ হয় না । অভিযোগের ফিরিস্তি শুনিয়া শ্রীমন্ত অবাক হইয়া উপরের পানে চাহিল । অনন্ত শূন্যতায় ভরা আকাশ, কিন্তু এখানেই মানুষের প্রাণ-চালা অহেতুক বিশ্বাস । দুঃখে এখানে চোখ রাখিয়া সে বেদনা জানায়, আশ্বাস চায়, মর্মভেদী শোকে ঐ আকাশপানে উদাস মনে চাহিয়া সাহসনা চায়, সবলের অত্যাচারে দুর্বল ঐ আকাশপানে চাহিয়া প্রতীকার চায়, ভক্তি জানায়, মার্জনা চায়, কিছু পায় কি না কে জানে, কিন্তু মানুষ চিরদিন ঐ শূন্যতার মাঝে পূর্ণ কাহাকেও খোজে, আজও খোজে, বিশ্বাসীও খোজে, অবিশ্বাসীও দুর্বল মুহূর্তে ওই আকাশপানেই চায় ।

হরিলাল ফেটা-বাধা মাথাটাই দোলাইয়া কহিল—কেয়া চাঁদ, ঘুঘু দেখা ছায়, লেकिन ফাঁদ দেখা নেই ; আব দেখো ফাঁদ সোনার চাঁদ ।

গিরি কিন্তু হাঁফ ছাড়িয়া বাঁচিল, হরিলাল মরে নাই ।

তারপর নবঘুগের গ্রামপর্ব বা মামলা অধ্যায়।

এই পর্বে উজ্জ্বাস নাই, হাস্য-পরিহাস নাই, আছে শুধু হিমশীতল মস্তিষ্কের কূট কৌশল, চিন্তাস্কুল দৃষ্টি, আর একটা অস্বাভাবিক গান্ধার্য। আর আছে গ্রামপ্রার্থীর একটা উদ্বেগপূর্ণ উত্তেজনা, পরাজয়ে হ্রাস পায় না, জয়ে আশা মেটে না। আর দেখা যায় এখানে অর্থের শক্তি, বোঝা যায় বাক্য ব্রহ্ম—সে সত্যই হোক, আর মিথ্যাই হোক, হ্রস্বলগ্ন দৃঢ়ভাবে উচ্চারণ করিলেই এ পর্বে জয়। শ্রীমন্ত মোক্তাবের ব্যাক্যের শক্তিতে তখনকার মত জামিনে খালাস হইয়া ফিরিল।

তারপর দিনের পর দিন পড়ে, সদরে উকীল মোক্তারের ঘটা বাড়ে, আর বাড়িতে ঘড় ঘটি তৈজসপত্র, গিরির গায়ের রূপা, কাঁসা, পিতল একে একে নিঃশেষ হইয়া যায়।

দিনের পর দিন শ্রীমন্ত বাড়ি ফিরিয়া আসে—একটা উদ্বেগপূর্ণ উত্তেজনা লইয়া। মামলায় জয় অনিবার্য, তবে খরচ করা চাই, আর সাক্ষী তৈয়ারী করা চাই; উকীল বলিয়াছে—এ নাকি গ্রামের বিধান লেখা আছে। হায় রে গ্রাম! শ্রীমন্ত ওই কথা ভাবে, ওই সে স্বপ্ন দেখে, তাহার কথার মধ্যে ঘুরিয়া ফিরিয়া ওই বস্তুটুকুই আত্মপ্রকাশ করে।

উদ্ভিন্না গিরি হাত পা ধুইবার জল দিয়া সেদিন জিজ্ঞাসা করিল, কি হ'ল আজ?

— দিন পড়ল, কের পনের দিন পর।

—আবার দিন পড়ল। উদ্বেগে গিরি মরিয়া যাইতেছিল। তার ত ভবিষ্যৎ নাই, বর্তমানও বুঝি অতলে তলাইয়া যায়।

শ্রীমন্ত কহিল—আর এ কি ভাতের গেরস, যে মুখে তুললেই হয়ে গেল, বাস্। একটা একটা কথা ধরে এর জেরা কত, তকরার কত? আজ শালাদের সাক্ষী একটাকে, বুঝেছ, যা নাজেহাল করেছে উকীল—হা, হা, হা, বেটা কিন্তু সত্যি কথা বলেছিল। আমি তাৎক্ষণিক শুধিয়েছিলাম রামদাস ঘোষের বাড়িটা কোথা হে, শুধান আমার বটে। আমার উকীল ধরলে টাট্টা চেপে—তুমি নেশা কর? বেটার দুমতি, বেটা বলে—না। অঃ—আমার উকীলের চোখ কি খর, বললে—দেখি তোমার হাত, হাঁ হাঁ বাঁ হাত, বাস হাত পাততেই যায় কোথা, হাতের তেলো হলদে! অমনি ধরে শুঁকে বললে এঃ, এখনো গাঁজার গন্ধ বেরুচ্ছে, আর তুমি বলছ, না! দেখুন হুজুর, দেখুন! আর বুঝলে কিনা কোটহুজুর একেবারে কে কার গায়ে হেসে গড়িয়ে পড়ে। হাকিম মুখে কমাল দিয়ে হাসে।

গিরির বোধ করি ভাল লাগে না, সে বুঝিতে পারে না ঐ ব্যক্তিটির গাঁজা খাওয়ার জন্ত স্বামীর অপরাধ লঘু লইল কেমন করিয়া, সে কহে—ভাত দিই খাও।

পা মুছিতে মুছিতে শ্রীমন্ত বলে—দাও।

খাইতে খাইতে শ্রীমন্ত আপন মনেই কহিল—কিছু হবে না, মামলায় কিছু নাই। আর ওদের সাক্ষীগুলো সব গোবর গুলুছে। আর এক বেটাকে, বুঝেছ—সে বেটা আমার সেই চান্দরখানা, যেখানা ফেলে এসেছিলাম—সেইখানা দেখে বললে, হ্যাঁ এই চান্দর গায়ে দিয়ে

আসামী ঘোষের বাড়ি এসেছিল, আমি দেখেছিলাম, আমার উকীল উঠেই তাকে ধরলে—তুমি কি খোঁড়া ?

—আজ্ঞে না—

—তবে তুমি খোঁড়াচ্ছ কেন ?

—আজ্ঞে পা কেটেছে ।

—কিসে, জুতোতে বুঝি ?

সে আর কথা কয় না, উকীলও ছাড়ে না, জেরা করলে, নতুন জুতা পা কেটেছে বুঝি ?

সে কথা কয় না, তখন উকীল কসে এক ধমক, তখন বললে—হ্যাঁ, আজই নতুন কিনেছি আমি ।

উকীল বললে—হরিলাল দিয়েছে, না রাম ঘোষ ?

লোকটা যা হোক চালাক, বললে—আমার খন্তর দিয়েছে ।

যাক, শেষটায় লোকটা সেরে নিয়েছে ।

গিরির একটা ঘুণা ধরিয়া যায়, ইহার কোথায় কৌতুক, আশ্চর্যের ইহাতে কি আছে তাহার সম্বল নারী-মন খুঁজিয়া পায় না । ইহাই ত শুধু নয়, ইহার পর আরও আছে অর্থের ব্যবস্থা । সম্বল ত আর কিছু নাই, শ্রী-গিরি বাকুড়ি বিকাইয়া গেছে, মহাজন সমগ্র জমিতে ক্রোক গাড়িয়া বসিয়া আছে, ঘরের তৈজস গেছে । আছে পরের অনুগ্রহের উপর ধার বা দান । তাও লোক দেয় না ; আর আছে বঞ্চনা করিয়া লওয়া বা লইয়া বঞ্চনা করা । সাদা স্পষ্ট করিয়া বলিতে গেলে যাহা চুরি বা পরস্ব আত্মসাতের প্রবৃত্তি ।

ওটা বোধ করি হুনিয়াস্কর মানুষের মনে থাকে ; নতুবা মানুষের আশা মেটে না কেন ? মানুষ ত বোঝে, অপরের না লইয়া তাহার ভাগ মোটা হইবে না, তবু লালসা তাহার বাড়িয়া চলিয়াছে কেন ? এই লালসাই চুরিই বল আর পরস্ব আত্মসাই বল, সমস্ত প্রবৃত্তিগুলার উপাদান ! লালসা যাহার আছে, ঐ ইচ্ছাও তাহার আছে । তবে শিক্ষায়, সংযমে, সচ্ছলতায় মানুষ তাহার উপর একটা কঠিন আবরণ রচনা করিয়া ও-গুলোকে সমাধিস্থ করিয়া রাখে । কিন্তু লালসার সঙ্গে ক্ষুধার আগুন যেদিন প্রসঙ্গরূপে জ্বলিতে আরম্ভ করে, সেদিন অধিকাংশ লোকেরই সে অগ্নিশিখার ঐ আবরণ একদিক হইতে ছাই হইতে থাকে আর প্রবৃত্তিও ক্রমশ আত্মপ্রকাশ করে । তাই অভাবে স্বভাব নষ্ট, তাই দারিদ্র্যদোষে গুণরাশিনাশী ।

তাহার উপর পূর্ব-পুরুষের প্রকৃতির ধারা নাকি রক্তের শিরায় শিরায় প্রবাহিত হয় । শ্রীমন্তের বাপের এ প্রবৃত্তি ছিল, হরিলালের গুরুগিরিতে ছেলেকে দিয়াছিল এ বিজ্ঞা খানিকটা শিখিতে, এই প্রবৃত্তিরই তাড়নায় তখন শ্রীমন্ত যাহা পারে নাই, পারিল আজ, চারিদিক হইতে চাপিয়া ধরিয়া ছুনিয়া তাহাকে এ বিজ্ঞা বেশ ভাল করিয়াই শিখাইল, চর্চায় চর্চায় কয়েক মাসের মধ্যেই শ্রীমন্ত বাপ গুরুর উপরে চলিতে শুরু করিল ।

কিন্তু প্রথম যেদিন সে প্রতিশ্রুতি দিয়া বঞ্চনা করিয়া আসে, সে দিন সে সত্যকার হাসিমুখে

পারে নাই। তবু ঠোঁটে হাসি মাখিতে হইয়াছিল। কেমন করিয়া যে সে হাসি আসিয়াছিল তাও সে জানে না, আর কেমন যে সে হাসির রূপ তাও সে কল্পনা করিতে পারে না।

বিপিন শ্রীমস্তের প্রতিবেশী, বাল্যসখী, একসঙ্গে হরিলালের আড্ডায় গাঁজা খাইতে শিখিয়াছিল। মামলার দিন শ্রীমন্ত তাহাকে গিয়া ধরিল—

বিপিনদাদা, আজ ভাই আমাকে রাখতেই হবে, দশটি টাকা আজ দিতেই হবে।

বিপিন কহিল—তাই ত শ্রীমন্ত, আমার কাছে ত নাই।

শ্রীমন্ত বিপিনের পা দুইটা ধরিয়া বলিল—দোহাই দাদা!

ভগবানের রূপায় বিপিনের সচ্ছলতা ছিল বেশ, লোকটাও ছিল মন্দ নয়, সে বাল্যসখীর এই পায়ে ধরা উপেক্ষা করিতে পারিল না, দশটা টাকা সে শ্রীমস্তের হাতে দিয়া কহিল—দেখিস ভাই।

শ্রীমন্ত তাহাকে কথা কহিতে দিল না, তাহার বক্তব্য শেষ হইবার পূর্বেই, তাহার সুরুতজ্জ বক্তৃতায় বিপিনের মূখ বন্ধ হইয়া গেল। আপনি কোথা হইতে কথা আসিয়া জুটিয়া গেল জিহ্বায়—দেখো তুমি দাদা, এই দিন চার-পাঁচ, পাঁচদিনের বেশি হয়ত তুমি আমাকে বলো, আর এক মাঘে শীত পালায় না দাদা। না দিই ত জুতো মেরো তুমি রাস্তায় ধরে, বলো তোরা জাতের ঠিক নাই।

প্রতিশ্রুতি পালন করিবার অভিপ্রায়ও তাহার ছিল। কিন্তু গরীবের ইচ্ছায় সংসার চলে না, পাঁচ দিনের দিন বহু চেষ্টাতেও কোথাও কিছু মিলিল না।

সে সন্ধ্যায় বিপিন আর আসিল না, শ্রীমন্ত হাঁফ ছাড়িয়া বাঁচিল। পরদিন ভোরে শ্রীমস্তের মাঠ হইতে বাড়ি ফিরিতে বিপিনের সহিত দেখা হইয়া গেল। লজ্জিত শ্রীমন্ত অতি-লজ্জা পাইবার আশঙ্কায় বিপিন কিছু বলিবার পূর্বেই আবার মিথ্যা কথা কহিয়া বলিল—এই যে দাদা, কাল ফিরতে বড় রাত হয়ে গেল—হেঁ—হেঁ—বলিয়া দাঁত মেলিয়া দিল।

হাসির সঙ্গে সঙ্গে সে ঘামিতেছিল।

বিপিন ভদ্রতা করিয়া কহিল—তা বেশ, তা বেশ।

কয় পা আসিয়া তবে শ্রীমস্তের বুকের স্বাভাবিক অবস্থা ফিরিল। সেদিনও বিপিন আর আসিল না; পরদিন সন্ধ্যায় বিপিন নিজে আসিয়া শ্রীমস্তের দরজায় হাক দিল—শ্রীমন্ত—শ্রীমন্ত! শ্রীমন্ত ঘরের মাঝে লুকাইয়া বসিয়া রহিল, সাড়া দিল না।

গিরি কহিল—সাড়া দাও না—

শ্রীমস্তের মাথার বোধ করি ঠিক ছিল না, সে বাঁজিয়া উঠিল—টাকা দিবি তুই? সাড়া দাও না, এঁা!

গিরি ব্যথিত বিষয়ে স্বামীর পানে তাকাইয়া দেখিল।

অন্ধকারে গৃহকাণে বসিয়া শ্রীমন্ত কি ভাবিতেছিল কে জানে! কিন্তু চোখ দুইটা স্বাভাবিক দীপ্তিতে জল্ জল্ করিতেছিল, বোধ হয় তাঁর দৃষ্টি হানিয়া ধরণীর বন্ধ ভেদিয়া সে খুঁজিতেছিল, কোথায় ধন-রত্ন লুকানো আছে! আঃ, কাল যদি সে মাটি খুঁড়িয়া টাকা পায়—

লাখ লাখ টাকা—রাশি, রাশি ধন, আঃ! দরিদ্রের বুড়কা এমনি উদগ্র আর এমনি অক্ষয়ই বটে!

এগারো

ইহার পর হইতে সে বিপিনকে এড়াইয়া চলিতে শুরু করিল, শুধু বিপিনকেই কেন, গ্রামের প্রায় সকলকেই এড়াইয়া চলিতে হইল।

কারণ, প্রবৃত্তির মুখের সংঘম বা সঙ্কোচের বাধ একবার ভাঙিলে ত আর রক্ষা নাই, মানুষ তখন আর আপনাকে ধরিয়া রাখিতে পারে না। শ্রীমন্ত একে একে সকলের কাছে এমনি করিয়া হাত পাতিল, কাহারও কাছে দুটো টাকা, একটা টাকা, কাহারও কাছে বা একটা মিকি, পাঁচ সের চাল—এমনি করিয়া ক্ষুদ্রতারও আর সীমা পরিসীমা রহিল না।

গিরির লাঞ্ছনারও অন্ত নাই। শ্রীমন্ত ত বাড়ি হইতে পলাইয়া বাঁচে, কিন্তু বন্দিনী নারী ঘরে বসিয়া সকাল হইতে সন্ধ্যা পর্যন্ত তাগাদার কটু বাণী নীরবে সহিয়া যায়, আবার শূণ্য হস্তে পরের দুয়ারে দুই মূঠা চালের জন্ম যাইতে হয়। অন্তরের দাহ অন্তরে লুকাইয়া কপট তোষা-মোদের হাসি মুখে মাখিয়া গিরি যখন পরের কাছে হাত পাতে তখন ভাবে, হায়, এত অপমান সে নয় কি করিয়া? সে যেমন হইয়াছে, সতাই কি মানুষ এমন হইতে পারে?

শুধু তাহার সামান্য মেলে যখন সে মনোমন্দিরে আপনার একান্ত কামনার শিশু-দেবতাটিকে অর্চনা করে। এখনও সে আশা ছাড়ে নাই, এখনও তাহার আশা, তাহার সকল শৃঙ্খতা পূর্ণ করিয়া বুক জুড়িয়া সে আসিবে, সেই তাহার ভবিষ্যতের ভরসা—সেই তাহার দুঃখ ঘুচাইবে—আত্ম-তোলা নির্জন মুহূর্তে আশা-বিতোরা নারীকণ্ঠ গুন গুন করিয়া গুঞ্জন করিয়া উঠে—

এই যে আমার-ভাঙা বাড়ি, এই আ-গাছার বন,

আমার সোনার যাহু এসে হেথা রচবে সিংহাসন।

আত্মহু হইয়া যদি কখনও এ গান তাহার নিজের কানেই প্রবেশ করিত, তবে হয়ত নিজেই সে বিজ্রপের হাসি না হাসিয়া থাকিতে পারিত না।

এমন করিয়াই দিন যায়!

শ্রীমন্ত খাবার সময় চুপি চুপি আসিয়া ঢুকে, খাইয়া-দাইয়া আবার সরিয়া পড়ে, সে আড্ডা গাড়িয়াছে গিয়া বাঙ্গীপাড়ায়।

দারিদ্র্যের লঙ্কার সমাজ-বিচারের মত সে ওদের দলে গিয়া ভিড়িল। এই মানুষগুলিকে শ্রীমন্তের লাগিয়াছিলও ভাল—ওরা লঙ্কা দেয় না লঙ্কা পায় না, ধার লওয়াই ওদের স্বভাব, শোধ দেওয়ার অভ্যাস নাই, সেটাও স্বভাবে দাঁড়াইয়া গিয়াছে। তুমি পাইবে পাইবে—তাহার জন্ম গালি দাও সে সহ্য করিবার শক্তি ওদের আছে। শুধু সহ্য করা নয়, হাসিতে হাসিতে সহ্য করিতে পারে, নির্ধাতন—তাও সহ্য করিতে পারে। শ্রীমন্তের মনে হইত এরাই সত্য দারিদ্র্যকে ভালবাসে। সে ইহাদের মধ্যে গিয়া ইহাদের পানে চাহিয়া থাকিত, অন্তরে অন্তরে কিছু সে

দারিদ্র্যকে ঘৃণাই করিত। সে দারিদ্র্যকে ভালবাসিতে পারে নাই—সে ভাবিত ইহারাও যদি তাহার মত দারিদ্র্যকে ঘৃণা করিত, তবে সে ইহাদের রাজা হইয়া বসিয়া থাকিত।

সেদিন শ্রীমন্ত খাইবার জন্ত সবে চুপে চুপে গিয়া বাড়িতে পা দিয়াছে, এমন সময় এ দুয়ার হইতে বিপিন হাঁকিল—শ্রীমন্ত—শ্রীমন্ত—

শ্রীমন্তের অঙ্গ হিম হইয়া গেল, ঘরের দুয়ারে তালা বন্ধ, ঘরে ঢুকিয়া যে খিল দিবে তাহার উপায় নাই, সমস্ত ক্রোধ গিয়া পড়িল তাহার গিরির উপর, সে থাকিলে ত এ অবস্থায় তাহাকে পড়িতে হইত না!

রোজ রোজ তাহার ষষ্ঠীতলা যাওয়া আজ ঘুচাইতে হইবে; ছেলের অভাবে ত রাজ্যপাট ভাসিয়া গেল—তাই রাজকুমারের কামনায় রাণীর ষষ্ঠীতলায় পূজা—গলায় বোঝাখানেক মাদুলি—

কথাটার মধ্যে আবার একটি স্বপ্ন-কল্পনার খেলা ছিল।

পূজার সামর্থ্য গিরির ছিল না, রাস্তায় বাহির হইবার মত প্রকৃতি বা সাহসও ছিল না, সে মনোমন্দিরেই শিশু-দেবতার অর্চনা করিত আর ওই গলায় ধারণ-করা মাদুলিগুলির ধোয়া জল খাইয়াই ব্রত পালন করিত।

কিন্তু নারী-বন্ধে যে উগ্র গোপন ক্ষুধা অহরহঃ জাগে, সারা মস্তিষ্কে সে ক্ষুধাতৃষ্ণির আকাঙ্ক্ষা নিত্য কত আকাশ-কুসুম রচনা করে। সে কখন তন্দ্রাঘোরে বঞ্চিতা নারীটির সহিত পরিহাস করিয়া গিয়াছিল।

সেদিন গিরি স্বপ্ন দেখিয়াছে যে, সে ষষ্ঠীতলায় পূজা করিতে গিয়াছে, কোথা হইতে একটি দামাল শিশু, মুখে অজস্র লাল গড়াইয়াছে, গায়ে ধূলা—হামা দিয়া আসিয়া ওর ঝাঁচল ধরিয়া খিল্ খিল্ করিয়া হাসিয়া কহিল—মা—ম্—মা—ম্। গিরি ব্যাকুল আগ্রহে হাত পাতিয়া তাহাকে ডাকিল।

ছেলেটির সে কি খল্‌খল্ হাসি! খল্‌খল্ হাসিয়া সেও বাহ বাড়াইয়া গিরির বুক ধরা দিল। তাহাকে বুক ধরিতেই গিরির বুক যেন জুড়াইয়া গেল। কিন্তু ঘুম ভাঙিয়া গিরি দেখে শূন্য শয়্যায় সে মাথার বালিশটিকেই ঝাঁকড়াইয়া ধরিয়া আছে।

সেই অবধি সে নিত্য ষষ্ঠীতলায় যায়। নিজের হাতে পোতা রক্তকরবী গাছটির ফুল, কাজল-দীঘির একটু জল, দুটিখানি আতপ চাল—তার উপর এক ফোঁটা গুড়—এই হইল পূজার সামগ্রী। চাল কয়টি সে বায়ুনবাড়িতে সংগ্রহ করিয়াছে; পোয়াখানেক আতপচাল, তাহাতেই আজও চলিয়াছে, আর খানিকটা গুড়—তাও ভিক্ষালব্ধ।

গিরি সেই ষষ্ঠীতলায় গিয়াছিল।

কিন্তু উত্তর না পাইয়া বিপিন আজ কিরিয়া গেল না, সে বাড়ির ভিতরে প্রবেশ করিয়া শ্রীমন্তকে দেখিয়া ফেলিল, কহিল—এই যে, আচ্ছা জুয়াচোর ত রে তুই শ্রীমন্ত!

শ্রীমন্ত উত্তর দিতে পারিল না। আর কি-ই বা উত্তর দিবে?

বিপিনের জিহবা দিয়া যে কটু বিষ ঝরিল, বিষধরেরও বোধ করি তত বিষ লঙ্কিত থাকে না।

সে কহিল—কথা ক'স না যে ?

শ্রীমন্তের নীরব সহিষ্ণুতাও তাহার সম্বন্ধ হইতেছিল না ।

শ্রীমন্ত অতি কষ্টে কহিল—কি আর বলব দাদা—

—টাকা দিবি কিনা ?

—দেব ।

—দে, তবে দে, এখনি দে ।

—এখনি কোথায় পাব ?

বিপিন কহিল—কোথায় পাবি তা আমি কি জানি রে শালা—ঘটি বাটি বেচ্, না থাকে পরিবার বাঁধা দে—

এক মুহূর্তে শ্রীমন্তের অদ্ভুত পরিবর্তন হইয়া গেল । মাহুষ একেবারে মরিয়া যায় না । ইচ্ছান্তের উপর ঘা পড়িলে মাহুষের তা সয় না—এখানে সে মরীয়া হইয়া উঠে, এটা পশুরও আছে—শ্রীমন্ত ত মাহুষ ! নত মাথাটা শ্রীমন্তের খাড়া হইয়া উঠিল, দেহের শক্তির দস্তে যে হাঁক সে দিল তাহাতেই বিপিনের হইয়া গেল ! শ্রীমন্তের দেহের শক্তির কথাও তাহার না-জানা নয় । তাহার পা দুইটা ঠক ঠক করিয়া কাঁপিয়া মুখ চোখ কেমন হইয়া গেল । বেচারী এক পা এক পা করিয়া পিছাইয়া কোনক্রমে শ্রীমন্তের দরজাটা পার হইয়া রাস্তায় পড়িয়াই আপন ঘরমুখে দৌড় মারিল । আপন বাড়ির দুয়ারে গিয়া তবে সে পিছন ফিরিয়া দেখিল, শ্রীমন্ত কত দূরে !

সেইখানেই দাঁত-মুখ খিঁচাইয়া কি কতকণ্ডলা বলিয়া তবে সে ঘরে ঢুকিল ।

শ্রীমন্তের আজ আর হাসি আসিল না—ক্রোধে সে ফুলিতেছিল । কিন্তু তবুও মনটা কেমন করিতেছিল । সামান্য খানিকটা অস্বস্তি—বিপিন যদি আবার নালিশ করে । বসিয়া থাকিতে থাকিতেই আবার একটা পরিবর্তন দরিত্রের মনে ঘটয়া যায় । শ্রীমন্ত ধীরে ধীরে বিপিনের দুয়ারে গিয়া উঠিল, সেই নত ভঙ্গী, বিনীত ভাব । যে শৃঙ্খলিত একটা পশু আত্মবিশ্বস্ত হইয়া মুহূর্তের জন্য হুকুম দিয়া উঠিয়াছিল, কিন্তু শৃঙ্খলের নির্মম নিষ্পেষণে স্বাধু, তরী, অস্থি, চর্ম, মাংস টন টন করিয়া উঠায় দারুণ যাতনায় কুণ্ডলী পাকাইয়া আবার পদলেহন করিতে জিত বাহির করিয়া হা হা করিতেছে ।

বিপিনের দুয়ারে গিয়া বিনীত কণ্ঠে সে হাঁকিল—বিপিনদাদা, বিপিনদাদা—

বিপিন বন্ধ ঘরের খোলা জানালাটা দিয়া শাসাইল—কাল কৌজদারীতে নালিশ কবব আমি, চিটিং কেস—

শ্রীমন্ত কাকুতিতে কদম্ব তোষামোদের হাসি হাসিয়া কহিল—রাগ করো না দাদা, তুমি রাগ করলে, পায়ে ধরচি দাদা ।

বিপিন চুপ করিয়া থাকে, মুহূর্ত-পূর্বের দুর্দান্ত শত্রুর পদলেহন মন্দ ঠেকে না, বেশ মুখরোচকই বোধ হয় ।

বিপিনের নীরবতার শ্রীমন্ত সাহস পাইয়া একটু মুখর হইয়া উঠে, অনর্গল চাটুবাঁকা উলঙ্গ

করিয়া যায়। বিপিনও আর প্রশ্ন না হইয়া পারে না; সে দরজাটা খুলিয়া কহিল—আয়, ভেতরে এসে বোস, অনেকদিন একসঙ্গে থাই নাই, চান করবার আগে—নে একবার তৈরি কর।

সে গাঁজার সরঞ্জাম পাড়িয়া আনিল। শ্রীমন্ত গাঁজা টিপিতে টিপিতে বলিল—তোমাদের সেই লাল বলদটা মনে পড়ে বিপিনদা, ওঃ অমন বলদ কিন্তু গায়ে কারু ছিল না বাপু।

—তার চেয়েও ভাল বলদ করেছি আমি এখন, একটা সাদা আর একটা কালো।

শ্রীমন্ত কহিল—বটে বটে, সেদিন দেখলাম বটে মাঠে চরছিল, তা তাবলাম ভিন্‌গায়ের কারও, তা সে গরু তোমার? এ তল্লাটে অমনটি কারও নেই।

বিপিন গাঁজা থাইতে থাইতে কহিল—তুই আসিস না কেন? এ ত খেতেই হয়, আমার কাছে এলেই হয়।

শ্রীমন্ত কেমন করিয়া বিপিনকে আপ্যায়িত করিবে খুঁজিয়াই পায় না, শেষে কহে—আচ্ছা তুমি আমার বাড়ি ঢোক না কেন? বার থেকেই ছিমস্তে বলে চলে এস। বেরিয়ে আসতে আসতে দেখি চ'লে গিয়েছ। ও বৌ বুঝি বেরোয় না? বৌটা ভারি পাজি। দাদা বললেই বুঝি দাদা হয়? বঙ্কলোক তুমি—যেয়ো ত তুমি—কেমন না বেরোয় দেখব আমি। বলে—গী-স্ববাদে মূর্চামিলে মামা; ; যেয়ো ত, যেয়ো ত দাদা—আমার দিবি।

শ্রীমন্ত চলিয়া যাইতেছিল, বিপিন কহিল—ওরে শ্রীমন্ত, দাঁড়া, একটা লাউ নিয়ে যা, যেনা লাউ হয়েছে আমার।

শ্রীমন্ত দাঁড়াইয়া বিপিনের হৃন্দর পরিপাটি ঘর-দুয়ারের পানে চাহিয়া দেখে। চারিদিকে শ্রী যেন বলমল করিতেছে। এদিকে কয়টা ধানের গোলা। ওদিকে হুটপুটাকী কয়টি গাভী, পরিষ্কার পরিচ্ছন্ন চারিদিক। শ্রীমন্তের বুক দিয়া একটা হিংসাকাতর দীর্ঘশ্বাস করিয়া পড়ে। বিপিন তাহাকে শুধু একটা লাউ নয়, আরও কতকগুলো তরকারী দিল।

যাইতে যাইতে আবার নিজে ফিরিয়া শ্রীমন্ত কহিল, বলতে লজ্জা হচ্ছে দাদা, আট আনা পয়সা দিতে যদি, আর শলিখানেক চাল—

বিপিন কহিল—বোস।

শ্রীমন্ত বলিল। একাকী বসিয়া চারিদিক দেখিতে দেখিতে তাহার ইচ্ছা হইতেছিল—বিপিনকে সে খুন করিয়া ফেলে।

*

*

*

ঘরে ফিরিয়া শ্রীমন্ত পয়সা চাল তরকারি নাড়িতে নাড়িতে বেশ যত্ন যত্ন হাসিল—জ্বর, নিষ্ঠুর, হিম-শীতল হাসি। বোধ করি অবস্থাপন্ন লচ্ছল বিপিনকে বঞ্চনা করিয়াই এ হাসিটুকু পাইয়াছে; ইহার মধ্যে দরিদ্র শ্রীমন্ত ধনীকে ঘৃণা করিতে শিখিয়াছে, ধনকে ভালবাসিয়াছে!

এই সময় ও-দরজা দিয়া প্রবেশ করিল গিরি। গিরির উপর তখন আর তাহার ক্রোধ ছিল না; তাহার চকিত দৃষ্টি গিয়া পড়িয়াছিল আপন শ্রীহীন ঘরের উপর। ঘরখানায় মূর্তি-মন্ত দৈন্ত যেন বাসা গাড়িয়াছে; সর্ব অঙ্গ তাহার ঘিন্‌ ঘিন্‌ করিয়া উঠিল। স্বখহীন—কদ্ব—কুশী—সব!

গিরি ঘরে ঢুকিয়াই স্বামীকে দেখিয়া কহিল—পুরুষ জাতের মুখে বাঁটা, ঘেরা ঘরে গেল, টাকার জন্তে এরা না পারে কি, মা গো মা !

শ্রীমন্ত কোন উত্তর করিল না, শুধু গিরির মুখপানে চাহিয়া আপনার জীবনের বন্ধনার কথাই ভাবিতেছিল।

গিরি বলিয়াই গেল শুধু আমাদের হরিলালের দোষ কি, ওপাড়ার হরিশ পাল গো, গিয়েছিলাম বষ্টীতলা, শুনে এলাম মেয়ের বিয়ে দিচ্ছে একজননা কুষ্ঠর্যাধি হয়েছে তার সঙ্গে, টাকা পাবে নাকি অনেক।

শ্রীমন্ত চকিত হইয়া কহিল—কত টাকা পাচ্ছে ?

—আড়াইশো টাকা।

শ্রীমন্ত একটা দীর্ঘশ্বাস ফেলিল।

গিরি কহিল—কলির চারপো পুরো হ'ল। বলিয়া বষ্টীর প্রসাদ একটা আতপকণা তুলিতে ব্যস্ত হইল।

সহসা শ্রীমন্ত কটুকণ্ঠে কহিয়া উঠিল—যেমন কপাল আমার, বিয়ে করলাম তা বাজা, একটা মেয়ে থাকলে ত আজ এ আড়াইশো টাকা ঘরে আসত।

গিরির নখের কোণে তোলা আতপকণাটি খসিয়া পড়িয়া গেল। সে বজ্রাহতার মত স্বামীর মুখপানে চাহিল, দেখিল সহজ স্বাভাবিক মুখভঙ্গী স্বামীর, কোথাও এতটুকু একটা রেখার বিকৃতির মাঝে প্রচ্ছন্ন ব্যথার কোন রেশ নাই। অতি সরল ভাবেই সহজ কথাটি যেন সে কহিয়াছে।

খানিকটা সময় গিরির কোন বাক্য সরিল না, দেহখানা নড়িল না, সে ঠিক তেমনি ভাবেই দাঁড়াইয়া রহিল। বহুক্ষণ পর একটা দীর্ঘশ্বাসের সঙ্গে তাহার মুখ ফিরিয়া আসিল। সে কোন কথা না কহিয়া আপন মনে গলার মাড়ুলির গোছাটা পটু করিয়া ছিঁড়িয়া ফেলিল ও সন্ত পূজা করা বষ্টীর কোঁটা-বাটা নির্মালাগুলি লইয়া থিড়কির ঘাটে বাহির হইয়া গেল।

বারো

এতখানি বিয়োগান্ত করিয়া ছুটি যদি দুঃখী নর-নারীর জীবনের জমা-খরচের পাতার শেষে সেই অদৃশ্য হিসাবী দাঁড়ি টানিয়া হিসাবটা শেষ করিয়া দিতেন, তবে বোধ হয় ছিল ভাল। কিন্তু এইখানেই শেষ হইল না।

গিরিকেও জীবনের জের টানিতে হইল, শ্রীমন্তকেও।

শ্রীমন্ত খাইয়া-দাইয়া সন্ধ্যায় ভাবিতেছিল মামলার কথা। কাল মামলার শেষ দিন।

বিপিন আসিয়া ডাকিল—শ্রীমন্ত !

শ্রীমন্ত ব্যস্ত হইয়া ডাকিল—এস, এস—দাদা এস !

বিপিন আসিল, হাতে এক ঠোঙা খাবার।

এই অল্প সময়টুকুর মধ্যে চক্ষুর অগোচরে একটা ব্যাপার ঘটিয়া গিয়াছে।

ঘটনাটা ঘটিয়াছিল দ্বিপ্রহরে, গিরি যখন ষষ্ঠীর কোঁটা-বাটা লইয়া থিড়কির ঘাটে গেল। থিড়কির পুকুরটি একটি ছোট এঁদো ডোবা; ওখানে বাসন মাজাই হয়, মেয়েরা স্নান কেহ বড় করে না। গিরি ঘাটে গিয়াই হাতের সেই ছেঁড়া মাছলিগুলি আর ষষ্ঠীর কোঁটা-বাটা মুহূর্ত দ্বিধা না করিয়া জলে ফেলিয়া দিল। শ্রীমন্তের এই কথার পর বোধ করি কোন জননীই এ ছাড়া আর কিছু করিতে পারিত না, গিরিও পারিল না।

কয় ফোঁটা জলও চোখ দিয়া ওই ডোবার জলে ঝরিয়া পড়িল। গিরি হাত-পা ধুইয়া ফিরিতেছিল, কিন্তু মনে হইল যদি দেবতার কোন প্রসাদ তাহার এই অভাগা অঙ্গে কোথাও আজ লাগিয়া থাকে, যদি তাহারই জন্ত কোন ভাগ্যহীন শিশু-দেবতাকে তাহার মন্দিরে আসিতে হয়—আর এই কামনা, কামনা করিতে হয় যেমন স্নান করিয়া—ত্যাগও হয়ত করিতে হয় তেমনি স্নান করিয়া। এমনি একটা বিপর্যস্ত বিহ্বল মন লইয়া সে ওই ডোবার জলে নামিয়া পড়িল। গায়ের কাপড়খানা পূর্ণভাবে মুক্ত করিয়া সে স্নান করিয়া ফেলিল। ওই ক্লোন্ত জলে দেহটা সিক্ত করিয়া, সন্তান-বিয়োগের অন্তি অঙ্গে মাখিয়াই যেন সে ঘরে ফিরিল।

ডোবাটার চারিপাশে ঘন অতি নিবিড় বাঁশের বন। তাহারই ফাঁকে ফাঁকে সংকীর্ণ ঘাট-গুলি জলে নামিয়াছে। ঘাটের গোড়ায় নামিলে বড় কেহ কাহাকেও দেখিতে পায় না, কিন্তু অন্ধকারে বাঁশের ঝাড়ের ফাঁক দিয়া ডোবাটির মধ্যস্থল বেশ দেখা যায়। শ্রীমন্তের ঘাটের পাশেই বিপিনের ঘাট। বিপিন নামিয়াছিল ঘাটে। গভীর জলের জন্ত গিরিকে ডোবাটার প্রায় মধ্যস্থল পর্যন্ত নামিতে হইয়াছিল, মধ্যজলে আত্মহার্য গিরি অটুট র্যোবন-সন্তার মুক্ত করিয়া তখন সেই মুক্তি-কামনার পরিস্ফুটন করিতেছিল।

বিপিনের চোখে পড়িল সেই রূপ! এলানো দীর্ঘ কেশভার, মাজা রং-এ নিটোল পরিপূর্ণ র্যোবন, সুসন্নিবিষ্ট সূক্ষ্ম প্রতি অঙ্গ—পুরুষকে চঞ্চল করিবার মত বটে। বিপিন উন্নত হইয়া উঠিল। বাকি বেলাটায় আসিবার জন্ত সে দশটার পথে নামিয়াছে, দশবার ফিরিয়াছে। আসিলে শ্রীমন্ত কিছু মনে করিত না; কিন্তু দুর্বল মন বলিয়া বিপিনের কেবলই মনে হইয়াছে, শ্রীমন্ত ধরিয়া ফেলিবে হয়ত। অবশেষে সন্ধ্যার সময় শ্রীমন্তের নিমন্ত্রণ আশ্রয় করিয়া সে আসিল, আসিতে আসিতে আবার ফিরিয়া এই খাবার কিনিয়া আনিল। সে থাইলেও বিপিনের তৃপ্তি, শ্রীমন্ত যা খাওয়ায় সে ত জানে, হয়ত সব দিন দুই বেলা থাইতেই পায় না।

ঠোঙাটা শ্রীমন্তের হাতে দিয়া কহিল—নে—নিয়ে এলাম।

শ্রীমন্তও বিস্মিত হইয়া গেল, সে কহিল—খাবার?

কৈফিয়ৎ দেখিয়া কঠিন, বিশেষ ওই উগ্র পশুটার বিবরে বসিয়া।

বিপিন একটু ইতস্ততঃ করিয়া কহিল—মাল খেয়ে খাব—নে রাখ না।

শ্রীমন্ত পাশেই ঠোঙাটা রাখিয়া দিল। বিপিন চটিয়া গেল, হতভাগা রাক্ষস ভাতাই হয়ত

সবই গিলিয়া ফেলিবে! সে কহিল—কিন্তু কি আবাও রে তুই, সে-ই ছিমস্ত এখনো আছিল? খাবার দিয়ে আয়, একটা বসবার কিছু নিয়ে আয়—আলো আন, জমিয়ে বসা যাক একটু, না—কি? এই বুঝি তোর আসতে বলা!

শ্রীমন্ত মুগ্ধ হইয়া গেল, বিশ্বের উপরে বিশ্বাস, প্রাণ দিন দিন সে হারাইয়া ফেলিতেছিল, কিন্তু আজ বাল্যসাথীর এ ব্যবহারে মুগ্ধ না হইয়া সে পারিল না। সে তাড়াতাড়ি আসিয়া খাবারের ঠোঙাটা লইয়া গিরিকে ডাকিল—রাখ ত। বাল্যকালের বন্ধু হাজার হোক—দেখছ ত—

গিরি উনানে আগুন দিতেছিল, মন ভাল ছিল না। সারাক্ষণ বৃকের তিতর বিসর্জনের বৈরাগী স্বর বাজিতেছিল। কিন্তু ঘরে আজ বিপিনের দেওয়া চাল ছিল, তরকারী ছিল; আর তা ছাড়া তাহার মনের অবস্থায় মাষুধ কিছুই প্রত্যাখ্যান করে না, কোন কিছু অমাগ্ণও করে না। এ অবস্থায় আপনাকে কষ্ট দিয়াও প্রত্যেক কার্যটি নীরবে করিয়া যাওয়াই স্বাভাবিক। এটা বোধ হয় অভিমান, শীতল অভিমান।

গিরি বিনা বাক্যব্যয়ে ঠোঙাটি হাতে লইয়া কহিল—কি করব?

—দুটো কিছুতে কতক সাজিয়ে দাও—আর দুটো গেলাসে, গেলাস বুঝি মোটে একটা আছে—তা ঘটিতে করে জল আর গেলাসটা ধুয়ে দাও—কতকগুলো রেখে দাও।

শেষ কথাটা সে চাপিয়া বলিল।

ওদিক হইতে বিপিন কহিল—আমাকে ভাই অতি অল্প দিও—গুনে দুটি—অথলে মরে যাচ্ছি—খবরদার দুটির বেশী নয়।

শ্রীমন্ত বলিল—তবে এক কাজ কর, অল্প অল্প দুটো জায়গায় দিয়ে বাকি রেখে দাও। আর এক কাজ কর দেখি, একটু জল চড়িয়ে দাও,—চা হোক, বিপিনদা—চা খাবে ত, চা?

বিপিন কহিল—তা মন্দ কি!

শ্রীমন্ত বলিল—তুমি জল চড়িয়ে দাও, আমি চা আনি।

—হ্যাঁ, একটা কিছু দাও দেখি বসতে—এ চটটা, তা বেশ হবে। একটা আলো—আলো বুঝি আর নাই—তাই ত—তা ওইটাই দাও।

আলোটা নামাইয়া চটটা পাড়িয়া শ্রীমন্ত কহিল—তুমি ছ’মিনিট বস ত ভাই, মালটাল বের কর, আমি চা আর চিনি নিয়ে আসি।

বিপিন আপত্তি করিল না, এমন নির্জন মুহূর্ত তাহার অন্তরও কামনা করিতেছিল—যদি একটা কথা কহিবার সুযোগ পাওয়া যায়!

শ্রীমন্ত চলিয়া গেল, বিপিন গাঁজা বাহির করিতে পকেটে হাত দিয়াই ভাবিতে লাগিল—একটি কথা, কি একটি কথা যা ঐ স্কন্দরীর মনস্তত্ত্ব করিয়া শোভন ভাবে কওয়া যায়।

গিরি উনান জালিয়া জল গরম করিতেছিল। আলো ছিল না, ঐ উনানের বহ্নি-শিখাতেই গিরির মুখের একপাশ দেখা যাইতেছিল। ব্যথিত স্নান দৃষ্টি, চুল তখনো এলানো, কয়টা চুলের গোছা কপালের উপর পড়িয়াছে, সেগুলো ওই আগুনের শিখাতাড়নে তপ্ত বায়ুপ্রবাহে নাচিতেছিল।

বিপিন সহসা কহিল—আলোটা নিয়ে যাও, অহুবিধা হচ্ছে—কোন দরকার নাই আমাদের—নিয়ে যাও ।

কিন্তু লইয়া কেহ গেল না । বিপিন আর কিছু বলিতে সাহস করিল না ।

শ্রীমন্ত ফিরিয়া কহিল—দেরি বেশি হয় নি আমার, আমি দৌড়ে এসেছি । কই মাল বেয় কর নি এখনও ?

—এই যে, বলিয়া বিপিন সব সরঞ্জাম বাহির করিয়া বসিল ।

শ্রীমন্ত চা চিনি দিয়া গিরিকে কহিল—চা কর ।

চা করিতে করিতে অন্ধকারে খানিকটা চা নিজের হাতের উপর পড়িতেই গিরি ‘উঃ’ করিয়া উঠিল ।

শ্রীমন্ত ধমক দিয়া কহিল—আচ্ছা অকস্মা তুমি, চা-টা ফেলে—উঃ ! বলিয়া শেষটায় ভ্যাঙাইয়া উঠিল ।

বিপিন ব্যস্ত হইয়া কহিল—হাত বোধ হয় পুড়ে গিয়েছে, আহা ! তুই একটা জানোয়ার রে । একটু নারকেল তেল চুনের জলে বা আলু বেটে—

শ্রীমন্ত কহিল—কিছু করতে হবে না দাদা, গরম চা মুখে সয় তা আর হাতে সইবে না ?

যাই হোক চা খাইয়া, গাঁজা টানিয়া, আড্ডা জমাইয়া বহু চেষ্টা করিয়া বিপিন উঠিল, কহিল—তা হ’লে উঠি, কালকে মামলার দিন ? আচ্ছা সন্ধ্যায় এসে শুনব কি হয় ।

বিপিন বাড়ির বাহির হইয়াও চলিয়া গেল না ; রাস্তায় দাঁড়াইয়া রহিল । একটা কথা শোভনভাবে মনস্তষ্টি করিয়া বলিতে পারে নাই সে ; তখনও সে সেই কথাই ভাবিতেছিল ।

গিরি তখন শ্রীমন্তকে কহিতেছিল—কালই কি মামলা শেষ হবে ?

শ্রীমন্ত কহিল—হ্যাঁ ।

—কি হবে ? বিপদের উদ্বেগে অভিমান কোথায় গেছে তাহার ।

শ্রীমন্ত কহিল—কি হবে, সে ত ভগবান জানেন, কিন্তু খরচ নাই । কাল যদি আর উকীল না দিতে পারি তবে সব মিছে ।

—একবার ওকে বলে দেখলে না কেন ?

একটা দীর্ঘনিশ্বাস ফেলিয়া শ্রীমন্ত কহিল—তা হতো ।

বাহিরে বিপিনের মন নাচিয়া উঠিল, গিরির মনস্তষ্টি সে করিতে পারে, সে পুনরায় হাঁকিল—শ্রীমন্ত !

—কে, দাদা ?

—হ্যাঁ রে, ফিরে এলাম আবার, একটা কথা শুধোব কিছু মনে করিস্ না ভাই, কাল মামলার খরচাপাতি—

শ্রীমন্ত উচ্ছ্বাসভরে কহিল, কোথায় পাব ভাই ?

—আচ্ছা কাল সকালে আমার কাছ হয়ে যাস্ বুঝলি, মামলা জিতে কিন্তু সন্দেশ আনতে হবে ।

বিপিন হাসিতে হাসিতে বাহিরে চলিয়া গেল।

গিরি কহিল, বড় ভাল লোক বাপু।

বাহিরে বিপিনের বুকটা নাচিয়া উঠিল, সেই আনন্দটুকু সঞ্চল করিয়া বাড়ি চলিয়া গেল।

শ্রীমন্তু খাইয়া উঠিলে গিরি সমস্ত সামলাইয়া ফেলিল। শ্রীমন্তু কহিল—তুমি খাবে না?

—না।

—ও, আজ বুঝি বটী পূজা করেছ, তা এক কাজ কর, ওই ত মেলা খাবার রয়েছে, খাও।

গিরির চোখের জল আর বাঁধ মানিতেছিল না, সে মুখ কিরাইয়া কোনরূপে কহিল—না।

শ্রীমন্তু গিরির হাত ধরিয়া কহিল—রাগ করেছ?

গিরি একবার হাতটা টানিয়া তারপর স্থির ভাবেই শ্রীমন্তুর মুখের পানে চাহিয়া একটু হাসিল মাত্র। সে যে কি হাসি তাহা শ্রীমন্তু বুঝিল না, সে গিরির হাত ছাড়িয়া দিল। তাহার মনে হইল এর চেয়ে গিরি কাঁদিলে ভাল হইত, শাস্তনা দিয়া অভিমানটা ভাঙানো যাইত।

তেরো

পরদিন শ্রীমন্তু সদরে গেল, গিরি উদ্বেগ-রুদ্ধ বৃকে বসিয়া রহিল। হাঁড়ির ভাত হাঁড়িতে রহিল, খাওয়া হইল না, কিন্তু ক্ষুধা ছিল। আগের দিনটাও উপবাসে গিয়াছে, ক্ষুধা নির্মমভাবে পাকস্থলীতে পীড়ন করিতেছিল, কিন্তু মুখে তাহার কিছুই রচিল না। এক ঘটি জল ঢুক ঢুক শব্দে মুখে ঢালিয়া পেটের আগুনে যেন সে জল দিতে চাহিল।

কিন্তু জলের বৃকের মাঝেও যে আগুন জলে! বৃকের মাঝে অস্বস্থতার চেয়েও অস্বস্থ একটা অস্থিরতায় জীবন যেন তাহার কণ্ঠনালীতে ঠেলিয়া উঠিয়া আসিয়াছে। হাত পা অনর্গল ঘামিয়া ঘামিয়া ঠাণ্ডা হিম হইয়া গিয়াছে; পেটের মধ্যে আগুন জলিতেছে। একটা আশার কথা বলিবার কেহ নাই। পাড়ার লোকে, দিনের পর দিন পড়ায় শ্রীমন্তুর মামলার দিনের হিসাব রাখা ছাড়িয়াই দিয়াছিল। তাহার মামলা-অস্ত্রে শ্রীমন্তুর মুখে জয়-বার্তা বা গিরির করুণ আর্তনাদে তাহার বন্ধন-দশার কথা জানিবার প্রত্যাশায় ছিল।

আসিল একজন—সে বিপিন। বেলা দুই প্রহরের সময় সে ‘শ্রীমন্তু’ বলিয়া একেবারে বাড়ির ভিতরে আসিয়া প্রবেশ করিল। গিরি খুঁটিতে ঠেস দিয়া বসিয়া ছিল, অঙ্গ-বাস্থানি বেশ ভালভাবেই জড়ানো ছিল, কিন্তু মুখ অনবগুপ্তিত। বিপিনকে দেখিয়া সে নড়িবার চেষ্টা করিল, কিন্তু পারিল না। অনাহারে, দুর্বলতায়, না মনের পন্থেয়ের জগু কে জানে!

বিপিনেরই লজ্জা হইল, সে আসিয়াছিল শ্রীমন্তু নাই জানিয়াই, আর এমনি অতর্কিত মুহূর্তে হয়ত গিরির একটি অস্বস্থ, অবস্থা দেখিতে পাইবে আশা করিয়াই। কিন্তু তাহার কল্পনায় ছিল—গিরি তাহাকে দেখিয়া আপন অস্বস্থ অবস্থা সংযত সঙ্কট করিতে বেশ একটু সলজ্জ চকল হইয়া উঠিবে, হয়ত বা একটুখানি জিত কাটয়া ফেলিবে, আর সেই স্বলংবন্ধ ছোট ছোট

দাঁতগুলির শ্রেণী বহিয়া ঠোঁটের কোণ দুটি পর্যন্ত বিস্তৃত একটি লজ্জার হাসির রেখাও চকিতেই মধ্যে চপলার মত দেখা যাইবে। কিন্তু কিছুই গেল না—গেল শুধু তাহার অসম্বৃত অবস্থাই দেখা, সে অবস্থা অচঞ্চল, তাহার মধ্যে একটা পীড়িত ভাব, সে ভাবে মানুষ কখনও স্থখী হইতে পারে না।

বিপিন চলিয়া গেল।

আবার ঘণ্টা দুই পরে আসিল। এবার সে বেশ করিয়া সাড়া দিয়া আসিল, গিরি যাহাতে চকিত হইয়া উঠে। কিন্তু এবারও দেখিল সেই ভাবে গিরি বসিয়া। বিপিন অবাক হইয়া গেল, পরক্ষণেই মনে হইল, সত্যই অস্বস্থ নয় ত! কিন্তু অস্বস্থ হইলেও নারী লজ্জার সংজ্ঞা হারায় না। চেতনা আছে ত! বিপিন ওদিকের দাওয়া হইতে উঠানে নামিয়া আসিল, বার দুই গলাটা পরিষ্কার করিবার ভানে জোর সাড়া দিল, কিন্তু গিরি সেই বসিয়াই থাকিল।

বসিয়া থাকিতে থাকিতে একটা তন্ময় অবস্থা গিরির আসিয়াছিল, সকল মানুষেরই আসে, উপবাসের দুর্বলতা, মনের ছুঃখের গভীরতায় অবসাদগ্রস্ত চিত্ত কোন একটা কিছু আশ্রয় করিতে পারিলেই সেইটা লইয়াই তন্ময় হইতে হইতে অর্মান অবস্থায় আসিয়া পৌঁছে। তন্ময়তাও নিদ্রার মত বস্তু; তন্ময়তায় সকল চিন্তা, সকল অস্থিরতা লুপ্ত হইয়া যায়। মন চলিয়া যায় ধ্যানের বস্তুর পানে—বাস্তব জগৎ হইতে দূরে। ঠিক নিদ্রারই মত।

বিপিন নিকটে আসিয়া দাঁড়াইল—তবুও সেই অবস্থা।

এবার বিপিনের ভয় হইল। সে চোখের পানে চাহিয়া দেখিল—গিরি চোখ চাহিয়া আছে, কিন্তু কিছু দেখিতেছে না। বিপিনের পা দুইটা ঠক্ ঠক্ করিয়া কাঁপিয়া কাঁপিয়া উঠিতেছিল, বুকের মধ্যে হৃদপিণ্ড চলিতেছিল অসম্ভব জোরে।

সে হাঁটুর উপর দুটি হাত দিয়া হেঁট হইয়া একটু দূর হইতে ভাল করিয়া গিরির চোখের দৃষ্টির অবস্থা পরীক্ষা করিতে চাহিল; ঠিক সেই মুহূর্তেই একটা হুমান বিপুল শব্দে ঘরখানার মাথায় ঝাঁপাইয়া পড়িল। ওই বিপুল শব্দটা ধ্যানস্থার স্বদূর মনকে যেন ডাকিয়া ফিরাইল। গিরি চমকিয়া উঠিল এবং ঐ অবস্থায় বিপিনকে দেখিয়া, পায়ের গোড়ায় সাপ দেখিলে লোকে যেমন চমকিয়া পিছাইয়া যায়, তেমন ভাবেই পিছাইয়া গিয়া বারান্দার এক কোণে বিক্ষারিত নেত্রে বিপিনের পানে চাহিয়া হাঁপাইতে লাগল।

এমন অবস্থায় যে কেহ আরামের একটা নিঃশ্বাস ফেলিয়া হয়ত বলিয়া উঠিত—আঃ বাঁচলাম!

কিন্তু বিপিন কিছুতেই তাহা পারিল না, সে ত্রস্তপদে পলাইয়া গিয়া যেন বাঁচিল। তারপর বিপিন বাড়িতে আসিয়া দাওয়াতে বসিয়া আপনাকে ধিক্কার দিল, হাস্য করিলাম কি, মনের পাপেই মরিলাম। শ্রীমন্ত আসিলেই ত গিরি বলিয়া দিবে। বিপিনের বুকখানা শুবু শুবু করিয়া উঠিল—হৃদগন্ত শ্রীমন্ত সেদিন একটা কথাতেই খুন করিতে উঠিয়াছিল—আজ! তাহার মুখ শুকাইয়া গেল, বেচারী বিনা কাজে অবেলায় মাঠপানে চলিল।

মাঠে মাঠে ঘুরিয়া নদীর ধারে এক স্থানে বসিয়া একবার গাঁজা খাইয়া সে যখন বাড়ি

ফিরিল তখন সন্ধ্যা হয়-হয়। আপন দাওয়াতে পা দিয়াই শুনিল শ্রীমন্তের বাড়িতে কতকগুলি লোকের গলা শুনা যাইতেছে। বিপিনের কিঞ্চিৎ স্বস্থ প্রাণ আবার কণ্ঠাগত হইয়া উঠিল; তবে ত শ্রীমন্ত ফিরিয়া গিরির মুখে সব শুনিয়া গোলযোগ বাধাইয়াছে, আর লোকজন বোধ হয় শাস্ত করিতেছে। ই্যা, শাস্ত করিতেছে, না, তাহার মাথা খাইতেছে, বোধ হয় তাহারই বিরুদ্ধে চুকলামি করিয়া জানোয়ারটাকে ক্ষাপাইয়া তুলিতেছে।

সে ধীরে ধীরে মৃদু পদক্ষেপে আপন গৃহে প্রবেশ করিবার জন্য সব পা উঠাইয়াছে, এমন সময় রাস্তা হইতে কে কহিল—এই যে, বিপিন না?

—কে? বিপিন অকারণে অসম্ভব রকম চমকিয়া উঠিল, লোকটা তাহা গ্রাহ করিল না, সে কহিল—শুনেছ?

বিপিনের শব্দ বাড়িয়া গেল, সে অসম্ভব রকমের বিরক্তি প্রকাশ করিয়া কহিল—ও সব শুনাশুনি কি? যত সব মিছে।—

লোকটা কহিল—কি রকম? আমি শ্রীমন্তের বাড়িতে শুনলাম—।

বিপিন খিঁচাইয়া উঠিল—শুনলে তা কি হবে কি? তাই বিশ্বাস করে বসে থাক।

লোকটা বিস্মিত হইয়া কহিল—আরে তোমার হ'ল কি?

—হবে আবার কি? ই্যা, ইয়ে হয়েছে, আমার বড় মাথা ধরেচে।

—তা হলেও তোমার যাওয়া উচিত, সবাই তোমায় খুঁজছিল।

—কি আমায় উচিত দেখাও হে কটাহরি, আর সবাই বা কি ধার ধারি আমি? কে আমার কি—

—আরে তুমি এত চটছ কেন? সে যাবার সময় তোমার কথাই দশবার করে বলে গিয়েছে, বিপিনদাকে বলো, বিপিনদাকে বলো—তা এতে—

বিপিনের সংবাদের স্বর ফিরিয়া গেল। সে তাহার মুখের কথা লুফিয়া লইয়া কহিল—কি ব্যাপারটা বল দেখি?

—শ্রীমন্তের পাঁচ বছর জেল হয়েছে—

—এ্যা বলো কি? হরি, হরি, হরি—

বিপিন রাস্তায় নামিয়া পড়িয়া শ্রীমন্তের বাড়ির পথ ধরিল। বক্তা কটাহরি বেশ একটু বিস্মিত হইয়াই আপন পথে চলিয়া গেল। শ্রীমন্তের বাড়িতে তখনও গোলযোগ মেটে নাই। শ্রীমন্তের সঙ্গে গিয়াছিল বেহারী বাঙ্গী ওস্তাদের তাইপো পাঁচু—সেই আসিয়া খবর দিয়াছে।

সে বর্ণনা করিতেছিল আর পাঁচ-সাতজন শুনিয়া সহানুভূতি প্রকাশ করিতেছিল।

পাঁচু বলিতেছিল, তা মরদ বলতে হবে ছিমস্তকে, একফোটা জল মাটিতে ফেলে নাই সে। যেমন লাঠি ধরে ময়দেয় কাজ করেছে, তেমনি মরদের মতই ঝেলে গিয়েছে সে। একবার শুধু ওপর পানে হাত দেখিয়ে বললে—‘ও বিচার ত এখানে হ'ল না—হবে ওইখানে—মাস্তবের বিচার মাস্তবে কি করতে পারে?’ তা সে হাকিমের মুখের ছামুতেই।

একজন কহিল—নাঃ—মরদ বটে শ্রীমন্ত, সে গায়ের সামর্থ্যেই কি, আর কলিজাতেই বা কি?

পাঁচুর কথা তখনও ফুরায় না। সে ছোট জাত, তাহাদের ভালবাসাটা বড় তীক্ষ্ণ—বড় গাঢ়। তাহারা শ্রীমন্তকে ভালবাসিয়াছিল তাই তাহার কথার সবগুলি না কহিয়া বোধ করি তাহার আশা মিটিতেছিল না। সে কহিল—আর বললে গোটাকতক কথা নিজের উকীলকে। উকীল বললে—‘কী আর করব বাপু, এ জানা কথা—মামলা তোমার বড় দুর্বল ছিল—তা সাত বছর না হয়ে পাঁচ বছর করেছি এই ঢের।’ তাতেই ছিমস্ত একটুকুন হাসলে। সে হাসি যদি দেখতে! বুঝলে, সেই হাসিতেই উকীলের মাথা হেঁট হয়ে গেল; হেসে ছিমস্ত বললে—‘তাই সাত বছরই আমি খাটতে রাজি আছি উকীলবাবু, ফিসের টাকা কটা ফিরিয়ে দেন দেখি। কেন মিছে আমার সর্বনাশটি কল্লেন বলুন ত?’ তারপর আবার হেসে বললে—‘মিছাই বলা তা জানি, তবু বললাম আপনাকে। কিছু থাকলে ত আর পরিবারটা না থেয়ে মরত না। তা আনা চার পয়সা দেন কেনে, জেল-ফটকে জমা থাকবে, বেরিয়ে দাড়ি কিনে গলায় দোব।’ বলে আবার সেই হাসি।

একজন কহিল—আ-হা ঘা-টা বড় লেগেছে কিনা? মেয়েটাকে মাছুষ কল্লে, তার মেমতা ত সোজা নয়, সেই মেয়ে ধর কেনে পেটের অধিক, তাকে বাঁচাতে গিয়ে—

একজন কহিল—ওই মেয়েটাই অলুক্ষেণে হে, দেখেছ—কটা কটা রং, প্যাজের পাতার মত চুলগুলোমুহুর কটা ছিল, উ ভা-রী খারাপ, রাহুগ্গস্ত না কি বলে বাপু। আমাদের ঐ যে চণ্ডীদাসপুরের রামের মেয়েটা ঠিক অমনি, হ’ল আর বাপকে খেলে। তারপর জমিজেরাত—পিটিলী গুলতে এক কাঠা রইল না।

বিপিন পাঁচুকে কহিল—বাড়িতে কিছু বলে দেয় নাই?

সে তাহার নিজের কথা শুনিতে চাহিতেছিল।

পাঁচু কহিল—তোমার কথা ত দশবার বলে দিয়েছে। বললে, ‘পাঁচু—কি আর বলে যাব ভাই, দেখিস তোরা, বোঁটা রইল, যেন না খেয়ে মরে না।’ আবার হেসে বললে,—‘তোরাই পাস না খেতে ত পরের ভার কেনে দিই, তোরা বিপদে-আপদে দেখিস। আর বিপিনদাকে বলিস—পারে ত ধানটান ভানিয়ে হু’মুঠো খেতে যাতে পায় বোঁটা তাই যেন করে।’ আবার একবার বললে—‘বিপিনদাকে বলিস—যদি বেঁচে থাকি, আর জেল থেকে বেরিয়ে যদি দিন পাই তবে তার দেনা আমি শোধ করব, তার টাকা আমি মারব না।’ আর বললে—‘গায়ে সবাই কিছু কিছু পাবে, তা বলিস যেন আমাকে শাপ-শাপান্ত করেই মাপ দেয়, বোঁটাকে আর কেউ কিছু না বলে।’ আমি বললাম—‘বোঁকে কিছু বলবে?’ বললে—‘কি বলব? বলিস তার অদেষ্ট আর আমার অদেষ্ট। আর তাকে কিছু বলব না, থেকেও ত স্থখ কখনও দিতে পারি নাই, তবে সে আমাকে দুঃখও কখনও দেয় নাই।’

সহসা নারী-কণ্ঠের মর্মফাটা কান্নার একটুখানি ধ্বনি মুহূর্তের জন্ত উঠিয়াই নীরব হইয়া গেল। সকলের দৃষ্টি পড়িল ও-ঘরের দাওয়ার উপর—গিরি উপুড় হইয়া পড়িয়া আছে, আপাদমস্তক আবৃত, দেহখানা ঘন ঘন কম্পিত হইতেছে। সকলেই বুঝিল হতভাগীর বুক ফাটিয়া যাইতেছে—এক মুহূর্তের জন্ত নারীধৈর্যের সীমা টুটিয়া মুখও ফুটিয়াছিল।

পাঁচু কহিল—না, না আর নয়, চল সব, একটুকুন কাঁচুক ও ডাক ছেড়ে, কি বল মোটা মোড়ল ? বলিয়া বিপিনের মুখপানে চাহিল।

বিপিনও তাড়াতাড়ি কহিল—হ্যাঁ হ্যাঁ, চল সব চল ; আ-হা-হা অবলা। পাঁচু, বলে দে দোর-টোরগুলো দিতে।

পাঁচু কহিল—না, মাকে আমার পাঠিয়ে দোব, সে দিবে শোবে। একা কি থাকতে পারে বো-মাছ !

বিপিনের কেমন কথাটা মনোমত হইল না—তা আবার পারবে না, কি হয়েছে, নিজেরই ঘর—কতজন! বলে—

পাঁচু কহিল—তা নয়, বলি আজ কি একা থাকতে পারে, না থাকতে দিতে আছে ? বলি মনের বিবাসীতে ত কত রকম করতে পারে ; ঘর, ঘরে দড়িও আছে, পুকুরে জলও আছে।

বিপিন শিহরিয়া কহিল—হ্যাঁ, তা পারে। তাহার চক্ষের উপর স্বামীপরায়ণা বধুটির ধ্যানমগ্না ছবিটি ভাসিতেছিল।

চৌদ্দ

পরদিন প্রাতে পাঁচুর মা ঘাইবার সময় কহিল—বোঁ, তাহ'লে আমি আসি, যদি কিছু কাজ থাকে ত বল করে দিবে ঘাই।

কাজ ! গিরির হাসি আসিল, অপরে তাহার কাজ করিয়া দিবে ! দুর্ভাগ্যের মধ্যে পড়িয়া তাহার কপাল ফিরিয়া গেল যে ! কাজ এখন কত লোকের দ্বারা তাহাকেই করিতে হইবে। সে স্নান হাসি হাসিয়া কহিল—না।

পাঁচুর মা গিরির ওই স্নান হাসিতে বোধ করি তাহার মনের কথা বুঝিতেছিল, সে কহিল—সে কাজের কথা বলি নাই মা, বলি দোকানে আনতে নিতে যদি কিছু হয়, এই আর কি।

—কি আনবে ?

—এই হুন, তেল, খেতে ত হবে মা, পেট ত অভর, পেট ত মানবে না মা। আর না খাবেই বা কেনে, লোক বিধবা হচ্ছে, বেটা মরছে, তাও ত বেঁচে আছে, আর তোমার ত পাঁচ বছর, দেখতে দেখতে চলে যাবে। ওই ত আট বছর পরে আমাদের পাড়ার 'ইন্দি' ফিরে এল। আট বছর, তাও কালাপানি জাহাজে ক'রে নিয়ে গিয়েছিল, পাথরের জেল, বিচিতির পাতা তুলতে হয়, হাত ফুলে ওঠে, আর এ ত তোমার দেশের জেল, এখানে ত রাজার হাল।

গিরি কহিল—সে আমি ভাবি নাই পাঁচুর মা—

—না, ভাবনা হয় বৈকি, তবে মা কি করবে বল—রাজার ওপরে হাত ত নাই, বলে যে সেই 'রাজাতে কাটিবে শির, কি করিবে কোন্ বীর।'

গিরি আর উত্তর করে না, সে একটা দীর্ঘশ্বাস ফেলিয়া চুপ করিয়া থাকে।

পাঁচুর মাও একটু নীরব থাকিয়া বলে—তা তোমার একটু কষ্ট বেশি হবে, পেটের একটা নাই যে দুঃখের সময়—

গিরি চমকিত হইয়া কহে—ও কথা বলো না পাঁচুর মা, ওতে কাজ নাই আমার, ও যে হয় নাই সে দেবতার অনেক দয়া আমার উপর।

—ছিঃ মা, সধবা নারী—ও কথা বলতে নাই ; কেন, কিসের জন্ত এমন কথা বলছ তুমি ?

গিরি কথাটা বলিয়াই বুঝিয়াছিল যে কথাটা বলা ভাল হয় নাই, এ প্রশ্নের উত্তরে যে ইতিহাস তাহাকে বলিতে হয়—সে ত শুধু দুঃখের নয়,—অত বড় মর্মান্তিক ভাগ্যহীনতার অপমান নারীর আর হয় না। সে কথাটা একটু ঘুরাইয়া কহিল—আজ কি হ'ত মা, আজ যে সে আমার পেটের শত্রু হয়ে দাঁড়াত।

পাঁচুর মা একটা দীর্ঘশ্বাস ফেলিয়া নীরব রহিল। সেও বিচার করিয়া দেখিল, বৌ কথাটা সত্যই বলিয়াছে—দরিসের সন্তান শত্রু-ই বটে !

পাঁচুর মা এবার পা বাড়াইয়া কহিল—তা হলে আমি মা আসি, তুমি রান্না কর ; কি করব বল মা, ছোট জাত আমরা, নিজের জাত হলে কি তোমাকে রেঁধে খেতে হয় ?

গিরি হাসিয়া কহিল—জাতের আর কি আছে বল পাঁচুর মা, সত্যি জাত থাকলে ত ? আসলে ওসব মিছে—জাত ত এখন ছুটি, বড়লোক আর গরীব লোক—যারা বড়লোক তারাই উঁচু জাত, আর যারা গরীব তারাই ছোট জাত।

পাঁচুর মার যাওয়া হইল না। দরিসের সন্তান ওরা, এ কথায় মন তাহার একান্তভাবে সায় দিল, সে কহিল—এই কথাটি তুমি সত্যি বলেছ মা।

বাহির হইতে একটা ডাক শোনা গেল—পাঁচুর মা, রয়েছে নাকি ?

পাঁচুর মা কহিল—কে গো, মোটা মোড়ল নাকি, এস, এস।

বিপিনকে গ্রামে সবাই মোটা মোড়ল বলিত ; দেহের স্থূলতা অবশ্য ছিল তাহার, কিন্তু সেজন্ত নয়, জমিদারের সেরেস্তায় বিপিনের টাকার অঙ্ক মোটা, তাই জমিদার তরফ হইতে এ নামকরণ হইয়াছে। বিপিন ইহাতে বেশ গৌরব অহুভবই করে, এ তাহার সরকারী খেতাব।

গিরি চকিত হইয়া কি যেন বলিতে যাইতেছিল, কিন্তু তাহার মথ ফুটিবার পূর্বেই-বিপিন আসিয়া ও-ঘরের দাওয়ায় দাঁড়াইল। কথাটা তাহার বলা হইল না। সে তাড়াতাড়ি ঘোমটা টানিয়া অন্তরালে গিয়া দাঁড়াইল।

বিপিন কহিল—তাই ত পাঁচুর মা, কি ঘটনাটাই ঘটে গেল, বিধির নির্বন্ধ আর কি ! ছোঁড়া লোক বড় ভালই ছিল, আমার সঙ্গে প্রণয়টা বড়ই ছিল, সে নিজের ভায়ের তুল্যই মনে করত আমাকে, আমিও তাই। জিজ্ঞেস কর ওই বউকে, টাকা নিয়েছে সে, কখনও চাই নাই আমি। বলি, আহা সময়টা খারাপ পড়েছে, দেবে, দিন হলেই দেবে—আবার তার ওপর না চাইতে নিজে এসে দিয়ে গিয়েছি আমি। এই ত সে কাল, বলি, আহা খরচ নাই মামলার, তা চায় নাই, নিজেই দিইছি আমি, বুঝলে কি না।

পাঁচুর মা কহিল—সে একশবার। তা ছিমস্তের কথাও বলতে হবে বাপু, সে ত আমাদের পাড়া হামেশাই যেত, তা সে নাম করতো তোমার,—বলতো, হ্যাঁ, মাহুকের মত মাহুশ আমাদের মোটা মোড়ল, সে নেমথারাম ছিল না, তুমি ভালবাসতে—তোমার নাম করতো। তা ধর কেন যাবার সময় সব পাঁচুকেই ত আমার বলে গিয়েছে, দশবার তোমার নাম করেছে, বলেছে—‘পাঁচু, বোঁ রইল, মোটা মোড়লকে দেখতে বলিস।’

বিপিন তাহার মুখের কথা লুকিয়া কহিল—বোঁ রইল, বিপিনদাকে দেখতে বলিস ; তা দেখব বৈ কি ! ধর না কেন পাঁচুর মা, চোঁপের রাস্তা আমার কাল ঘুম হয় নাই, ভাবনায় ঘুম হয় নাই, বলি একা বোঁটি সোমথ বয়েস—আমাকে রা কাড়ে না—এ আমি করব কি ?

পাঁচুর মা কহিল—তা ত বটেই, ভাবনার কথা বটেই ত—বোঁ মাহুশ সোমথ বয়েস—রা-ই বা কাড়ে কি ক’রে ?

বিপিন কহে—তা অবিশিষ্ট আসতে যেতে হলে—অনেকটা সরল হবে বৈ কি—আর ধরগা যেয়ে সম্পক যা তা ত গাঁ-সম্পক।

পাঁচুর মা কহে—তা বৈকি—গাঁ-সম্পকে মুচী মিলে মামা হয়, সেও ত ধর ফেলনা নয় ; তবে হ্যাঁ, এলে গেলেই সরল হবে বৈ কি, বলে ভাস্করকে রা কেড়েই আজকাল ছর-ধুর করচে।

বিপিনের কথাটা রড়ই মনোমত হইল—এই ছর-ধুর করচে, আমিও ত তাই বলছি গাঁ-সম্পক ত—আসা-যাওয়া যখন—

অধিক আসা-যাওয়ার অভ্যাসে কথা কওয়ার পথ আর সরল করিতে হইল না, গিরির কণ্ঠস্বর এখনই শোনা গেল—সে বেশ ক্ষুট কণ্ঠেই কহিল—পাঁচুর মা, আসা-যাওয়া করতে ঠুঁকে হবে না, আমিই দরকার হলে দ্বিধিক সব জানিয়ে আসব।

বিপিন হতভম্ব হইয়া গেল, তাহার বুকখানা ধড়াস করিয়া উঠিল। তাহার মনের আগুনের আঁচ এ মেয়েটি পাইল কি করিয়া ?

মাহুশ ঘুঁরে না—তাহার যে মন, সে মন সৃষ্টি করিয়াছে সর্বাস্তর্ঘামী যে—সেই। আর সৃষ্টি করিয়াছে সে আপন সর্বাস্তর্ঘামী মনেরই খানিকটা লইয়া, তাহার সেই সকল-জানা শক্তি-ই মাহুকের মনের অমুমান-শক্তি, তাহাকেই মাহুশ বলে দূরদৃষ্টি, তাই হেলায় খেলায় মাহুশ যাহা অমুমান করে—তাহা ব্যর্থ হয় বটে, কিন্তু অন্তর সমর্পণ করিয়া যে অমুমান, সে হয় সত্য, প্রত্যক্ষ !

পাঁচুর মা কহিল—সেই ভাল মোটা মোড়ল, বোঁমা আমার বলেছে খুব ভাল। কাজ কি আসা-যাওয়ার, দরকার হলে তোমাদের বাড়িতে বলে আসবে।

বিপিন বলিল—তা বেশ। তবে কি পাঁচুর মা, ধরগা যেয়ে—মেয়েমাহুশ দেওয়া-খোওয়া বড় দেখতে পারে না।

গিরি এবার স্পষ্ট কণ্ঠে বলিয়া উঠিল, দেওয়া-খোওয়ার ত কোন দরকার নেই পাঁচুর মা। দেহ আছে—খেটে খাব আমি।

শশব্যস্ত হইয়া বিপিন বলিল—হ্যাঁ হ্যাঁ, তা ত বটেই—

গিরির কণ্ঠস্বর আবার শোনা গেল, অনেক বেলা হয়েছে পাঁচুর মা, তুমি ওঁকে যেতে বল—
আমি বেরুতে পারছি না।

বিপিন ধীরে ধীরে উঠিয়া গেল। তাহার সর্বাঙ্গ যেন কাঁপিতেছিল।

গিরি ঘরের ভিতর হইতে বাহির হইয়া আসিল। মুহূর্ত্তনা করিয়া পাঁচুর মাকে কহিল—
দেখছ আমি বেরুতে পারছি না, আর তোমার কথার শেষ হয় না।

পাঁচুর মা বলিল, কি করব বল মা, এত বড় লোকটা—

মুখের কথা কাড়িয়া লইয়া গিরি আঙুন হইয়া বলিয়া উঠিল—বড়লোক ত আমার দরকার
নেই পাঁচুর মা। আমি গরীব। বড়লোক আমার দু'চক্ষের বিষ।

তাহার কণ্ঠস্বরে ঘৃণা যেন উপচিয়া পড়িতেছিল। সারা মুখখানি ঘৃণার রেখায়-রেখায়
কুঞ্চিত হইয়া উঠিয়াছে, নাসারন্ধ্র ফ্যোত, চোখ দুইটি স্তিমিত হইয়া আসিয়াছে, কিন্তু দৃষ্টি তাহার
অতি তীব্র, তীক্ষ্ণ, সে দৃষ্টির সম্মুখে পাঁচুর মা কেমন হইয়া গেল, তাহার মত মুখরারও মুখ
না।

পনেরো

ভাবপ্রবণতার দিক দিয়া যতই শোচনীয় হোক, দেখিতে শুনিতে যতই সুন্দর হোক না কেন,
বাস্তবতার এই কঠোর ছুনিয়ায় এই বেনের কারবারে যেখানে ডান হাতটি তুমি না দিলে অপরের
বাম হাতের সাহায্য পাইবে না, সেখানে বিপিনকে এই অপমান করিয়া তাড়াইয়া দেওয়া গিরির
সঙ্গত বা বিবেচনাসম্মত হয় নাই—এ বলিতেই হইবে।

বিপিন ধনী। বিপিনিই একমাত্র ব্যক্তি যে গ্রামের মধ্যে গিরির মুখপানে চাহিতেছিল—তা
সে যত নীচ স্বার্থেই হোক। এ ছুনিয়ায় ধনের একটা মন্ততা আছে—কৃত্রিম বিনয়ে ধনী মুখে
যতই বৈষ্ণবী বুলি আওড়াক—তার মনে একটা প্রচ্ছন্ন অহঙ্কার ও স্বচ্ছলতার একটা অভিমান
আছে। এই অহঙ্কারে অভিমানে ছুনিয়ার উপর তাহার দাবী, ছুনিয়া তাহার সম্মান করিবে,
মাহুষের মাথার উপর দিয়া তার পায়ের তলার পথ তৈরি না হোক—তার পায়ের গোড়ায়
মাহুষের মাথা নত হইবে। ধনের জোরে জনকে সে কিনিয়াছে মনে করে। আর সাধারণ
ছুনিয়ার এই যুগে বেনেতির কারবারে আপনাকে মাহুষের বিক্রয়ও করিতে হয়; নতুবা মাহুষ
তাহার হাতের মুঠা বন্ধ করিয়া অনাহারে ছুনিয়াকে মারিবে। মাঝে মাঝে গিরির মত
অবিবেচনার কার্ষে ক্ষণিকের জ্ঞান নতুন ধারার মাহুষের দেখা পাওয়া যায়, কিন্তু সে ঐ ক্ষণিকের
জ্ঞান; ক্ষণিকের জ্ঞান আপনাকে ভাসাইয়া তুলিয়া সে আবার তলাইয়া যায়।

যাক, যাহা বলিবার কথা তাহা এই—গিরির প্রত্য্যথ্যানে বিপিনের ধনের অহঙ্কারে যা
লাগিয়াছে, সে অপমান বোধ করিয়াছিল। সে গিরিকে সাহায্যের সম্বল ত্যাগ করিল। শুধু
যে নির্লিপ্তভাবে ত্যাগ করিল তাহা নয়, তাহাকে জব্দ করার প্রচ্ছন্ন অভিপ্রায়ও তাহার ছিল।
সে আপন ঘরে থান-দান, গিরির কথা মনে মনে অহরহ ভাবে, কিন্তু প্রকাশে কোন খোঁজখবরই

লয় না। পথেঘাটে পাঁচুর মায়ের সঙ্গে দেখা হইলেও প্রসঙ্গক্রমে ও কথা তোলে না।

‘খাইতে না দিয়া বাজীকর বাঘ বশ করে’, এ কথাটার উপর অগাধ বিশ্বাস বিপিনের।

গিরির মনেও একটা সঙ্কল্প ছিল—সে ধনকে অবহেলা করিবে ঘৃণা করিবে, ধনীর ছয়াতে সে হাত পাতিবে না। বিশেষ করিয়া ওই বিপিনের সংস্রবে সে প্রাণান্তেও আসিবে না। সে পাঁচুর মাকে কহিল—পাঁচুর মা, তোমরা ত খেটে খাও, কি খাটুনি তোমাদের জোটে?

পাঁচুর মা কহিল—আমাদের কথা বাদ দাও মা, পুরুষে খেটে আনে, আমরা মেয়েরা ছুটো মাছ ধরে আনি, ছুটো শাক-পাতা তুলে আনি, সে কি দিন চলা—না বেঁচে থাকা!

গিরি কহিল—যাদের বাড়িতে পুরুষ নেই?

—পুরুষ যাদের নাই, তাদের মা শতেক-খোয়ার, তারা কেউ খেতে পায় না—আবার কাকর রাজার হাল।

গিরি চমকিত হইয়া কহে—রাজার হাল? সে কি করে হয় পাঁচুর মা?

পাঁচুর মা কহিল—সে কথা শুনে তোমাদের নাই মা; তোমরা সং জাত—

গিরি উত্তপ্ত হইয়া কহিল—জাতির কথা তুলো না পাঁচুর মা। বামুন বাগদী বলে জাত আর নাই, আছে বড়লোক আর গরীব লোক। আমি ত বলেছি, আমি গরীব—আমি তোমাদের সঙ্গে একজাত।

পাঁচুর মা বিব্রত হইয়া কহিল—তা হোক, সে শুনে কি করবে মা?

গিরি দৃঢ়কণ্ঠে কহিল—না, তুমি বল।

পাঁচুর মা ঈষৎ বিরক্ত হইয়া কহিল—ইজ্জৎ বিক্রি করে মা, তারা বলে খেয়ে-পরে ত বাঁচি—তার পর ধম্ম। ধম্ম আমায় স্বর্গে দেবে—তা স্বর্গে আমার কাজ নাই। সে—তুমি—

গিরি বাধা দিয়া কহিল—থাম পাঁচুর মা, ও কথা ত বলতে আমি বলি নাই তোমাকে।

পাঁচুর মা অবাক হইয়া গেল, সে কি বোঁমা, তুমিই ত জোর করে—

উত্তেজিতা গিরি অতি দৃঢ়তার সহিত কহিল—কক্ষনো না, কক্ষনো আমি ও কথা বলতে বলি নাই তোমাকে।

পাঁচুর মা এই মেয়েটির অন্ত পাইল না, সে ভাবিতে লাগিল, এ কি ধারার মায়া?

এনেকক্ষণ পরে কহিল—এক কাজ কর বোঁমা, তুমি ধান ভানার কাজ কর, তুমি নিজে ভাপা করবে, আমি তোমার ভেনে কুটে দেব; তাতেই তোমার একটা পেট—

গিরি বর্তাইয়া গেল; সে পরম কৃতজ্ঞতাভরে কহিল—সে ত খুব ভাল হয় পাঁচুর মা, কিন্তু দেবে কে?

পাঁচুর মা হাসিয়া পরম তাক্কিল্যভরে কহিল—তার ভাবনা কি? আজই আমি মোটা মোড়লকে বলছি—

—পাঁচুর মা!

গিরির কর্ণধরে পাঁচুর মা হতভম্ব হইয়া গেল, বুকিতে পারিল না ইহার মধ্যে তাহার কি অপরাধ হইয়া গেল। বিশ্বয়ের ঘোরটা তাহার কাটিতেই সে ঈষৎ উন্মাত্তরে কহিল—কি ধারার

মামুষ মা তুমি, রাগের কথা ত কিছু বলি নাই আমি !

এ উত্তরে গিরি শুধু অপ্রতিভই হইল না—আহতও হইল। সত্যই ত, এরূপ রক্ষতার হেতু কিছু হয় নাই। আর যদি হইয়াই থাকে, অজ্ঞাতে যদি কোন আঘাতই পাঁচুর মা দিয়া থাকে, তাহার জন্ত ওকে দোষ দেওয়া চলে না, তাহার জন্ত কটু কথা বলিবার তাহার অধিকারই বা কি ? ওই যে নারীটি, দাসীবৃত্তি যার ব্যবসায়, যাহার উপর বহুগুণের সামাজিক অধিকারের প্রভুত্বের অভ্যাসে এই কটু কথা সে বলিয়াছে, তাহার উপর সত্যকার প্রভুত্বের দাবী ত কিছু নেই তাহার। তবে থাকিত—থাকিতে পারিত, যদি তাহার অর্থ থাকিত।

একটা গভীর দীর্ঘশ্বাস ফেলিয়া মুখটি নীচু করিয়া বসিয়া থাকিতে থাকিতে সহসা সে কহিল—
—আর কারও ঘরে ধান পাওয়া যায় না পাঁচুর মা ?

পাঁচুর মা কহিল—আর কার অবস্থা আছে মা ? যে ধানটা তারা মজুরী দেবে সে ধানটা থাকলে তাদের পেটের ভাত হবে। এ গাঁয়ে ধান পরকে দিয়ে চাল করিয়ে নিতে এক ওই মোটা মোড়ল।

গিরি কহিল—দাসীবৃত্তিও একটা মেলে না পাঁচুর মা ?

—মেলে বৈকি মা, তবে এ গাঁয়ে দাসী রাখতেও ওই মোটা মোড়ল। তবে শহরের বাইরে বেরলে মেলে। তা তোমার এই সোমথ বয়স, এ বয়সে ত মা বাইরে বেরুনো হয় না, তার বিপদ অনেক।

গিরি ক্ষিপ্তার মত জিজ্ঞাসা করিল—ভাল ভাবে বেঁচে থাকবার কি কোন উপায় নাই পাঁচুর মা ?

বিশ্বয়ের উপর বিশ্বয়ে পাঁচুর মা হতবাক হইয়া গেল, কতক্ষণ পরে সে কহিল—আমি ত উপায় বললাম বোমা, মোটা মোড়লের কাছে ধান নাও, ভান।

গিরি কহিল—না না, তুমি এখন যাও পাঁচুর মা, আমি একটু শুই। উত্তেজনায় তখন সর্বশরীর তাহার থর থর করিয়া কাঁপিতেছিল, সে সেইখানেই লুটাইয়া পড়িয়া ফোপাইয়া কাঁদিয়া উঠিল। যে রুদ্ধ কান্না তাহার বুকের মাঝে কয়দিন হইতে স্তরে স্তরে জমা হইয়া আছে, সব যেন আজ নিঃশেষে বাহির হইয়া আসিতে চায়। কান্না আজ তাহার সেই বিসর্জিত শিশু-দেবতাটির বিগ্রহের তরে, কান্না তাহার হতভাগ্য স্বামীর তরে, কান্না আজ তাহার নিজের তরে, জীবনের তরে। হায়, বাঁচিবার আর ত তাহার কোন উপায়ই নাই !

পাঁচুর মা যায় নাই, সে পরম স্নেহভরে তাহার সর্ব অঙ্গে হাত বুলাইয়া কহিল—কৈদো না মা, কৈদো না, ছিঃ—

গিরি ক্রন্দনবিজড়িত কণ্ঠে মিনতি করিয়া কহিল—তুমি যাও, তুমি যাও পাঁচুর মা আমায় একটু কান্নাতে দাও।

বোল

গিরি সঙ্কল্প করিল সে মরিবে। এমন করিয়া আপনাকে বিক্রয় করিয়া বাঁচার অপেক্ষা মরাই সহস্র গুণে কাম্য। আর মরিবে সে এই অনাহারে শুকাইয়া শুকাইয়া, তিলে তিলে দগ্ধ হইয়াই সে মরিবে, যেন তাহার যাতনার প্রতি দীর্ঘনিশ্বাসটি সে রাখিয়া যাইতে পারে। সে দীর্ঘনিশ্বাস যেন অভিশাপ হইয়া এই বিকিকিনির সংসারে বেনিয়ার অঙ্কশায়িনী লক্ষ্মীর সোনার বর্ণটাকে মসীময় করিয়া দেয়। হায় রে, হতভাগিনী নারী জানে না ঐ রাক্ষসীর অধরোষ্ঠ রঞ্জিত করিতে, ঐ রাক্ষসীর চরণযুগলের অলঙ্কর রাগ যোগাইতে প্রতিদিন প্রতি মুহূর্তে কত লক্ষ বলি হইয়া যাইতেছে, তবু তাহার পায়ের রং মনোমত হইতেছে না, অধরোষ্ঠে হাসির রেখা ফুটিতেছে না।

এই সঙ্কল্প লইয়া পাঁচদিন সে কিছু খায় নাই। শুধু জলের উপর নির্ভর করিয়া পড়িয়া আছে। পাঁচুর মা কত সাধাসাধনা করিয়াছে, তবুও না। তাহাকে সে বলিয়াছে শরীর বড় খারাপ পাঁচুর মা, আমার অন্তথ করেছে।

পাঁচুর মা নিজে হইতে সেদিন সেরখানেক চাল, কয়টি বেগুন, মূলা আনিয়া দিয়া কহিল—বোমা, ওঠ, উঠে রেঁধে দুটো খাও, না খেয়ে খেয়ে তোমার শরীরের এমন হাল হয়েছে, খেলে-দেলেই শরীরে বল পাবে, ফুটি পাবে।

গিরির মাথায় যেন আগুন জ্বলিতেছিল, সে অবজ্ঞাতরে সেই শ্রদ্ধার দানগুলোকে ঠেলিয়া দিয়া কহিল—আমার কি এতই দৈন্তদশা হয়েছে পাঁচুর মা যে তোমার কাছেও ভিক্ষে আমার নিতে হবে ?

পাঁচুর মায়ের মুখখানা এতটুকু হইয়া গেল, সে চাল তরকারিগুলি আপনার আঁচলে তুলিয়া নীরবে চলিয়া গেল। একটি কথাও বলিবার সামর্থ্য তাহার ছিল না।

গিরি আপন মনেই আপনাকে কহিল—ওর ভিক্ষেই বা কেন নেব আমি; তার চেয়ে যে আপনাকে বিক্রি করাও ভাল আমার।

এর পর হইতে পাঁচুর মা আর আসে নাই, গিরিও তাহাকে ডাকে নাই। সে আজ ছ'দিনের কথা।

ক্লিষ্ট অসহ যন্ত্রণা! পেটের মধ্যে সমস্ত অন্ত্র যেন গুটাইয়া পাকাইয়া যাইতেছে। একটা ছুঃসহ হাহে যেন ভিতরটা পুড়িয়া যাইতেছে। গিরি মাঝে মাঝে এক এক ঘটি জল ঢুক ঢুক করিয়া গেলে, পরমুহূর্তে তাহাও বমি হইয়া সব উঠিয়া যায়। চারদিনের সন্ধ্যা হইতেই এ ঝাউনাটা প্রবল হইয়া উঠিয়াছে। আজ প্রাতঃকাল হইতে মাঝে মাঝে যেন চেতনা লুপ্ত হইয়া আন্নিভেছে, দৃষ্টিতে কিছু পড়ে না, কানে কিছু আসে না, অথচ মন সবটুকু অগ্নুভব করে। মরণের ছায়া-ছবি যেন চক্ষের সম্মুখে নাচিতেছে !

কী বীভৎস ! গিরির মনে হইল চক্ষের সম্মুখে ওই অন্ধকার, ওই অন্ধকার দিয়া একখানা শিখিল কঙ্কালময় হস্ত ধরণীর সমস্ত ছবি তাহার চক্ষের সম্মুখে যুঁছিয়া দিয়া চোখ টিপিয়া ধরিতেছে। তাহার অবদগ্ধ কানের মধ্যে সেই কঙ্কালের কোঁতুকের থিল্ থিল্ হাসি যেন বাজিয়া উঠিতেছে। সে যেন কোঁতুক করিয়া বলিতেছে—বল ত আমি কে ?

সমস্ত চেতনাকে প্রবুদ্ধ করিয়া গিরি প্রাণপণে জাগিয়া উঠিতে চাহিল। আবার অতি অল্পক্ষণ পরেই সেই অল্পভূতি তাহাকে এই ধরণীর বুক হইতে সেই হাতখানা সবল আকর্ষণে যেন ছিনাইয়া লইয়া যাইতেছে। পিছনে তাহার অবহেলার ঘর-দ্বার নির্মম সংসার মমতাময়ী হইয়া তাহারই জ্ঞান কাঁদিয়া উঠিতেছে।

সভয়ে আবার গিরি আপনাকে বাঁকি দিয়া সচেতন করিয়া তুলিল। শীতের প্রভাতে সেদিন সমস্ত ধরণী নিবিড় কুয়াশায় আচ্ছন্ন, বাষ্পকুণ্ডলীর মাঝে সব যেন লুপ্ত হইয়া যাইবে—গাছের পাতা হইতে শিশিরবিন্দু বারিধারার মত ঝরিয়া পড়িতেছিল। স্মৃতিস্তম্ভ হিমকণায় ধরণীর জীবন জর্জর হইয়া উঠিয়াছিল।

চেতনা প্রবুদ্ধ করিয়াও গিরি দেখিল সমস্ত ধরণী ধূমাচ্ছন্ন, সে সভয়ে চিৎকার করিয়া উঠিল—পথ নাই, পথ নাই, মাটির বুকে ফিরিয়া যাইতে কি পথ নাই? অল্পক্ষণ পরে সে বুঝিল, এ কুয়াশা, আশ্বস্ত হইয়া সে এদিক-ওদিক চাহিল।

আহার! আহার! একটা কিছু, যা আহার করিয়া সে এই বিভীষিকার হাত হইতে নিস্তার পায়! সে খানিকটা জল ঢক ঢক করিয়া খাইল, পরক্ষণেই একটা উদগ্র উদসীরণের অল্পভূতিতে সর্বাস্থ মোচড় দিয়া উঠিল। সে আপ্রাণ চেষ্টায় উঠিয়া পায়ের কাছে লেবু গাছটার কয়টা পাতা কচলাইয়া শুকিতে আরম্ভ করিল; একটা লেবুও নজরে পড়িল। গাছটা খুব বড় নয়, গিরি ধীরে ধীরে দেওয়াল ধরিয়া উঠিয়া লেবুটিকে পাড়িয়া লইয়া, দাঁত দিয়া কাটিয়াই লেবুটি লেহন করিতে লাগিল।

লেবুটি চুষিয়া তাহার বমির ভাবটা কাটিতেই সে অনেকটা সুস্থ বোধ করিল।

এদিক ওদিক চাহিয়া দেখিতে দেখিতে এতক্ষণে তাহার নজরে পড়িল—দাওয়ার এক কোণে পড়িয়া একটা মূলা আর অতি অল্প কতকগুলি চাল, পাঁচুর মায়ের তুলিয়া লইয়া ঘ্রাণে চাল-তরকারির অবশেষ।

আতঙ্কে, বুদ্ধকায় গিরি মূলাটা হইয়া কচ্ কচ্ করিয়া চিবাইয়া খাইল। তারপর চাল কটি ঘটির জলে ভিজাইয়া, চোখ বুজিয়া বসিয়া কি ভাবিতে লাগিল। নিম্নলিখিত চোখ হইতে দু'ফোঁটা জল টপ্ টপ্ করিয়া ঝরিয়া পড়িল—মরিতে পারিল না সেই দুঃখে, না মরণের হাত হইতে পরিত্রাণের আশ্বাসে কে জানে!

কতক্ষণ পরে চাল কটি সে অল্পে অল্পে চিবাইয়া খাইয়া ক্ষুধার দুর্দান্ত জ্বালা কতকটা জুড়াইল; দেহেও যেন কতকটা বল পাইল।

রাজ্যের ভাবনা তাহার মাথায়, তাহাকে বাঁচিতে হইবে। মরিতে সে পারিবে না, মরণ অতি ভয়ঙ্কর, অতি বীভৎস! জ্ঞান সত্ত্বে, সাধ্য সত্ত্বে, সে ওই কঙ্কালের হিমালয়-স্পর্শময় আলিঙ্গনের ছোঁয়াচ সন্ধ্যা করিতে পারিবে না।

কিন্তু বাঁচিবেই বা কি করিয়া? এ দেনা-পাণ্ডনার সংসারে সঞ্চল না থাকিলে ত বাঁচা যায় না! স্বামী হোক, স্ত্রী হোক, মাতা হোক, পুত্র হোক—নিঃসঙ্কলের ত উপায় নাই! স্ত্রী

অক্ষমতা স্বামী ক্ষমা করে না, স্বামীর অক্ষমতা স্ত্রী ক্ষমা করে না। তাহার মনে পড়িল, এই ত সেদিন শ্রীমন্ত তাহার কাছেই তাহার গোপন সখল হইতে কয়টা টাকা লইয়াছিল, তাহার জন্ত সে-ই ত নিজে কত গল্পনা দিয়াছে। শ্রীমন্তের মুখের উপরেই সে বলিয়াছিল—এমন চামার স্বামীর হাতে পড়ার চেয়ে মরণও ভাল।

সে-সময়টা প্রাতঃকাল, সূর্যও তখন ভাল করিয়া উঠে নাই, যখন সারা রজনীর বিশ্রাম অন্তে মানুষ বিগত দুঃখ গ্লানি ভুলিয়া মুহূর্তের জন্ত বিমলানন্দ ভোগ করে, তখনই। শ্রীমন্তের মুখে কথা ফুটে নাই—সে শুধু বলিয়াছিল—সকাল বেলায় আমায় গাল দিয়া না বলছি।

সে বলিয়াছিল—আমার নিলেই আমি বলিব। গাল দেব।

তখন চোখ থাকিতেও লক্ষ্য করে নাই, ওই নিঃসম্বলের মুখখানা কেমন হইয়া গিয়াছিল। তখন মনেও একবার হয় নাই ওই মানুষটির বুকে এ আঘাত কতখানি লাগিতে পারে। আজ কথাটা মনে পড়িয়া একটা গভীর দীর্ঘশ্বাস বুক চিরিয়া ঝরিয়া পড়িল, মনে হইল হয়ত বা অক্ষর হইয়া এ কাঁটা তাহার বুকে বসিয়া আছে। আবার মনে হইল, সেদিনের তাহার সে উমা সে ত সত্যই স্থায়ী নয়, সে অভাবের তাড়নায় মুহূর্তের ভুল, সে বিকৃত ক্রোধ। পরক্ষণেই মনে হইল তাই বা কেন, এ অসন্তোষ ত অহরহ তাহার বুকেই ছিল, সে সত্য। বরং সে সত্যকে গোপন করিয়া মুখে হাসি মাখিয়া নিরীহ শ্রীমন্তকে সে এতদিন বঞ্চনা করিয়াই আসিয়াছে; ভালবাসার নামে প্রতারণা করিয়া আসিয়াছে।

আত্মগ্লানির চরম উত্তেজনায় এক মুহূর্তে তাহার নিজের সমস্ত জীবনটা যেন মেকী হইয়া দাঁড়াইল। কি দাম তাহার ভালোবাসার! দুইটা টাকা! তবে একশো, এক হাজার, পাঁচ হাজারের জন্ত সে না পারে কি? ওই ত দেনা-পাওনার কষ্টপাথরে তাহার ভালবাসার রেখার মধ্যে খাদেব অংশটাই জল জল করিতেছে। গিরির অধরে একটা হাসির রেখা খেলিয়া গেল। অদ্ভুত সে হাসি—হাসির রূপই স্বতন্ত্র। আনন্দই সংসারে হাসির উপাদান, কিন্তু গিরির হাসির রেখায় রেখায় জ্বালাব তীব্র শিখা!

মিথ্যা, মিথ্যা, সে কাহাকেও ভালবাসে নাই, শ্রীমন্তকে না, গৌরীকে না! সে ভালবাসে শুধু নিজেকে, সমস্ত সংসারটার রূপ যেন তাহার চক্ষের সম্মুখে নিমেষে পান্টাইয়া গেল—ধরণীর হুস্তাম অঙ্গাবরণখানি কে যেন উন্মোচন করিয়া লইয়া তাহাকে দেখাইয়া দিল ইহার বীভৎস কদর্ভ ক্ষত-ভরা কুৎসিত স্বরূপ—ধরণীর সে যেন রাক্ষসী, ব্যভিচারিণী রূপ ওই শ্রামাঙ্কলের আবরণ দিয়া রাক্ষসী উদরের জন্ত সন্তানের মাংস খায়, আপনাকে বিক্রয় করে, ব্যভিচারের ফলে কুৎসিত ক্ষতে তাই তাহার সর্বাঙ্গ ভরা। ধরণীর বুক চিরিলে পাওয়া যায় শুধু সন্তানের কঙ্কাল—মেদ মজ্জা, তাহাতেই ধরণী দিন দিন পুট হইতেছে।

গিরি উত্তেজনায় উঠিয়া দাঁড়াইল আপন অনশন-দীর্ঘ দেহখানার পানে চাহিয়া, তাহার ধূলি-মলিন জীর্ণতার জন্ত সারা অন্তর তাহার ঘৃণায় বিন্ বিন্ করিয়া উঠিল, আরও ঘৃণা জাগিল তাহার আপন অঙ্গের জীর্ণ-মলিন বস্ত্রখানার জন্ত।

সে আপনার ভাণ্ডার খুঁজিতে আরম্ভ করিল।

ভাণ্ডার খুঁজিয়া বাহির হইল—বস্তীর পূজার জন্য চাহিয়া-আনা সেই আধ পোয়াটেক আতপ চাল, ঘরের কোণে ইহুরে থাওয়া কয়টা আলু। ইহাতেই তাহার এক বেলা চলিয়া যাইবে।

কাঠ-কুটা চাই, গিরি স্থিরা না করিয়া সম্মুখে ঢেঁকি-ঘরের চালাটার খড়, বাতা টান মারিয়া ছাড়াইয়া লইল। দারুণ উত্তেজনায় অনশনের দুর্বলতা তখন তাহার কোথায় চলিয়া গিয়াছে।

চালাখানা হইয়া উঠিল কদম্ব; সেদিকে গিরি একবার তাকাইলও না। উনানের মুখে সমস্তগুলি জড় করিয়া ছেঁড়া গামছাখানা টানিয়া লইয়া থিড়কির পথে সে বাহির হইয়া গেল।

দেহখানার ধূলিমালিষ্ঠ উত্তমরূপে মার্জনা করিয়া কাপড় কাচিয়া ঘাটে উঠিল। ছোট হইয়া সে কাপড় নিঙড়াইতেছে, বন্ধবাস সম্পূর্ণভাবে মুক্ত। সহসা তাহার দৃষ্টি পড়িল বাঁশঝাড়ের ফাঁক দিয়া সম্মুখের পানে, নিবিড় কুয়াশার মধ্য দিয়াও একটা মাতৃস্বের একাংশ দেখা যায়, আর দেখা যায় একটা চোখ। অতি নিকটেই লোকটা দাঁড়াইয়া আছে। দৃষ্টির লোলুপতা দিয়া সে তাহার অঙ্গ যেন লেহন করিতেছে। শশানচারী শকুন যেন সন্ত-পরিত্যক্ত শবের পানে বৃক্ষশীর্ষ হইতে চাহিয়া আছে। দারুণ উত্তেজনায় গিরি যেন কেমন হইয়া গেল। সে সেই অনাবৃত অঙ্গেই সোজা হইয়া দাঁড়াইয়া হাতছানিতে ওই লোকটিকে ডাকিয়া স্বরিত পদে আপন ঘরে আসিয়া উঠিল।

গিরি বুকিয়াছিল সে কে।

বিপিন যখন উঠানে আসিয়া দাঁড়াইল, তখন গিরি কাপড় ছাড়িয়া ঘরের দ্বারের দাঁড়াইয়া আছে।

অস্বাভাবিক রূপে প্রদীপ্ত মুখ, চক্রে জ্বালা, সারা অঙ্গে শুষ্ক দৃঢ় সংকল্পে উপবাসহেতু একটি মহিমাম্বিত শীর্ণতা, ললাট পাণ্ডুর, তাম্বর—একটি প্রদীপ্ত ব্রতচারিণী রূপ! সে মূর্তির সম্মুখে বিপিন যেন কেমন হইয়া গেল। সে তবু সাহস করিয়া কহিল—পাঁচুর মা বলছিল তুমি ক’দিন খাও নি।

গিরি একদৃষ্টে ওই লোকটির দিকে চাহিয়া ছিল, সে দৃষ্টিতে নারীর লজ্জা ছিল না, মাধুর্য ছিল না—ছিল শুধু ঘৃণা, জ্বালা। কি বীভৎস ওই লোকটি!

ভোগের পুষ্টিতে সর্ব অঙ্গে মেদবহুল কদম্ব স্থূলতা, মুখের রেখার রেখার কাপুরুষ ধূর্ততার ছাপ, ছোট ছোট দুটি চোখে শক্তি কিন্তু লালসা-ভরা নির্নিমেষ দৃষ্টি। গিরির ইচ্ছা করিতেছিল—বর্বরটাকে সে হত্যা করে।

বিপিন গিরির এই ভীত দৃষ্টির সম্মুখে আপনাকে যেন হারাইয়া ফেলিতেছিল। বৃকের মধ্যে একটা কপ্পন মুহূর্ত্ত জাগিয়া উঠিতেছিল। একবার ভাবিল সে পলাইয়া যায়। পলাইবার জন্য সে কিরিলও, কিন্তু লোভী মনের তাড়নায় সে আবার ঘুরিল।

আবার সে কহিল—পাঁচুর মা বলছিল তুমি ক’দিন খাও নি—

ডা. ব.

ওই একটি ব্যতীত অপর কোন সম্ভাবণ তার কম্পিত অন্তরে জাগিল না।

গিরি ক্রিপ্তার মত সহসা কহিল—তাতে তোমার কি? তোমার কি? কেন তুমি এমন নির্লজ্জের মত আমার পানে তাকিয়ে থাক, কেন—কেন—

গিরি হাঁপাইতেছিল, অস্বাভাবিক জ্বালায় চোখ দুইটির প্রতি শিরাটি রক্তরাগা, সমস্ত দেহ তাহার ধব্ধ করিয়া কাঁপিতেছে।

বিপিন প্রাণপণে সাহস সঞ্চয় করিয়া কহিল—বোঁ, আমি তোমায় ভালবাসি—

পরম ঘৃণাভরে গিরি কহিল—না—না—আমি চাই টাকা—ভাল খাবার, গহনা, কাপড়—

বাক্য আর শেষ হইল না—দুর্বল দেহে বিপুল উত্তেজনায় গিরি জ্ঞান হারাইয়া পড়িয়া গেল। দাওয়ার কানায় গাঁথা ইটের উপর কপালটায় আঘাত পাইয়া গভীর একটা ক্ষত হইয়া গেল, ক্ষতের রক্তে সমস্ত মুখখানা তাহার রক্তাক্ত হইয়া উঠিল।

কপালের রক্তধারা নাকের কোল বহিয়া ক্রিপ্তা নারীটির ওষ্ঠ বহিয়া গড়াইয়া পড়িতেছে—যেন নিজেই রক্ত সে নিজেই পান করিতেছে।

ও যেন ছিন্নলতা।

বিপিন পলাইয়া গেল।

*

*

*

চোখ মেলিয়া গিরি দেখিল—জলে সর্বাঙ্গ তাহার ভাসিয়া গেছে—আর তাহার মাথা কোলে করিয়া বসিয়া পাঁচুর মা। পরম আশ্বাসে সে আবার চোখ মুদিল। আপনার কপালে হাত বুলাইয়া ক্ষতটা অল্পভব করিয়া একটি দীর্ঘশ্বাস ফেলিল। বুকের জমা-করা সমস্ত গ্লানি যেন সে নিঃশ্বাসে বাহির হইয়া গেল।

পাঁচুর মা কহিল—উঠতে পারবে মা! ওষ্ঠ দেখি আস্তে আস্তে—ভাত কটা ঘে পুড়ে খেল। জল শুকাইয়া ভাত তখন ধরিয়া গিয়াছে, একটা হুগ্গে সমস্ত বাড়িটা ভরিয়া উঠিয়াছে।

গিরির উদরের মধ্যে তখনও আগুন জলিতেছে—আহার্যের নামে ক্ষুধাতুরার চক্ষু জল জল করিয়া উঠিল, সে উঠিয়া বসিল। সমস্ত কথা ভাবিয়া স্মরণ করিবার অবসর এমন কি প্রবৃত্তিও বোধ হয় হইল না; সে টলিতে টলিতে উঠিয়া গিয়া উনানের মুখে বসিয়া ঐ কদম্ব দণ্ড ভাতের হাড়িটা নামাইতে গেল।

পাঁচুর মা কহিল—ভিজে কাদা মাথা কাপড়খানা ছাড় মা আগে—

সে কথা যেন গিরির কানেই গেল না; সে কহিল—এক কাঁকড় ছুন এনে দিতে পার পাঁচুর মা? এক কাঁকড় ছুন!

*

*

*

দিবসান্তে সন্ধ্যার অন্ধকার ঘনাইতে না ঘনাইতে সেদিন গিরি ঘুমে ঢলিয়া পড়িল। এ কয়টা দিনের ঘুম যেন নয়ন-দেখার তটভূমিতে অপেক্ষা করিয়াছিল; সন্ধ্যার প্রসাদের সঙ্গে সঙ্গে শান্তি আসিয়া তাহার সর্বাঙ্গে হাত বুলাইয়া দিল।

আরও একটি স্তম্ভাবাদে গিরির মন সেদিন আশস্ত হইয়াছিল, পাঁচুর মা তাহার জন্ত ধানের ব্যবস্থা করিয়াছে, ও-গাঁয়ের ভবি মোড়ল ধান দিতে রাজী হইয়াছে।

পাঁচুর মা স্তম্ভাবাদ দিতে গিরি যেন মুক হইয়া গেল, কোন্ ভাষায় কেমন করিয়া যে কৃতজ্ঞতা প্রকাশ করিবে তাহা খুঁজিয়া পাইল না।

পাঁচুর মা তাহার ওই নীরবতায় শঙ্কিত হইয়া উঠিল—এই স্ফটিকছাড়া মেয়েটি যে আবার কি করিয়া বসিবে, সে যে তাহার ধারণার অতীত। এত করিয়াও যে সে মেয়েটির মনের কল-কিনারা পাইল না। সে শঙ্কিত ভাবে কহিল—কি বলছ মা, আমি ত কথা দিয়ে এসেছি—

গিরির চোখ দিয়া কয় কৌটা জল গড়াইয়া পড়িল; সে কহিল—কি বলব ভেবে যে পাচ্ছি না মা, ইচ্ছে করছে তোমার গলাটা জড়িয়ে ধ'রে প্রাণ খুলে আজ কাঁদি; পাঁচুর মা, তুমি আমার আর-কয়ে মা ছিলে!

স্বর্ণ মানবচকুর অগোচর—স্বর্ণীয় বস্তুর সহিত মাছবের পরিচয় নাই, কিন্তু পাঁচুর মার মুখে যে হাসি, যে ভক্তির দীপ্তি ছুটিয়া উঠিল তার একমাত্র বিশেষণ ওই স্বর্ণীয়, সে কৃত্রিম বিনয়ে এ কৃতজ্ঞতা প্রত্যাখ্যান করিল না।

নিরক্ষর সরলা পরানীয়াটি একমুখ হাসিয়া কহিল—তোমাকে আমার বড় ভাল লাগে মা।

আরও দুই-চারিটা কথার পর পাঁচুর মা চলিয়া গেল—গিরি আচল পাতিয়া মাটির উপর শুইয়া আকাশের পানে চাহিয়া রহিল। প্রভাতের কুয়াশা কাটিয়া গেছে—আকাশ প্রগাঢ় নীল; শীতের মধ্যাহ্নের সূর্যকিরণে ধরণী যেন কত উপভোগ্যা হইয়া উঠিয়াছে। আকাশের বুকে মিশিয়া চলমান বিন্দুর মত কয়টি চিল নিরন্তর উর্ধ্বে উড়িয়া চলিয়াছে। দূরে পালোদের বাঁশ-বনের শীর্ষগুলি বায়ু-প্রবাহে তুলিয়া তুলিয়া উঠিতেছে।

গিরির আজ এগুলি বেশ লাগিল।

দাণ্ডয়ার কোলে করবী গাছটি রাঙা ফুলে ভরিয়া উঠিয়াছে। গিরির মনে পড়িল এ গাছটি তাহার নিজের হাতে রোপিত। কিন্তু যার পরিচর্যায় সে আজ এমন রূপে রসে বর্ণে গন্ধে ভরিয়া উঠিয়াছে, সে গোঁরী!

আহা, আজ যদি গোঁরী কাছে থাকিত!

সন্মুখে চালাটার উপর দুইটা পায়রা বসিয়া একটা অপবটার মুখে আহা! তুলিয়া দিতেছিল। একটি মা, অপবটি সন্তান। ছানাটা পাখার ঝাপ্টা দিয়া আগাইয়া আসিয়া আহা! দাবী করিতেছিল—মা উড়িয়া গেল, ছানা পারিল না। সে ফিরিয়া ছানাটাকে চকুর আঘাতে চকল করিয়া আবার উড়িল, এবার ছানাটাও উড়িল।

গিরি একটা দীর্ঘশ্বাস ফেলিয়া মুখ ঘুয়াইল।

হায়! তাহার বুক জুড়াইয়া যদি একটি শিশু থাকিত! সেও তাহার অবসর তাহাকে লইয়া এমনি ভাবে কাটাইতে পারিত!

ওই বিবর্ণ অবসন্নতার মধ্যেই সে তন্দ্রাচ্ছন্ন হইয়া পড়িল।

একটা আর্ত কলরোলে তাহার তন্দ্রা টুটিয়া গেল, চমকিয়া সে জাগিয়া উঠিয়া বসিল।

বাঙ্গীপাড়ায় কাহার যেন কলরোল করিয়া কাদে। গিরি কান পাতিয়া শুনিল—সমস্ত কলরোল ছাপাইয়া নারীকণ্ঠে কে যেন বিনাইয়া বিনাইয়া মর্মস্পর্শী কান্না কাদিতেছে। বিলাপের তাবাও মধ্যে মধ্যে কিছু কিছু শব্দ হইয়া কানে আসিয়া ধরা দেয়।

ওরে সোনা—ওরে যাহু আমার—

গিরির বুকের ভিতরটা কেমন করিয়া উঠিল, সে তাড়াতাড়ি গিয়া সম্মুখের মুক্ত দুয়ারটা বন্ধ করিয়া ঘরের মধ্যে অন্ধকারে বসিয়া হাঁপাইতে লাগিল।

কতক্ষণ পর কে জানে পাঁচুর মায়ের গলা শোনা গেল—কৈ গো, বোঁমা কৈ? বলি ঘরে রয়েছ না কি?

গিরি দুয়ার খুলিয়া দুয়ারের বাজু ধরিয়া আসিয়া দাঁড়াইল। তখন বাঙ্গীপাড়ার কলরোল নীরব হইয়া গেছে, কিন্তু নারীকণ্ঠের সঙ্কল্প বিলাপ মন্থর গতিতে তখনও চলিয়াছে। বেশ বোকা যায় শোকাভূয়ার দেহ যেন আর পারে না—কিন্তু প্রাণ মানিতেছে না—দূর হৃদয় কোন অদৃশ্যলোক পর্বন্ত আহ্বান করিয়া হারানো সোনাকে তাহার ফিরাইতে চায় সে।

ওরে সোনা—ওরে যাহু আমার রে!

পাঁচুর মা বলিতেছিল—মনে করলাম ছপুরবেলায় এসে উঠোনটা ঢেকিশালটা নিকিয়ে যাব—তা বাড়ি গিয়ে এক বিপদ—

গিরি তাহাকে বাধা দিয়া কহিল—কে এমন করে কাদছে পাঁচুর মা!

পাঁচুর মা কহিল—তাই ত বলছি মা গিয়েই দেখি আমাদের গোহুলের সন্তানটি নষ্ট হ'ল—এই নিম্নে পাঁচটি গেল। কি যে দোষ ধরেছে মা, কৌকে একটা হলই কোলেরটা বাবে। এই আবার পোয়াভি—সঙ্গে সঙ্গে কোলেরটা গেল।

আকাশের দিকে চাহিয়া থাকিতে থাকিতে গিরি কহিল—যা করতে হয় কর পাঁচুর মা, আমায় আর ভেঁকো না, আমার বড় মাথা ধরেছে।

পাঁচুর মা কহিল—এই অবেলায়—একেবারে কাপড়-চোপড় কেচে—

গিরি কহিয়া উঠিল—না না পাঁচুর মা, ও কান্না আমি সহিতে পারি না, আমায় ভেঁকো না।

সে আবার ঘরে ঢুকিয়া দরজাটা বন্ধ করিয়া দিল।

* * *

অন্ধকার গৃহ-মধ্যে উপাধানে মুখ গুঁজিয়া গিরি শুইয়া পড়িল। রক্ত-ধারে সন্তানহারী হতভাগিনীর বিলাপধ্বনি প্রতিহত হইয়া বায়ুপ্রবাহে দিক-দিগন্তরে ভাসিয়া চলিয়া যায়।

রক্তধারের এপাশে শুনা যায় বিলাপের অতি ক্লীণ রেশ একটি, মাঝে মাঝে দুই—একটা শব্দ।

গিরির মনে হইল—তাহার ভাগ্য ভাল, তাহার এই বকনায় বেহনায় চেয়ে ওই বিরোগের

হুঃখ ঢের বড় ! কিন্তু এ চিন্তায় সে আনন্দই পাইল না । একটি সঙ্কল্প মানিমায় মন তাহার কেমন উদাসী হইয়া উঠিল—শূন্য মন, শূন্য সংসার—শূন্য দৃষ্টিতে সে ওই অন্ধকারের পানে চাহিয়া রহিল ।

এমনি অবস্থায় আবার কখন সে নিত্ৰাচ্ছন্ন হইয়া পড়িয়াছে । সে নিত্ৰা ভাঙিল তাহার রুদ্ধধারে কাহার মুহূ করাবাতে । কে যেন ডাকে !

গিরি উঠিয়া বলিল ।

নিত্ৰা নীরব সব—পাখি ডাকে না, মাহুঘের সাড়া পাওয়া যায় না । ঘরের জীর্ণ ছিত্রের চালের মধ্য দিয়া ব্যোমপথ দেখা যায়—অস্পষ্ট অন্ধকার, আরও উদ্ভেদ দেখা যায় থানিকটা আকাশ, সে আকাশ গাঢ় কৃষ্ণ নীল—কয়টি প্রদীপ্ত, প্রোজ্জ্বল বিন্দু । গিরি বুঝিল দিনের অবসান হইয়া গেছে, এ রাত্রি !

রুদ্ধধারে মুহূ করাবাতের শব্দ শোনা গেল । গিরি বুঝিল পাঁচুর মা শুইতে আসিয়াছে ; সে তাড়াতাড়ি উঠিয়া দুয়ার খুলিয়া দিয়া ডাকিল—পাঁচুর মা !

দাওয়ার উপর থানিকটা চাঁদের আলো তেরছা ভাবে হুশাস্ত মহিমায় পড়িয়াছিল—তাহারই আভায় উপরের অন্ধকার স্বচ্ছ হইয়া উঠিয়াছে । গিরি দেখিল দুয়ারের পাশে একটি মাহুঘ দাঁড়াইয়া, জ্যোৎস্নার স্বচ্ছতার মধ্যে গিরির মানুষটিকে চিনিতে বিলম্ব হইল না—সে বিপিন !

চিংকার করিতে তাহার স্বর ফুটিল না, ঘরে ঢুকিতে পা উঠিল না—একমুহূর্তে গিরি যেন কেমন হইয়া গেল ।

নিম্পন্দ, নির্বাক !

দাওয়ার চন্দ্রালোকদীপ্ত অংশটুকুর উপর বিপিন কি নামাইয়া দিল ।

চন্দ্রালোকের মুহূ অস্পষ্টতার মধ্যে প্রদীপ্তরূপে দেখা না গেলেও জিনিস চেনা গেল—একখানি ভালয় সাম্রানো জিনিসের সস্তার ! একদিকে দেখা যায় কাপড়, তাহারই পাশে নতুন বাটিতে বোধ করি আহাৰ্য, এদিকে আরও কত কি পূর্ণরূপে চেনা যায় না, কিন্তু ওই এমন মুদুম্বিক আলোকেও সেগুলো বক্ষক করিয়া উঠে, কাঁচের জিনিস বলিয়া বোধ হয় ।

গিরি একদৃষ্টিতে ওই ব্যবসস্তারের পানে চাহিয়া রহিল ।

বিপিন মুদুম্বরে আবার কহিল—তুমি চেয়েছিলে বোঁ ।

গিরির তবু কোন সাড়া নাই, তাহার দৃষ্টি ওই ব্যবসস্তারের উপর ।

বিপিন ভরসা পাইল, কহিল—কাপড় এনেছি, খাবার এনেছি, তেল, সাবান, চিকনি, আলতা—সব এনেছি, টাকা নাও, গয়না আমি দেব । আরও—সহসা বিপিন নীরব হইয়া চমকিয়া উঠিল । সঙ্গে সঙ্গে সম্মুখের ঢেঁকিশালার অস্পষ্ট অন্ধকার হইতে কে ডাকিয়া উঠিল—মোটো মোড়ল !

বিপিন থবু থবু করিয়া কাঁপিয়া উঠিল । ঢেঁকিশালার দিকে না চাহিয়াও সে বুঝিয়াছিল সে কে । মুহূর্ত-মধ্যে সে আত্মসম্বরণ করিয়া অরিত পদে খিড়কির দুয়ার দিয়া বাহির হইয়া গেল । গিরি তখনও তেমনি দাঁড়াইয়া ।

টেকিশালায় দাঁড়াইয়া ছিল পাচুর মা আর পাচু। পাচু মাকে পৌছাইয়া দিতে আসিয়াছিল।

পাচুর মা উঠানে নামিয়া আসিতেই পাচু কহিল—মা!

পাচুর মা ফিরিয়া দাঁড়াইলে পাচু কহিল—ফিরে আয় মা!

পাচুর মা কহিল—দাঁড়া।

উদ্বেজিত পাচু কহিল—না, ফিরে আয় বলছি।

পাচুর মা কহিল—চল না তুই, আমি যাই।

দৃঢ়ভাবে পাচু কহিল—না, এখনি আয়, নইলে তোয় সঙ্গে আমার শেষ!

পাচু আর অপেক্ষা করিল না, সে দ্রুতপদে বাহির হইয়া গেল।

পথের ওপাশেই রামকেষ্ট সাহার বাড়ি, বাড়ি হইতে রামকেষ্ট ডাকিল—পাচু!

পাচু চমকিয়া উঠিয়া ফিরিয়া দাঁড়াইয়া কহিল—কে?

—আমি রামকেষ্ট।

পাচু বিরক্তভাবে কহিল—কি?

খোলা জানালা হইতে রামকেষ্ট কহিল—ধরতে পারিলি না রে? কিছু আদায় হয়ে যেত। আর পারিলি না দিতে বোটার ধুমলো পিঠে গদাগদ ঘা-কতক।

পাচু বিরক্ত ভাবেই কহিল—কি সব আবোল-তাবোল বকছ তুমি?

হাসিয়া সাহা কহিল—আবোল-তাবোলই বটে রে, আবোল-তাবোলই বটে! বাবা, রামকেষ্টের কান খুঁট করলে সাড়া দেয়, চোরের দায়ে ঘুমোবার জো আছে? শালা বিপুলে ঢুকলো তাও দেখেছি, পালালো তাও দেখেছি—সব—আগাগোড়া।

সাহা হাসিয়া জানালাটা বন্ধ করিয়া দিল।

পাচু একটা দীর্ঘশ্বাস ফেলিয়া আপন পথ ধরিল।

পাচুর মা গিরির কাছে আসিয়া দাঁড়াইল। তখনও গিরি বিক্ষারিত নেত্রে দাঁড়াইয়া।

পাচুর মা কহিল—বোমা!

গিরি চমকিয়া উঠিল—তারপর পাচুর মায়ের পানে চাহিয়া সে কহিল—পাচুর মা! এত দেবি কি করে মা!

পাচুর মা স্থির দৃষ্টিতে গিরির পানে চাহিয়া দেখিতেছিল। সহসা গিরির দৃষ্টিতে আবার শড়িল সেই ভ্রব্যসত্তার, সে দুই হাতে আপনার মুখ ঢাকিয়া কৌপাইয়া কাঁদিয়া উঠিল।

সতেরো

এ সংসারে মানুষকে কঠোর সমালোচক বলিলে তাহার অতি প্রশংসা করা হয়—মানুষ নিন্দুক, পরনিন্দার উপর তাহার একটা সহজাত লিপ্সা আছে, সাদার গায়ে কালি ছিটাইয়া তাহার পরম তৃপ্তি।

প্রভাত হইতে না হইতে রামকেষ্ট-সংবাদ সমগ্র গ্রামের নর-নারীর কর্ণে সুধা বর্ষণ করিল। লোকে এখন দিনকতক জাবর-কাটার উপযুক্ত খোরাক পাইয়া প্রবল উৎসাহে কোমর বাঁধিয়া বসিল। রামকেষ্ট আসিয়া বিপিনকে ধরিল—মিষ্টি খাওয়াতে হবে দাদা। বিপিন উত্তর দিল না, শুধু সলজ্জা বধুটির মত দস্ত বিচ্ছেদ করিয়া হাসিল মাত্র।

রামকেষ্ট কহিল—তুমি আমাকে এ কথা বল নি কেন? তা হ'লে কি ওই বাগ্গী বেটা জানতে পারে, না গাঁয়ে জানাজানি হয়? আমার জানলা থেকে নজর রাখলে কার এড়িয়ে যাবার উপায়টি নাই বাবা—হুঁ হুঁ!

গভীর আত্মপ্রসাদের সহিত বার দুই ঘাড় নাড়িয়া সে কথা শেষ করিল। বিপিন তবু কথা কহিল না, রামকেষ্ট কহিল—দাও ত খাইয়ে মিষ্টি তুমি, তারপর নির্ভয়ে চলে যেয়ো দিন-দুপুরে, দেখবো কোন শালা কি বলে? আর দেখ না তুমি ওই শালা বাগ্গীর কি করি।

বিপিন একটা দীর্ঘশ্বাস ফেলিয়া কহিল—তাই ত রামকেষ্ট, মিছিমিছি মেয়েটার কলক হ'ল হে—কোন দোষের দোষী নয় সে বেচারী—

জিভের পাশে আর তালুতে সংযোগ করিয়া একটা বিচিত্র শব্দ করিয়া রামকেষ্ট কহিল—মাইরি আমার রসিক নাগর হে—ও নিচু বী, তুমি নিচু বী, দুখী লোক আমরা; কেমন? বলি শাক দিয়ে কি মাছ ঢাকা যায়, না কাঁচের আড়ে মাছ লুকায়? ওসব চলবে না দাদা, নগদ কিছু ছাড়, এই গোটা বিশ-পচিশ, আমরা মদ-মাংস খাই, আর তুমি—

বাকিটা বিপিনের কানে কানে বলিয়া এক তাণ্ডব হাসি হাসিয়া গড়াইয়া পড়িল।

বিপিনকে রাজী হইতে হইল। রামকেষ্ট মাটির উপর একটা চড় কষিয়া উঠিতে উঠিতে কহিল—নিভায় তুমি, বে-পরোয়া—যখন খুশি—

মৌন হইয়া বিপিন সম্মতি-লক্ষণ প্রকাশ করিল। রামকেষ্ট প্রবল উৎসাহে উঠিয়া কহিল—ওস্তাদকে একটি খবর দিতে হবে মাইরি, হরিলাল আমাদের হে!

*

*

*

বেলা দ্বিপ্রহর হইতে না হইতে সারা গ্রামে সংবাদটা বিপুল কলরবে ধ্বনিয়া উঠিল। সে কলরবের প্রচণ্ডতায় গিরি—শ্রীমন্তের আগ্নেয়গিরি মুক বিহ্বল হইয়া গেল।

সে মুক বিহ্বল হইয়া ভাবিতেছিল, আপন অদৃষ্টের কথা—হ্যাঁ, তাহার অদৃষ্টের নিষ্ঠুরতার চমৎকারিত্ব আছে। নিষ্ঠুরতার ক্রমবিকাশ কোথাও এতটুকু ক্ষুণ্ণ হয় নাই, সত্যজ্ঞ একটি লতার মত দিন দিন বাড়িয়া পাকে পাকে তাহাকে বেড়িয়া বেড়িয়া চলিয়াছে নাগপাশের মত, লোহার শৃঙ্খলের মত।

হায়, শ্বাসপ্রশ্বাস রুদ্ধ করিয়া তাহার জীবনের শেষ যদি এমন করিয়া হইয়া যাইত, গিরি যেন জুড়াইয়া বাঁচিত!

একবার মনে হইল গলায় দড়ি দিয়া ঝুলিয়া মরিবে, কিম্বা বিষ—বিষপান করিয়া জুড়াইবে!

চট করিয়া উঠিয়া সে থিড়কির ঘাটে গিয়া কঙ্কফুলের গাছটা হইতে কয়টা ফল পাড়িয়া

নইয়া দাওয়ায় আসিয়া ছেঁচিতে বসিল। হাতের পাখরটা উপরে তুলিতেই একটা কথা তাহার মনে পড়িয়া গেল—সেই সেদিনের সেই মৃত্যু-অনুভূতির কথা—সহনাতীত সেই হিমালীশীতল স্পর্শ! সেই উবেগ, সেই যন্ত্রণা, যে যন্ত্রণা ভাষায় প্রকাশ করা যায় না—যে যন্ত্রণার স্পর্শে সমস্ত চৈতন্য পঙ্গু হইয়া পড়ে—উঃ!

গিরি ফল কয়টা যথাসক্তি সজোরে প্রাচীর পার করিয়া বহুদূরে ছুঁড়িয়া ফেলিয়া দিল।

পাঁচুর মা আসিয়া ডাকিল, বোমা—

গিরি উত্তর দিল না—তখনও সে মৃত্যুর ভয়ে যেন কাঁপিতেছিল।

পাঁচুর মা কহিল—রান্নাবান্না কর বোমা। আজ চাল ভাল সব আমি দোকানে ধারে নিয়ে আসি—কাল ভবি মোড়লের ধান আসবে, কিছু ধান দিয়ে শোধ করলেই হবে।

আবার সে চারিপাশে দেখিয়া কহিল—ও মা, খড়কুটোও যে নাই, দাঁড়াও আমি নিয়ে আসি দ্রুত।

গিরি অতি ব্যগ্রতায় বাধা দিয়া কহিল—এক কাজ কর ত পাঁচুর মা, খিডকির ঐ কক্ষে ফুলের গাছটা কেটে ফেল। ওতে এখন বেশ ক’দিন রান্নাবান্না চলে যাবে।

—বেশ বলেছ মা, তাই করব, পাঁচুকে বলব আমার, ওবেলা সে কেটে দিয়ে যাবে। আজ-কালের মত আমি দেব এখন, এদিকে গাছটাও শুকিয়ে যাবে।

পাঁচুর মা চলিয়া গেল। কিন্তু গিরির দৃষ্টি বার বার ঐ গাছটার দিকে ছুটিতেছিল। গিরি জোর করিয়া আপনাকে সংযত করিবার চেষ্টা করিল, তবু বার বার ঐদিকে দৃষ্টি যেন ফিরিয়া যায়।

ঠিক কে যেন ডাকে, মাতালের মনকে সুরা যেমন ডাকে।

“গিরি অস্থির হইয়া উঠিল। সহসা ঘরের মধ্য হইতে কাটারিখানা বাহির করিয়া আনিয়া গাছটার গোড়ায় নিজেই সে আঘাত করিতে বসিল। আঘাতের পর আঘাত। সে আঘাতে ছোট গাছটা থরথর করিয়া কাঁপিতে কাঁপিতে মাটির উপর আছাড় খাইয়া পড়িল।

শীতের দিনেও বিপুল উত্তেজনায় ঘর্মাক্তা গিরি বিচিত্র দৃষ্টিতে গাছটার পানে চাহিয়া রহিল।

বাড়ির ভিতর কাহার কণ্ঠস্বর শোনা গেল। পরিচিত কণ্ঠস্বর, কিন্তু উত্তেজনায় মধ্যে মাহুঘটিকে গিরি স্পষ্ট চিনিতে পারিল না। সে তাড়াতাড়ি ঘরের মধ্যে আসিয়া মাহুঘটিকে দেখিয়া যেন পাথর হইয়া গেল।

গিরির ভাগ্যাকাশের ধুমকেতু হরিলাল সম্মুখের দাওয়ায় দাঁড়াইয়া হি হি করিয়া হাসিতেছে।

একদকা হাসিটা শেষ করিয়া হরিলাল কহিল—জীতা রহো ভাই, জীতা রহো; বহুত আচ্ছা, এহি ত চাহিয়ে।

উত্তরের প্রত্যাশায় কণেক অপেক্ষা করিয়া হরিলাল আবার কহিল—কেয়া ভাই, গরীব আদমী কেয়া কসুর কিয়া আপকো পাশ? একঠো বাত ত বোলনা চাহি—

গিরি এতক্ষণে আত্মসংবরণ করিয়া কহিল—কোন সাহসে তুমি আমার বাড়িতে মাথা গলাও লজ্জা করে না তোমার ?

হরিলাল হা হা করিয়া হাসিয়া কহিল—সীতারাম—সীতারাম, লজ্জানরম ত হামারা নেহি ছায়—উ ত আওরং জেনানা কি চিজ ; হাম মর্দানা ছায় ।

আবার একচোট জোর হাসি হাসিয়া কহিল—আর সাহস ? আরে এ ত আমার খন্তরবাড়ি, খন্তরবাড়ি আসতে সাহস দরকার হয় নাকি ?

গিরি প্রবল উত্তেজনা করিয়া কহিল—বেয় হয়ে যাও বলছি আমার বাড়ি থেকে, এখনি বেয় হয়ে যাও, নইলে—সঙ্গে সঙ্গে তাহার হাতখানা ছুটিয়া উঠিল, সে হাতে তাহার কাটাঘি ।

মাহুঘের মূর্তি দেখিয়া তাহার ভবিষ্যৎ কর্ম মাহুঘ অলুমান করিয়া থাকে । উত্তেজনাদৃষ্টা খড়্গহস্তা মেয়েটিকে দেখিয়া হরিলাল ভয় পাইয়া গেল—সে বুঝিল এ সর্বনাশী এখন পারে সব ।

হরিলাল পলাইল । কিন্তু দরজার মুখেই একবার ফিরিয়া দুই কলি গান সে গাহিয়া গেল, কহিল—একটা গান বেঁধেছি শোন সখি—

বিপিনে গোপাল বিহার করেন আমার বি-পিন বি-হারী ।

দ্বিতীয় কলি আর সে গাহিতে পাইল না, গিরিও আর শুনিল না । বর্ণ-বৈচিত্র্যময়ী লংসার তাহার চোখের সম্মুখ হইতে মুছিয়া যাইতেছিল—অক্ষুট একটা আত্ননাদ করিয়া সে মাটিতে লুটাইয়া পড়িল ।

*

*

*

মাহুঘের মনের চেয়ে বড় শত্রু বোধ করি মাহুঘের আর নাই ।

সর্বাস্তঃকরণে মাহুঘ যে-চিন্তা, যে-কল্পনাকে সভয়ে দূরে ঠেলিয়া রাখিতে চায়, সেই চিন্তা সেই কল্পনাকে মন ডাকিয়া আনিয়া বসে ।

বার বার মৃত্যুকে গিরির মন ডাকিয়া ডাকিয়া আনিতেছিল । ঘরের অন্ধকার কোণ হইতে কে যেন ফিস্ ফিস্ করিয়া কহিল—বিষ নে ।

গিরি সভয়ে ছুটিয়া বাহিরে আসিয়া বসে । বাহিরে রৌদ্রকরোজ্জ্বল ফুল ফলে মাধুর্ঘ্যময়ী পৃথিবীর মধ্যে অনিবার তাহার মনে পড়িতে লাগিল কোথায় কোথায় বিষের গাছ ফল লইয়া দাঁড়াইয়া আছে ।

বহুকণ পর পাঁচুর মা আসিয়া অবাক হইয়া গেল । সে কহিল—ওকি বোমা, উনোনের কাঠকুটো তেমনি পড়ে রয়েছে । এখনো রাঁধা-বাড়া কর নি ?

মাহুঘকে দেখিয়া মৃত্যু যেন পলাইল । গিরি পরম আশ্বাস পাইয়া কহিল—তুমি একটু বাঁস পাঁচুর মা ।

পাঁচুর মা আশ্চর্য হইয়া গেল । সে কহিল—বলব বলেই ত এলাম মা । কিন্তু খাওয়াদাওয়া কর নি যে ?

—এই যে করি । ভাবলাম বেলা একটু যাক, দু'বেলার খাওয়া এক বেলাতেই সারব । সে উঠিয়া উনান ধরাইয়া রান্না চাপাইয়া দিল । পাঁচুর মা কহিল—কাল বুঝলাম বোমা,

মোটো মোড়লের কথায় তুমি রেগে উঠতে কেন।

গিরি কাদিয়া ফেলিল। পাঁচুর মা নিজেই কহিল—কৈদো না মা, কৈদো না। যে যা বলবে বলুক, আমি ত জানি বোঁমা সব। তাই ত বললাম আমি পাঁচুকে, আমাদের জাত-জাতের আর পঞ্চায়েৎকে, যে নিষ্পাপ তাকে পাপী বললেই যখন অপরাধ হয় তখন তাকে আমি ছাড়ব কি করে ?

গিরি মুখ তুলিয়া পাঁচুর মায়ের দিকে চাহিল। পাঁচুর মা আশ্বাস দিয়া কহিল—তুমি ভেবো না বোঁমা, পাঁচুও যদি আমায় ছাড়ে আমি তোমায় ছাড়ব না।

রাত্রে শুইবার সময় গিরি প্রশ্ন করিল—আচ্ছা পাঁচুর মা, মাহুকে মরণে তাকে এ কি সত্যি ?

প্রশ্নটা না বুঝিয়া পাঁচুর মা গিরির মুখের দিকে চাহিয়া রহিল। গিরি কহিল—লোকে যে বলে গলায় দড়ি দিতে গিয়ে যদি না মরে তবে মরণ দড়ি হাতে নিয়ে তাকে ডেকে বেড়ায়। বিষ খেতে গিয়ে না খেলে বিষ নিয়ে নাকি সে ডাকে !

পাঁচুর মা উত্তর দিল—হ্যাঁ মা ; মাহুকের ও-ইচ্ছে বড় মন্দ। ওতেও পাপ হয়। সত্যিই যে আত্মহত্যা করতে গিয়ে না মরতে পারে, কি মরণ না হয়, মরণ তাকে ডাকে।

অন্ধকার শয্যায় গিরি উঠিয়া বসিল। পাঁচুর মা তাহা অসুভব করিয়া কহিল—উঠে বসলে যে বোঁমা ?

—আমায় একটু দাঁড়াবে পাঁচুর মা ?

—কোথা ? এত রাত্রে কোথা যাবে ?

—এই খিড়কির ঘাটে।

পাঁচুর মা আর কোন প্রশ্ন করিবার পূর্বেই গিরি দরজা খুলিয়া উঠিয়া পড়িল। ঘাটে আসিয়া গিরি কি একটা ভারি জিনিস সশব্দে পুকুরের জলে ফেলিয়া দিল। আর বিস্মিতা হইয়া পাঁচুর মা কহিল—কি বোঁমা ?

—কাল বলব পাঁচুর মা।

ঘরে শুইয়া আবার কতক্ষণ পরে গিরি ডাকিল—পাঁচুর মা !

পাঁচুর মাও ঘুমায় নাই। সে তখনও ভাবিতেছিল সেই নিষ্কিন্তু জিনিসটির কথা। সে উত্তর দিল—কি বলছ বোঁমা ? ঘুম আসছে না ?

—আর একটু সরে এসো না এদিক দিয়ে। আমার বড় ভয় করছে।

—ভয় কি মা ? তুমি নিশ্চিন্ত হয়ে ঘুমোও, আমি জেগে রয়েছি।

আবার অল্প নীরবতার পর গিরি কহিল—তখন কি ফেললাম জান পাঁচুর মা ?

—কি ?

—দাঁখানা।

পাঁচুর মা আশ্চর্য হইয়া গেল। গিরি কহিল—কি জানি কখনও যদি গলায় দিয়ে বসি। মরণ যেন সত্যিই আমায় ডাকছে।

পাঁচুর মা কথা কহিল না। কিন্তু তাহার একখানি হাত গিরির সর্বাঙ্গে একটা নিবিড় স্নেহস্পর্শ মাখাইয়া দিল। নিজের অস্পৃশ্যতার অপরাধ সে ভুলিয়া গিয়াছিল। ভুলিয়া যাইবার কথা। মানুষ যখন মনুষ্যত্বকে বুকের মধ্যে পায় তখন সে মানুষ ছাড়া আর কিছুই নয়। সে মানুষের জাতি নাই, ধর্ম নাই; তখন সে কারও অপেক্ষা ছোট নয়, শ্রেষ্ঠত্বের অহঙ্কারও তার মধ্যে তখন থাকে না।

গিরিও আজ তাহার স্পর্শে সংকোচ বোধ করিল না। স্নেহ-কাঙালী শিশুর মতই সে স্নেহস্পর্শে উপভোগ করিতেছিল। কতক্ষণ পর একটা দীর্ঘশ্বাস ফেলিয়া সে কথা বলিল।

—মরণে আমার আশ্বেপ কি বল ত পাঁচুর মা? আমার বেহায়া মনকে সেই কথাই ত বার বার বলি। কিন্তু তার ভয় ঘোচে না—তার আশা মেটে না। এখনও তার আশা হয়! ছি!

আবার সে কহিল—বেশি আশাও ত কোনদিন করি নি আমি। আশা করোছলাম নিৰ্বাঞ্ছাট একখানি কঁড়েঘর, স্বামী সন্তান। সংসারের সব চেয়ে কুংসিং একটি ছেলে যে শুধু আমার মা বলে ডাকবে, হেসে কেঁদে আমার ঘর ভরে তুলবে। এও কি খুব বেশি পাঁচুর মা?

পাঁচুর মা কহিল—ভগবান কোঁকেও যদি তোমার একটি দিয়ে থাকেন বোঁমা!

অশিক্ষিত বাগ্‌দীর মেয়েটি এতক্ষণে খুঁজিয়া খুঁজিয়া একটি সান্দ্রনাবাগী আবিস্কার করিয়া ছিল বোধ করি।

গিরি চমকিয়া উঠিল। কিন্তু পরের মুহূর্তেই তাহার মুখে ফুটিয়া উঠিল অতি তিক্ত হাসির রেখা। অতি স্বল্প আলোয় বয়স্ক পাঁচুর মায়ের চালসে-ধরা চোখের দৃষ্টি গিরির মুখের সে হাসি দেখিতে পাইল না, দেখিলে সে শিহরিয়া উঠিত। গিরির মনে পড়িল—গলার কবচ মাদুল পচা পুতুরে বিসর্জন দেওয়ার কথা; মনে পড়িল শ্রীমন্তের সেই কথাগুলো।

মানুষের মন কিন্তু আশ্চর্য। কয়েক মুহূর্ত পরেই গিরির মন ব্যাকুল আগ্রহে পাঁচুর মায়ের কথা-গুলি আঁকড়াইয়া ধরিল। সেই সঙ্গে তার পরের মুহূর্তগুলি তাহার নিকট পরম উপভোগ্য হইয়া উঠিল। একটি শিশু, তাহার রূপ, তাহার অবয়ব, মুখ, চোখ সব সেই অন্ধকারের মধ্যেও পরিষ্কটরূপে ভাসিয়া উঠিল।

চালের ফুটাটা দিয়া আজও তেমনি আকাশের তারা দেখা যাইতেছিল। সে রাত্রে গিরি কিন্তু তাহার কল্পনার শিশুটিকে স্বপ্ন দেখিল না—দেখিল গৌরীকে।

আঠারো

দিন কয় পর।

জল থাইবার বেলায় পাঁচুর মা আসিয়া সংবাদ দিল আজ নাকি গ্রামে বড় পঞ্চায়েৎ বলিয়াছে। সমস্ত গ্রামের পঞ্চায়েৎ। বিপিন দশের কাছে একটু সলজ্জ হাসিয়া বিনা বাক্যব্যয়ে

নিজেকে গিরির সহিত জড়াইয়া দিয়াছে। সে কথা শুনিয়া গিরির আর বিশ্বাসের অবধি রহিল না। জীবনে এত বিশ্বাস তাহার কোন দিন হয় নাই।

পাঁচুর মা অবশেষে কহিল—চন্দ্র সূর্য ত এখনও উঠছে বোমা!

নির্ধাক বিশ্বাসে শুকচক্ষে গিরি পৃথিবীর চারিদিকে চাহিল। প্রকৃতির কোন পরিবর্তন হইল না। গিরির চক্ষেও বোধ হইল না। শীতশেষের তপ্ত উজ্জল মধ্যাহ্ন যেমন ছিল তেমনি রহিল। বাড়ির পিছনে কোন একটা গাছে সেই দিনই বোধ হয় প্রথম ফুলটি ফুটিয়াছে। কাল ত এ মিষ্টি গন্ধটুকু পাওয়া যায় নাই।

আবার পাঁচুর মা বলিল—ও-বেলায় আবার আমাদের ডেকেছে মা।

একটা দীর্ঘশ্বাস ত্যাগ করিয়া গিরি ধীরে ধীরে হাতের কাজটা আবার আরম্ভ করিল। তারপর একলম্বয় সে কহিল—তোমাদের পক্ষাঘ্নে তোমাকে কি বলেছে নয় পাঁচুর মা? সেদিন বলছিলে?

অজ্ঞাতির হৃদয়হীনতার লজ্জা যেন পাঁচুর মায়ের মাথায় চাপিয়া বসিল। অবনত মস্তকে মুহূৰ্ত্তে সে বলিল—হ্যাঁ মা, কাল ত বললাম তোমাকে।

গিরি শুধু বলিল—হঁ।

পাঁচুর মা কহিল—আমিও ত তোমাকে বলেছি বোমা—

বাধা দিয়া গিরি কহিল—না পাঁচুর মা, আমার জ্ঞান তুমিই বা দশজনকে ত্যাগ করবে কেন?

পাঁচুর মা বিরক্ত হইল, ক্ষুব্ধ হইল। কহিল—তোমার মেজাজ বড় খারাপ বোমা। বিধাতার এত যা তুমি নইতে পারছ আর মাহুঘের দশটা কথা তোমার সহ্য হবে না?

গিরি উদ্বীষ্ট হইয়া উঠিল। উত্তেজিত কণ্ঠেই সে কহিল—তাকে যে দেখতে পায় না পাঁচুর মা, নইলে জানোয়ারের মত টুঁটি কামড়ে ধরত তার মাহুঘ। যাক্ তুমি যদি আমার মা হয়েই থাকবে, তবে এক কাজ কর। যাও দেখি, ও-গাঁয়ে ভবি মোড়লের ধানটা পাওয়া যাবে কি না দেখে এস।

পাঁচুর মায়ের ভয় হইতেছিল। সত্ত্ব সত্ত্ব এই বিশ্রী কথাগুলো রটনার পরই সেখানে যাওয়া ঠিক হইবে কিনা সেই কথাই সে ভাবিতেছিল। সে ইতস্ততঃ করিয়া কহিল—হুঁদিন যাক্ না বোমা।

গিরি ঈষৎ হাসিয়া কহিল—যাও না মা। ফিরিয়ে দেয় দেবে। যে মিথ্যে কলঙ্ক আমার মাহুঘে রটালে সে কি মাহুঘ কখনও ভুলবে? মিথ্যেকে সত্যি প্রমাণ করবার জ্ঞান দিন দিন তার গায়ে রং চড়াবে। তার চেয়ে তুমি যাও, যা হবার আজই হয়ে যাক্। আজই ঠিক করে ফেলি এ-গাঁয়ে থাকতে পাব কি না। না খেতে পেলে শুধু ত মাহুঘ পেটে কাপড় বেঁধে পড়ে থাকতে পারবে না।

গিরির কথাগুলার মধ্যে একটা দৃঢ়তা ছিল। পাঁচুর মা সে কথা লক্ষ্যন করিতে পারিল না।

অদৃষ্টের সঙ্গে যুদ্ধে মরণের ভয়ে যে মাহুঘটি ঠিক আজিকার দিনটির পূর্ব পর্যন্ত আত্মহারা

হইয়া গিয়াছিল, মানুষের সঙ্গে স্বপ্নের সন্ধান পাইয়া সেই মানুষটি একমুহুর্তে পাখরের মত কঠিন ও দুর্জয় হইয়া উঠিল কেমন করিয়া? পাঁচুর মা গামছাখানা মাথায় দিয়া বাহির হইতে হইতে সেই কথাই ভাবিতেছিল।

মেয়েটির চরিত্রের অন্ত পাইল না সে।

গিরি ঘরখানিতে ঝাঁটা বুলানো শেষ করিয়া বালতিতে গোবরমাটি গুলিয়া মোঝে নিকাইতে আরম্ভ করিল।

কাজ করিতে করিতে অকস্মাৎ আপন মনেই সে কহিল—ভাল, মরব না আমি। দেখব, কে আমার কি করতে পারে!

*

*

*

বিপিনের এতখানি সাহসও ছিল না, বুদ্ধিও খেলিত না। পঞ্চায়েতের তলবের পূর্বে এটুকু যোগাইয়া দিল হরিলাল। কহিল—একটুখানি লজ্জার হাসি হেসে দিস দাদা, সব ঠিক হো য়ায়েগা।

বিপিন বিস্ফারিত নেত্রে হরিলালের মুখের দিকে চাহিয়া রহিল। তারপর কহিল—কিন্তু সে যে একেবারে মিথ্যে ওস্তাদ। আমার পাপে নির্দোষ স্ত্রীলোককে—

হরিলাল তাহাকে কথা শেখ করিতে দিল না। ব্যঙ্গ করিয়া কহিল—ছাড়ান দাও বাবা ধর্মরাজ, যশ্বিন দেশে যদাচার—নেপালে মহিষ ভক্ষণ। এ দিগের এই আচার যে দাদা। ঠেলে ফেলে না দিলে ও মেয়ে ডুববার নয়।

বিপিন নখ দিয়া মাটি খুঁড়িতেছিল। কহিল—না না না; তারপর সমাজে আমার কি হবে?

হরিলাল গান ধরিয়া দিল—পুরুষো পরশ-মণি। পুরুষকে পতিত করে কে কোন্ কালে যে!

হরিলালের বুদ্ধি ও সাহসে বিপিন কাষ্ঠ-হাসি হাসিয়া কাজ হাসিল করিল।, কিন্তু সেই কাষ্ঠহাসিটুকু হাসিতেই বেচারার ঘামিয়া সারা হইল।

হরিলাল আপন মনেই কহিল—এমন ছোটলোক পাণ্ডী আমি খুব কম দেখেছি। শালাদের পাপ করবার ইচ্ছে বোল আনা, শুধু ভয়ে পারে না।

বিপিন আপন কৃত্তিতে উৎফুল্ল হইয়া উঠিয়াছিল। আরও এতক্ষণে সে বুঝিয়াছিল—গিরি কেমন পাকে পড়িয়াছে। সে হরিলালের কাছে আসিয়া কহিল—ভারি ফন্দি ঠাউরেছিলে ওস্তাদ!

হরিলাল কহিল—ভাগু।

সে চলিয়া যাইতেছিল। কিন্তু পরক্ষণেই ফিরিয়া বিপিনকে ডাকিয়া কহিল—হামারা ইনাম? ইনাম ত মিলনা চাহি।

বিপিনও হিন্দী বাত ঝাড়িয়া দিল—জরুর। আজ কিন্তু রাতকো একঠো জলসা হোনা চাহি। মালকোষ একঠো তুমারা পাশ তনুনে হোগা ওস্তাদ।

হরিলাল কহিল—সব হোগা ভাই। হামারা রূপেরা ঠো ত আগাড়ি মিলনা চাহি।

একিকে তুমুল তর্কে পঞ্চায়েতের আলোচনা চলিয়াছিল। লুচি কি অগ্নের ভোজন শাস্তি-
স্বরূপ নির্ধারিত হইবে সেইটাই আলোচনার বিষয়। পাঁচুর মা এবং পাঁচু নির্বাক হইয়া বসিয়া
আছে। দণ্ড তাহাদেরও হইবে।

*

*

*

সন্ধ্যার পর গিরি পাঁচুর মায়েঃ অপেক্ষা করিয়া বসিয়া আছে। নদীর ধারে একটা প'ড়ো
বাড়িতে কোলাহল উঠিতেছে—বিপিনের প্রীতিভোজ—নাচ, গান, বাজনা, চিংকার—সে এক
তাণ্ডব। গিরির বাড়ি হইতে সে কলরব শোনা যাইতেছে; ঘরে শুইয়া গিরির সর্বাঙ্গ থরথর
করিয়া কাঁপিতেছে। সম্মুখে ঘনাক্ষকার রাত্রি। পাঁচুর মা কখন আসিবে!

গিরি চারিদিকে চাহিয়া খুঁজিল। খুঁজিল সেই দা-খানা। যেখানা জলে সে ফেলিয়া
দিয়াছে। নিজের হাতে মরণ হইতে বাঁচিতে গিয়া পরের হাতে মরার পথ নিষ্কণ্টক করিয়া
দিয়াছে।

নাঃ, পাঁচুর মা আজ আর আসিল না, সে আর আসিবে না।

সন্ধ্যায় সমাজের মজলিসে তাহার ডাক হইয়াছিল। পঞ্চায়েৎ তাহাকে বলিয়াছে—
হিমন্তের পরিবারের সঙ্গে কাজকর্মের সন্ধান রাখ ক্ষেতি নাই, কিন্তু রাতে গুর বাড়ি তোমার
থাকা হবে না। গুর স্বভাব খারাপ।

পাঁচুর মা কি একটা বলিতে গিয়াছিল, কিন্তু পঞ্চায়েৎ সেদিন নেশায় বিভোর, সেকথা তাহার
তাহাকে বলিতে দিল না, বলিল—উহ, কোন কথাই না, দূতীগিরি মহাপাপ, রাতে তুমি থাকলে
কুটনীর কাজ করা হবে।

পাঁচু চূপ করিয়া বসিয়াছিল। গোড়া হইতেই তাহার একটা সন্দেহ ছিল; বিপিনকে
একদিন রাতে সে শ্রীমন্তের বাড়ি হইতে পলাইতে দেখিয়াছে, আজ আবার বিপিন যখন
পঞ্চায়েতের সম্মুখে অপরাধটা স্বীকার করিয়া দণ্ড লইল—জরিমানা দিল—তখন সে গিরির
অপরাধ সম্বন্ধে নিঃসন্দেহ হইয়া মাকে বলিল—তুই যদি গুর বাড়ি যাস—তাব আমি গলায়
দড়ি দোব।

রাত্রি অধিক হইয়া আসিল, নদীতীরে তাণ্ডব কোলাহল নীরব হইয়া গেল, গিরি স্বস্তির
একটা দীর্ঘশ্বাস ফেলিয়া চোখের উন্মুক্ত দুইটি পাতা মুদ্রিয়া এক করিল।

নিমন্তক রাত্রি—গুধু দূরে একটা কুসুর বোধ হয় শীতের তাড়নায় কাতর ধ্বনি করিয়া
উঠিতেছে। নদীর ধারে নিশাচর একটা পাখি ঘন ঘন একটা ডাক ডাকিয়াই চলিয়াছে। নিমন্তক
স্বপ্ন জীবরাজ্য।

ছুটি লোক শ্রীমন্তের ঘরের প্রাচীর পার হইয়া লাফ দিয়া বাড়ির উঠানে পড়িল।

বিপিন আর হরিলাল।

পা টিপিয়া হরিলাল গিরির রুদ্ধ দ্বারে কান পাতিয়া দাঁড়াইল।

স্বপ্ন আশ্রয় মাতৃঘের শ্বাস-প্রশ্বাসের শব্দ, চেতনার কোন লক্ষণ নাই। হরিলাল ফিরিয়া
ফিস ফিস করিয়া বিপিনকে বলিল—জানালাটা ভেঙেই আছে, আমি সেদিনে একবার বাড়ি

তুকে এক নজরেই দেখে রেখেছি। একটা ধাক্কা, কিন্তু আমার টাকা—পঞ্চাশ টাকা ?

নেশায় মত্ত বিপিনের বুকটা দুরু দুরু করিতেছিল—আশঙ্কা প্রত্যাশায়। সে কহিল—
একশো, একশো টাকা দেব আমি—

নোটের তাড়া সে হরিলালের হাতে গুঁজিয়া দিল।

হরিলাল অতি আনন্দে বলিল—আও হামারা সাথ। কুছ্ ডর নেহি হায়। হাম বাহারমে
হায়। চলো—উঠো। কিন্তু শোন—গিয়ে হাত দুটো আগে কায়দা করো, বুঝলে !

বিপিন ভীক, কিন্তু সে লম্পট, তার উপর নেশায় উন্মত্ত, সে নিভীকের মত বলিল—উ হাম
দেখলেঙ্গে।

বাংলা ভাষায় আপন উদ্বেজনার দৃপ্ততা প্রকাশ করিয়া উঠিতে পারিল না।

*

*

*

সহসা বাড়ির গাভীটুকুর ভিতরে রজনীর স্থিতি বিচলিত করিয়া একটা অক্ষুট আঁত চিংকার
ধ্বনিত হইয়া উঠিল—তারপর একটা চাপা ক্রন্দনের ধ্বনি।

উনিশ

জেলখানার বড় ফটকটায় প্রবেশ করিতে শ্রীমন্তের বুকটা কাঁপিয়া উঠিল ; জানোয়ারের গিজরার
মত্ত গরাদে-ঘেরা রক্তবর্ণ বিশাল লৌহদ্বার, ভিতরে বাহিরে থাকির উর্দিপরা ভীমকায় প্রহরী—
কাঁধে হিমশীতল লৌহময় মারণাস্ত্র, অভ্যস্তরে তার অগ্নিগর্ভ স্পৃষ্ট মৃত্যু, সারাটা বুক বেড়িয়া
লোহার মোটা শিকলে মোটা মোটা চাবির গোছা। অবিরাম রুদ্ধ শাসন করিয়া করিয়া
মানুষের কোমল রক্তমাংসের মুখও বিভীষণ ভয়াল হইয়া উঠিয়াছে। সে মুখের পানে দৃষ্টিমাত্রেরই
বুকের রক্ত চমকিয়া উঠে।

পিছনের লৌহদ্বারটা তাহাকে গ্রাস করিয়া বন্ধ হইয়া গেল, যেন একটা রাক্ষস আহাৰ
গিলিয়া বিরাট মুখটা বন্ধ করিল।

লোহার গরাদের ফাঁকে ফাঁকে এখনও বিশাল পৃথিবীর শ্রামাঞ্চলখানির অংশ দেখা যাইতেছে,
মাত্র কয়পদ ব্যবধান ; কিন্তু এই কয়পদ ভূমি অতিক্রম করিতে তাহার লাগিবে দীর্ঘ—সুদীর্ঘ
পাঁচ বৎসর ! শ্রীমন্ত একটা দীর্ঘশ্বাস ফেলিল, চোখে জলও আসিয়াছিল, কিন্তু সে জল মাটিতে
ফেলিতে তাহার সাহস হইল না ; সাক্ষনার মমতার স্পর্শ না পাইলে দুঃখ মুক হইয়া যায়, আশ্র-
প্রকাশ করিতে তাহারও তর হয়।

শ্রীমন্তের ধারণা ছিল, তাহার ওই গ্রামখানির মত নিরুপদ মমতাহীন ক্ষেত্র বৃষ্টি ছনিয়ায়
আব নাই—কিন্তু যত্নের মত স্তব্ধ হিমশীতল এই পাষাণ-পথ, প্রতি পদক্ষেপে যে স্থান স্বকঠোর
প্রতিধ্বনিতে গর্জন করিয়া উত্তর দেয়, চোখের জলে যে স্থান গলে না—তার চেয়ে আপন ছায়া-
নিবিড় কোমল স্মৃতিকাময়ী গ্রামখানি ঢের ঢের মমতাময়ী।

কিন্তু ভিতরে গিয়া সে কেবল হাঁক ছাড়িয়া বাঁচিল নর—আশ্বাসে উৎফুল্ল হইয়া উঠিল।

দুর্গাস্ত মাহুঘের মেলা—হাসি, খেলা, গান তাহাদের অক্ষুণ্ণ ।

শ্রীমন্ত আশ্চর্য হইয়া গেল—এমন কেমন করিয়া হয় !

কিছু দিন যাইতে যাইতে সে বুঝিল—হায়, এমন হয়—দুঃখের চেয়ে মাহুঘের প্রাণের শক্তি অনেক বড়—দুঃখ দূর হইতেই অসহ্য ভয়াবহ, কিন্তু তাহাকে যখন মাথায় করিতে হয় তখন সে লঘুভার হইয়া যায়, তচ্ছিল্যের সহিত তাহাকে বহন করা যায় ; প্রাণ শ্রেষ্ট শক্তি, দুঃখের চাপে সে মরে না ।

এতদিনে জেলখানাটা তাহার মন্দ লাগিল না ।

বেশ উদরের চিন্তা করিতে হয় না, পাণ্ডনাদারের তাগিদ নাই—দিনগত পাপক্ষয়—ধানির চারপাশে ঘুরিলেই খালাস ।

দশ সের সরিষার চৌদ্দ পোয়া তেল, বসিয়া বসিয়া তার দিনের হিসাব কর ।

কষ্ট কি নাই ?

আছে বৈকি—লোহার ঘানিটার চারপাশে ঘুরিতে ঘুরিতে সারাটা দেহ যেন পাথরের মত জমিয়া কঠিন হইয়া আসে, রান্না শিরা যেন ছিড়িয়া যায়—রক্ত-মাংসের মাহুঘ পাথর হইয়া পড়ে । কিন্তু কষ্টকে তুচ্ছ করাই ত পুরুষের পৌরুষ ! আর পাথর হইলেই বা ক্ষতি কি ?

সেই ত ভাল, নির্ধাতন সজ্জা পাইবে ।

কিন্তু বুকের ভিতরটা যে পাথর হয় না ; নিত্য রক্তনীতে গিরি যেন ওই লোহার গদাঘের উপর মুখ রাখিয়া দাঁড়ায়, অশ্রুমুখী বিলীর্ণ গিরি—

শ্রীমন্তের বুক কাটিয়া যায় ।

বুকের ভিতরটা ধড়ফড় করিয়া উঠে । শ্রীমন্ত উঠিয়া বসিয়া কত অন্তহীন ভাবনা ভাবে—গিন্নিও হয়ত এমনি করিয়া জাগিয়া বসিয়া রাত্রির অন্ধকারে চোখের জল শেষ করিয়া রাখিতেছে ; দিনে ত তাহার ফেলিবার অবকাশ থাকিবে না—উদরান্নের চেষ্টায় হা হা করিয়া বেড়াইতে হইবে ।

কাজ না পাইলে—হয়ত বা ভিক্ষা ।

শ্রীমন্ত আর ভাবিতে পারে না, সে চিন্তার দায় হইতে মুক্তি পাইবার প্রত্যাশায় পাশের লোকটিকে ডাকিয়া কহে—শশী, শশী, ও শশী !

দুঃখ শশী উত্তর দেয় না—সে পাশ ফিরিয়া শোয় ।

শশীর পার্শ্ব-পরিবর্তনের মধ্যে চেতনার কণি আভাস পাইয়া শ্রীমন্ত কহে—তোয় মার্কায় হিসেব দেখতে বলছিলাম সন্ধ্যায় !

শশী কহে হঁ ।

—জেল তোর কত দিন—ছ মাস ত ?

—হঁ ।

—খাটা হ'ল কতদিন ?

—হঁ ।

শ্রীমন্ত তাকে ঠেলা দিয়া কহে—হঁ কি রে, খাটা হ'ল কতদিন তাই বল, না—হঁ !

খুম্বোরের মধ্যেও বুঝি মুক্তির ব্যগ্রতা বন্দী তুলিতে পারে না, শশী জড়িত কণ্ঠে কহে—দেখ কেন হিসেব করে। চার মাস বিশ দিন হ'ল।

শ্রীমন্ত কহে—তবে ত আর মেরে দিয়েছিস রে ! তিন ছয় আঠারো দিন বাদ গেলে থাকে তোর পাঁচ মাস বারো দিন, আর ধরু গিয়ে তোর বছরের দোসরা মাসের দক্ষণ বাদ যাবে দুদিন—এই তোর হ'ল গিয়ে দশ দিন—পাঁচ মাস দশ দিন—এই তোর চার মাস বিশ দিন—রাত পোয়ালেই একুশ দিন, তা হ'লে আর আছে তোর না ? ন'দিন আর ন'দিন আঠারো দিন—দশ দিনের দিন ত খালাসই পাবি।

শশী কহে—কদিন বললি—কদিন ?

—আঠারো দিন।

—না—আরও একদিন কমবে, খালাসের দিন রবিবার পড়েছে—শনিবার দিন খালাস দেবে।

শ্রীমন্ত একটা দীর্ঘনিঃশ্বাস ফেলিয়া চুপ করিয়া বাহিরের পানে তাকাইয়া থাকে—বাহিরে গভীর নিস্তরঙ্গ অন্ধকার থম থম করিতেছে—সমস্ত ধরণী যেন ব্যথায় মুর্ছিতা, আর ওই কালো অন্ধকার যেন তার আহত বুকের নীল কাঁচা রক্ত ! মাল্লবের আপন অন্তরের প্রতিবিম্ব এমনি করিয়াই নির্জন মূর্তিতে তাহার চোখের উপর বহিঃপ্রকৃতির বৃকে আত্মপ্রকাশ করে।

শ্রীমন্ত আবার একটা দীর্ঘনিঃশ্বাস ফেলিয়া কহে—শশী, আমার একটি কাজ করবি তাই ?

শশীর আবার তজ্জা আসিতেছে। সে তজ্জাযোগেই কহিল—উ ?

—আমার একটি কাজ করবি ?

—হঁ।

—তোকে ত গোকুল-মাটি হয়ে বাড়ি যেতে হবে, তা তুই যদি নদীটা পার হয়ে আমাদের গাঁ হয়ে একবার যাস—

—হঁ।

—আমাদের বাড়িতে যদি আমার খবরটা দিয়ে যাস তাই—

—হঁ।

—আর আমাকে একখানা চিঠি দিতে বলবি।

শশীর আর সাড়া পাওয়া যায় না, তজ্জা বোধ করি ভার হইয়া আসিয়াছিল ; কিন্তু শ্রীমন্তের তাহাতে বিশেষ আসে যায় না—সে আপন মনেই বলে—তোর যত্ন কেমন করবে সে দেখবি, গুরুর আদর করবে। সে-বেলা তোকে যেতে দেবে মনে করেছিল—না থাইয়ে সে কিছুতেই ছাড়বে না।

শশীর তখন নাক ভাকিতেছে, কিন্তু স্মৃতি-স্মরণে ত অপরের সাহচর্যের প্রয়োজন হয় না, বরং নির্জনতাই সে স্মৃতিগাথাকে গাঢ় উপভোগ্য করিয়া তোলে ; ওই প্রগাঢ় অন্ধকারের মাঝেও গিরির স্নান মূর্তি শ্রীমন্তের চোখের সম্মুখে প্রদীপ্ত-হইয়া জাগিয়া উঠে। এই জাগ্রত স্বপ্নে শ্রীমন্ত

অধীর হইয়া উঠে—সে ভাবে কেন, কেন, দেহের মত বুকটাও পাষণ হয় না কেন ?

আবার প্রভাত হইতে কাজ কাজ কাজ, কাজকর্মের ব্যাপৃতিতে সময় কাটিয়া যায় ; বেলা দশটায় যেই আসিয়া হাঁকে—সোলেমান—আপিসে যাও, চিঠি আছে তোমার !

—আমার ?

—আমার ?

—আমার ?

চারদিক হইতে পাষণ-দেহের মধ্যে কোমল মাহুষ আত্মপ্রকাশ করিয়া মমতাকরুণ স্বরে প্রিয়জনদের বার্তার জন্ত জিজ্ঞাসা করে—আমার ? আমার ? অথচ ওরা বেশ জানে যে বার্তা নাই—বার্তা নাই !

শ্রীমন্তও জিজ্ঞাসা করে ; মেট আপন পথে চলিতে চলিতে সমবেত গ্রন্থের জবাব দিয়া যায়—না, না, না !

দুয়ারের শাস্ত্রীরা কঠোর ভাবে শাসন-বাণী গর্জন করে—চালাও চালাও—সব কাম চালাও ।

কিন্তু ‘কাম’ যে চলে না, পাথরের মত শক্ত দেহ অবশ হইয়া আসে যে !

সেদিন সকাল বেলায় হুকুম আসিল—শ্রীমন্তকে বদল করা হইয়াছে, তাকে যাইতে হইবে অপর জেলে ।

সম্বন্ধহীন দুর্দান্ত পর, তবু তারা শ্রীমন্তকে বিদায়-সম্ভাষণ জ্ঞাপন করে, কত জন কত গোপন সংবাদ বলিয়া দেয়—অমৃকের সঙ্গে দেখা করিস, অমুক আছে সেখানে ; অমুক মেটের সঙ্গে বুঝে চলিস, শালা এক নম্বর বদমাশ । তবে কালো-পাগড়িটা লোক ভাল, আমার নাম করিস ।

শ্রীমন্ত শীকে ডাকিয়া কহিল, তোর ত ভাই আর তিন-চার দিন আছে, দেখিস ভাই, আমার বাড়ি হয়ে যাস, আমার খবরটা দিবি আর একখানি ‘চিঠি’ আমাকে দিতে বলবি ।

শী কহিল—কোন ভাবনা ক’রো না দাদা, আমি নিশ্চয় বলে যাব । আমি যাব ধর চার দিনের দিন, তোমার সাত দিনের দিন নিট তুমি চিঠি পাবে !

*

*

*

আবার নতুন স্থান, নতুন সাথী সহচর, কিন্তু নামই নতুন, সেই সব, সেই নির্মম নীরস পাষণ-আবেষ্টনী, সেই নির্মম কঠোর শাস্ত্রীর দল, সেই দুর্দান্ত বন্দী সহচর সব, সেই কর্মধারা, সেই জীবনধারা, এতটুকু এদিক-ওদিক নাই, শুধু মুখ চিনিতে সময় লাগে ।

একদিন পথে কাটিয়াছে, তার পর দিন যায়, আর শ্রীমন্ত দিন গনিয়া যায়—দুই—তিন—চার—পাঁচ—ছয়—সাত ।

সকালবেলা হইতেই সেদিন শ্রীমন্তের বুকটা কেমন করে ।

বেলা দশটার সময় মেট আসিয়া হাঁকিল—জাফর শেখ, হাবল বাঙ্গী, চিঠি আছে, আপিসে—

—আমার ?

শ্রীমন্তের কর্ণধ্বনিতে সকলে চমকিয়া উঠিল, মেট আর যাইতে যাইতে উদ্ধর দিতে পারিল

না, সে কিরিয়া শ্রীমস্তের মুখপানে চাহিল কহিল—কই আর কারু ত চিঠি নাই।

শ্রীমন্ত বুকে ঘানির ডাঙাটা লাগাইয়া দাঁড়াইয়া গেল—শাস্ত্রী তাড়া দেয়, কিন্তু শ্রীমন্ত তবু দাঁড়াইয়া থাকে।

সিপাহী আসিয়া পিঠে পোটির একটা অঘাত করিয়া তাহাকে সচেতন করিয়া দিল।

শ্রীমন্ত বারেক চমকিয়া সিপাহীটার পানে একটা হিংস্র দৃষ্টি হানিয়া আবার ঘানি টানিতে লাগিল—টানিতে টানিতে আপন মনেই সে মুহু গুঞ্জে গান ধরল—

“মন তুমি কার, কেবা তোমার,

এ ছনিয়া ভোজের বাজি।”

ছনিয়া হয়ত সত্যই ভোজের বাজি, কিন্তু ছনিয়ার মাহুষ তার সৃষ্টির মধ্যে ওই ভোজ-বাজিরই জীড়াপুস্তলী। তাই বাজির ভেদে এড়াইয়া তাহার চলিবার উপায় নাই, তাই কেউ কাহারও নাই, জানিয়াও পরের জন্ত মাহুষকে ভাবিতে হয়—সে ভাবনার দ্বার ত রোধ করিবার উপায় নাই, চিরদিন অনাহুতই সে আছে—সলাটে নয়নপ্রান্তে গোধুলির আকাশের মত একটি বিষম ছায়া ফেলিয়া। আবার এই ভাবনাই মাহুষের জীবনের পাথেয়, এ নহিলে মাহুষ বাঁচে না।

শ্রীমন্ত ভাবিল, সারাটা রাত্রি কত সৃষ্টিছাড়া কল্পনা তাহার প্রিয়তার চিন্তার ধ্যানে ক্ষণে ক্ষণে ব্যাঘাত দিল।

শশী হয়ত যায় নাই, সংবাদ দেয় নাই।

আবার চিঠি লিখিতে পরসাত্ত ত চাই!

গিরি হয়ত বাড়িতেই নাই—অভাবের তাড়নায় দেশ-বিদেশে কোথাও দাসীবৃত্তি করিতেছে!

আবার মনে হয় গিরি হয়ত বাঁচিয়াই নাই, অভিমানিনী গিরি! সে হয়ত গলায় দড়ি দিয়া সর্ব জালা-যজ্ঞা এড়াইয়া চলিয়া গেছে।

বিপিনের ধান হয়ত অভাবের জ্বালায় ভাঙিয়া থাইয়াছে—বিপিন কটুকাটব্য করিয়াছে, হরিহরের মা সেই দুইটা টাকার জন্ত কত কথাই বলিয়াছে; হয়ত বা হরিলাল আসিয়া কত নিষ্ঠুর ব্যঙ্গ করিয়া গিয়াছে। আর অভিমানিনী গিরি এমনি এক অন্ধকার রাত্রে ঘরের মধ্যে গলায় দড়ি দিয়া কোন অজ্ঞাত মরণপথে পলাইয়া বাঁচিয়াছে। হু হু করিয়া শ্রীমস্তের চোখ দিয়া অশ্রু নামিয়া আসিল। কতক্ষণ চলিয়া গেল—সহসা শ্রীমস্তের মনে হইল হয়ত বা কটকে তাহার চিঠি চাপিয়া রাখিয়াছে, শান্তি দিবার জন্ত ত অগণ্য পত্র ইহাদের, হয়ত উপর হইতে হুহুম আসিয়াছে, শ্রীমন্ত ঘোষকে চিঠিপত্র যেন না দেখয়া হয়।

আচ্ছা কাল দেখা যাইবে, একদিন দেরি হওয়া আশ্চর্য নয়, কিন্তু কাল তাহার পত্র আসিবেই।

দশটায় মেট আসিয়া হাঁকিয়া গেল—হরেকৃষ্ণ ডোয়, জলিল শেখ, মহবুব আলি—পত্র আছে।

শ্রীমন্ত আজ আর জিজ্ঞাসা করিল না—আমার ?

সে ঘানির ডাঙাটা ছাড়িয়া দিয়া বাহিরের পানে চলিল। দুয়ারের সিপাহীটা তাকে বাধা দিয়া কহিল—আরে তু কাঁহা যাতা ? শালা ঘানি উলটু দিয়া—

শ্রীমন্ত ধাক্কা দিয়া তাহাকে সরাইয়া ফিরা আবার চলিল। সিপাহীটা এবার ছুটিয়া গিয়া পিছন হইতে তাহার জামা ধরিয়া কহিল—চিঠিচিঠি, চিঠি তোমকো কোঁন দেগা ?

শ্রীমন্ত আপনাকে মুক্ত করিয়া লইতে চেষ্টা করিয়া কহিল, আমার পরিবার আছে ঘরে।

সিপাহী তাহাকে পেটি কথিয়া কহিল—পরিবার আছে, পরিবার আছে, তুমকো লাগিয়ে বসিয়ে আসে উ ; ভাগা কিধার কোইকো সাথ—

শ্রীমন্ত জান হারাইয়া ফেলিল, সে বাঘের মত সিপাহীটার উপর ঝাঁপাইয়া পড়িয়া, ঘুঁষি কিল চাপড়ে তাহার মুখখানা রক্তাক্ত করিয়া দিল।

পিঁজরায় বন্দী বাঘের পালাইবার ত পথ নাই, সে যত হৃদ্যন্ত হইয়া উঠে, তত তাহার বন্ধন দৃঢ় হয়।

শ্রীমন্তের হইল, এই অপরাধের জন্ত আবার বিচার হইল, জেলের বিচারে তাহার রেমিশন কাটা গেল, আদালতের বিচারে আর দুই বৎসর হাজত তাহার বাড়িয়া গেল।

বিচারশেষের দিন সাজা লইয়া শ্রীমন্ত জেলে ফিরিল একটা নিষ্ঠুর হাসি হাসিতে হাসিতে।

আবার কতদিন চলিয়া গেল, আবার সে চিঠির জন্ত অস্থির হইয়া উঠিল, এবার সঙ্গীরা পরামর্শ দিল—এক কাজ কর্ তুই, দরখাস্ত কর্ তুই যে আমার বাড়ির খবর আনিয়া দেওয়া হোক।

—দেবে ?

—আলবৎ দেবে।

শ্রীমন্তের সে সাহস হইতেছিল না—সংবাদের নামে তাহার বুক ধড়াস্ করিয়া উঠে !

জীবনের এতটুকু আশা—কত স্বথস্বপ্ন সে দেখায়—সেটুকু মুছিয়া গেলে বাঁচিবে সে কি লইয়া ?

—কিস্ত—তবু—

কুড়ি

অহল্যার মত গিরি পাথর হইয়া গেল।

এমনি করিয়াই নারী পাবাণী হয়।

পৃথিবীতে মানুষের লজ্জার বাঁধ একবার ভাঙিয়া গেলে হয়। তখন আর কিছুতে ঠেকানো যায় না। চক্ষুজ্ঞা পাপ-পুণ্য সব ভাসিয়া যায়। এ ছনিয়ায় বিকিকিনির হাটে বেনিয়ার দাঁড়িপাল্লার উঠিয়া আপনার ওজনভোর স্বর্ণ মানুষ যখন গনিয়া পায় তখন কি আর রক্ষা

থাকে ? তখন সে আরও চায়, আরও চায়, ; বার বার, বার বার সে আপনাকে বিনিময় করে ! তখনই তার মাহুঘের মহুগুহ হৃদয় মন সব জমিয়া গিয়া হয় পাখর । তার উপর নারী আর পুরুষ !

গিরি যাহা চাহিয়াছিল তাহা সে পাইয়াছে, ভোজ্য পাইয়া তাহার উদর তৃপ্ত ; যাহার ফলে স্বাস্থ্য সুকুমার কাস্তিতে তাহার যৌবনের দেহ ভরিয়া উঠিয়াছে—রূপ যেন দেহে আর ধরে না ; শীথের শীথার পাশে আজ তাহার সোনার গহনা উঠিয়াছে ; জীর্ণ মলিন কাপড়ের পরিবর্তে তাহার সুন্দর দেহখানি ঘেরিয়া সুকোমল শুভ্র, সুস্ব বস্ত্রের সৌন্দর্য ।

গিরি বসিয়া বসিয়া পান চিবায়—আর মাঝে মাঝে ঠোট উল্টাইয়া নতচক্ষে ঠোটের লালিমা পরীক্ষা করিয়া দেখে । সেদিনও সে ঠোটের উপর পানের রঙ কেমন খুলিয়াছে—দেখিতেছিল ।

ওদিকে বাঙ্গীপাড়ায় কে যেন বিনাইয়া বিনাইয়া মর্মস্পর্শী কান্না কাঁদিতেছে । বিলাপের ভাষাও কিছু কিছু বোঝা যায়—ওরে সোনা, ওরে যাহু আমার—

অর্থে বোঝা যায় কোন সন্তানহারা হতভাগিনীর কান্না ।

গিরির কিন্তু এ কান্নার ব্যাকুলতা ভাল লাগে না, সব আনন্দ যেন স্নান হইয়া যায় ; সামান্য বেদনার আঘাতেই তাহার আনন্দের প্রাসাদ থব্ থব্ করিয়া কাঁপে—এ ঘর যেন তাহার তাসের ঘর । এই ঘর ভাঙিয়া গেলে ইহার মধ্য হইতে যাহা বাহির হইবে তাহা কল্পনা করিতেও গিরি শিহরিয়া উঠে । মনে হয় ইহারই মধ্যে সঞ্চিত আছে রাশি রাশি কান্না, সে কান্নার পরিমাণ মাটির বুক হইতে ওই আকাশ পর্যন্ত ভরিয়া উঠিয়াও ফুলাইবে না ।

সে ঈষৎ বিরক্তভরেই কহিল—কে এমন করে কাঁদে গো পাঁচুর মা—

গিরির সব আশাই পূর্ণ হইয়াছে, পাঁচুর মা আজ তাহার বেতনভোগী দাসী ।

পাঁচুর মা একটা বেদনার দীর্ঘশ্বাস ফেলিয়া কহিল—আমাদেরই পাড়ার গোহুলের বোঁ, এই নিয়ে পাঁচটি সন্তান হ'ল মা, তা পাঁচটিই গেল ।

গিরি কিছুক্ষণ নীরবে থাকিয়া আবার সেই বিরক্তভরেই কহিল—দরজাটা বন্ধ করে দিয়ে এস ত পাঁচুর মা, আমার মাথা ধরেছে । ও সইতে পারি না । আমায় ভেকো না পাঁচুর মা, আমার মাথা ধরেছে । বলিয়াই সে নিজের ঘরের মধ্যে ঢুকিয়া ঘরের দরজাটা বন্ধ করিয়া দিল । পাঁচুর মা গালে হাত দেয়, গিরি দিন দিন তাহার কাছে দুর্বোধ্যতর হইয়া উঠিতেছে ।

বৈকালের দিকে বিপিন আসিয়া এদিক ওদিক চাহিয়া পাঁচুর মাকে কহিল—কৈ, গেল কোথায় পাঁচুর মা ?

পাঁচুর মা কহিল—ঘরে শুয়ে আছে ।

বিপিন চমকিয়া কহিল—অসুখ-বিসুখ করে নাই ত ?

ঈষৎ মুখ ঝাঁকাইয়া পাঁচুর মা কহিল—কে জানে বাপু ; ছোটলোক জাত আমরা, ওসব কষণ-কারণ বুঝতেও পারি না ।

দরজা খুলিয়া বাহির হইয়া গিরি ঈষৎ ঝাঁকা হাসি অধরে টানিয়া বলিল—বুঝবার কথা নয়

পাঁচুর মা, সত্যিই এ তুমি বুঝবে না, কিন্তু অসুখ-বিসুখও কি আমার করতে নাই ?

পাঁচুর মা অপ্রস্তুত হইয়া কহিল—তা ত বলি নাই মা, আর তুমিও ত কিছু বল নাই ।

—বলি নাই, তা হবে ; মাথা ধরেছে বলেছিলাম মনে হচ্ছে ; ত থাক, তুমি এখন এস ।

পাঁচুর মা পলায়নের সুযোগ পাইয়া বাঁচিয়া গেল ।

বিপিন এবার আসিয়া গিরি যে দাওয়ায় দাঁড়াইয়াছিল, সে দাওয়ায় বসিয়া কহিল—মাথা ধরেচে ?

—না, কিন্তু আমার হারের কি হ'ল ?

বিপিন কহিল—না, এখনও কিছু হয় নাই, তবে হবে ।

গিরি অতুলিত দৃঢ় কণ্ঠে কহিল—কিন্তু সে কথা ত ছিল না ।

বিপিন কাকুতি করিয়া কহিল—বড় টানাটানি যাচ্ছে ।

গিরি হাসিয়া কহিল—সে কি আমার দেখবার কথা ? মনে আছে তোমার, আমি চেয়েছিলাম—টাকা, গয়না, কাপড় !

—তা কি দিতে কল্প করি আমি গিরি ? আমি জমি বিক্রি করেছি ।

গিরি কহিল—কত দিয়েছ, তোমার আজ জমি গিয়েছে আবার কিনবে, যা ছিল তার চেয়েও বেশি হতে পারবে ; কিন্তু আমার যা গিয়েছে তা কি ফিরবে, ফিরিয়ে দিতে পারবে ?

বিপিন নীরব হইয়া বসিয়া রহিল, কোন উত্তর ত ইহার নাই ।

গিরি কহিল—কাল দেবে বায়না ?

বিপিন উঠিয়া হাত ধরিয়া কহিল—দোব, দোব, দোব—তিন সত্যি করছি । আমার উপর রাগ করো না তুমি । বলিয়া সে আবেশভরে গিরিকে বুকে টানিয়া লইতে চাহিল, কিন্তু গিরি বাধা দিয়া কহিল—ওই মেয়েটাকে কঁাদতে বারণ করে এস তুমি, আমার বুকের ভেতর কেমন করছে ।

সন্তানহারা হতভাগিনীর দুর্বল কণ্ঠ তখনও রহিয়া রহিয়া ধ্বনিয়া উঠিতেছিল—ওরে যাহু রে ।

একুশ

মাস পাঁচেক পর ।

একটা আলস্তে, ক্লান্তিতে গিরি ক্রমশঃ যেন অবসন্ন হইয়া পড়িতেছিল ।

পাঁচুর মা আসিয়া ডাকিল—বোমা !

সে মাটিতে আঁচল পাতিয়া শুইয়া রহিল । সে পাঁচুর মায়ের কথার কোন জবাব দিল না ।

দেহ কেমন অবসন্ন হইয়া উঠিয়াছে । শরীর তাহার বেশ ভাল বোধ হইতেছিল না । ক্লান্তিতে দেহ আর বয় না । তন্ময়সত্য সর্বদাই শুইয়া থাকিতে ইচ্ছা করে । সেই সর্বনাশী আবার তাহাকে দেখা দিতে আরম্ভ করিয়াছে । মধ্যে মধ্যে আত্মহত্যা করিবার কামনা

তাহারা জাগিয়া উঠে। নির্জন নিঃসঙ্গ অবসরে সে তাহাকে ডাকে—কখনও স্মরণ করাইয়া দেয়—কোথায় বিষ-ফলের গাছ, কোথায় দড়ি, কোথায় খড়গ, গভীর জলতল কেমন শীতল !

সেদিন আকাশে মেঘ দেখা দিয়াছিল। প্রভাত পাণ্ডুর হইয়া উঠিয়াছে। সম্মুখেই ঢেঁকি-শালের চালটার ওপাশে তালগাছের মাথাগুলি দেখা যাইতেছিল। বড় দেবদারু গাছটার নূতন কচি পাতা দেখা দিয়াছে। তাহারই ডালে বসিয়া হলুদ রঙের অতি সুন্দর পাখিটা শিব দিয়া ডাকিতেছিল—কৃষ্ণের পোকা হোক।

গিরি সেই ডাক শুনিতে শুনিতে কহিল—মিছেই ডেকে মরলি তুই। কৃষ্ণের পোকা কোন কালে হ'ল না ; হবেও না।

পাঁচুর মা কহিল—না বোঁমা, ওরা ত ও বলে না। বলে গেরস্থের খোকা হোক।

ঈশ্বর হাসিয়া গিরি বলিল—একই কথা মা। ওর অভিশাপও ফলে না, আশীর্বাদেও কিছু হয় না।

—তা হয়ত হয় না বোঁমা। কিন্তু আশীর্বাদও ত করে। মিষ্টি কথাও ত বলে। তাই বা সংসারে কজন বলে !

—তা বটে।

পাঁচুর মা কহিল—আবার সেদিন একজন বৈরাগী বাবাজী বলছিল ওরা নাকি এসব কিছু বলে না। ওরা বলে 'কৃষ্ণ কোথা হে' !

গিরি কহিল—মা মনে করবে, তাই শুনবে তুমি ওর ডাকে !

ঝিরঝির করিয়া খানিকটা বাতাস বহিয়া গেল। গিরির নিজের হাতে পোতা করবী গাছটা সে-বাতাসে লুটোপুটি খাইয়া ছুলিয়া উঠিল। গিরি গাছটার দিকে চাহিয়া কহিল—করবী গাছটায় এক কলসী জল দিয়ো ত পাঁচুর মা !

পাঁচুর মায়ের একটা কথা যেন মনে পড়িয়া গেল। সে কহিল—তোমায় বলতে ভুলে গিয়েছি বোঁমা ! তোমার গাছে এবার কুঁড়ি ধরেছে দেখেছ ?

গিরি অতি-মাত্রায় উল্লসিত হইয়া উঠিল। গাছটির ডালগুলি সমস্তে নোয়াইয়া পরীক্ষা করিতে করিতে কহিল—আমার তা হ'লে নাতনী হবে পাঁচুর মা।

পাঁচুর মা বিস্মিত হইয়া গেল। গিরি কহিল—আমার নিজের হাতে পোতা গাছ—ও আমার মেয়ের মত। ওর ফুল হবে—সে আমার নাতনী হবে না ?

পাঁচুর মা এ কথা'র উত্তর দিতে পারিল না। একটা দীর্ঘনিঃশ্বাসফেলিয়া সে কাজ করিয়া চলিল। এই ব্যাখাতুর নীরব সহানুভূতি গিরিকে স্পর্শ করিল। সে স্নান হাসি হাসিয়া কহিল—যার যেমন অদৃষ্ট পাঁচুর মা।

অদৃষ্টের বিরুদ্ধে বিদ্রোহ ঘোষণা চলে না। পাঁচুর মা চুপ করিয়াই রহিল।

গিরি কহিল—গাছটাকে মাখ খাওয়াতে হবে পাঁচুর মা ! খুব ঘটা ক'রে করব আমি।

পাঁচুর মা এতক্ষণে হাসিল।

সমস্ত দিনটা গিরির মনে মনে একটা পুলক জাগিয়া রহিল। পাঁচুর মা কর্মান্তরে বাহিরে

গেল। গিরি করবী গাছটির নিকটে বসিয়া সঙ্গেহে গাছটির শাখাপ্রশাখায় মায়ের মতই হাত বুলাইয়া কত আদর করিল। কত ছড়া সে গুন্ গুন্ করিয়া আবৃত্তি করিয়া গেল। গৌরী এখান হইতে চলিয়া যাওয়ার পর এ গান আর সে গায় নাই।

অপরাক্ত-বেলায় মাথার উপরের মেঘ কাটিয়া গিয়াছে, দিগন্তরেখার কোলে কোলে শুধু ছিন্ন বিশৃঙ্খল কালো মেঘের স্তর। সে স্তরমালার সর্বাঙ্গ অন্তর্মান রক্তবর্ণ সূর্যের কিরণ-প্রভায় গভীর রক্তবর্ণে বলমল করিতেছিল। আরও উপরের মেঘে মেঘে ক্রমশঃ ক্ষীণ রক্তাভাব সমারোহ। আকাশে রক্তসন্ধ্যা দেখা দিয়াছিল। তাহার প্রতিচ্ছটায় সমস্ত পৃথিবী রঙীন হইয়া উঠিয়াছে।

প্রথম বসন্তের উত্তলা পাখির দল এমন উপভোগ্য সন্ধ্যায় বিচিত্র কলরবে চারিদিক মুখর করিয়া তুলিয়াছিল।

সন্ধ্যার অনতিপূর্বে গিরি কলসীটা তুলিয়া ঘাটের পথে বাহির হইয়া পড়িল। দুঃখদুর্দশা জীবনে তাহার জন্মগত ব্যাধি। তাহার জন্ম লজ্জা বা আক্ষেপ গিরির কোনোদিন ছিল না। কিন্তু স্বামীর হঠকারিতার কর্ণফলে যেদিন গ্রামস্থান লোক কানাকানি করিয়া হাসিল—সেইদিন হইতে আপনার মন্দ ভাগ্যের লজ্জায় গিরি মুখ লুকাইয়া ছিল। ঘাটে পথে সে বড় বাহির হইত না। এই মন্দ ভাগ্যের লজ্জারও উপরে বিল পাওনাদারদের তাগিদে ভয়। কিন্তু যেদিন পঞ্চায়তের দরবারে তাহার কলঙ্কের কৈফিয়ৎ-তলবের বিরুদ্ধে সে বিদ্রোহ করিল, সেইদিন হইতে সে আবার পথেঘাটে বাহির হইতে আরম্ভ করিয়াছিল। তারপর বিপিন যখন তাহার যথাসর্বস্ব হইয়া আসিয়া তাহার পায়ে লুটাইয়া পড়িল—তখন হইতে তাহার জীবনের কলঙ্কিত পতাকাটা আরও উচু করিয়া চলিয়া কিরিয়া বেড়ায়।

গ্রামের প্রান্তে বেনেপুকুর। গ্রাম অতিক্রম করিয়া গিরি মুক্ত মাঠে নামিয়া মুগ্ধ হইয়া গেল। সে যেন রঙের সাগরে ডুব দিয়া উঠিল। কাপড়খানাকে কে যেন লাল রঙে ছোপাইয়া দিয়াছে। অনাবৃত প্রত্যঙ্গগুলি অপরূপ বর্ণশোভায় সুষমামণ্ডিত হইয়া উঠিয়াছে। তিলের সাদা ফুলগুলি আজ যেন রাঙা হইয়া ফুটিয়াছে। পায়ের তলায় সবুজ ঘাসের রং যে সে কি দাঁড়ইয়াছে—তাহা গিরি জানে না। গিরির চিত্ত বড় প্রফুল্ল হইয়া উঠিল।

ঘাটে কেহ ছিল না। বেনেপুকুরের স্থির কালো জলের তলে রাঙা আকাশ ধরা দিয়াছে। গিরি চঞ্চলা বালিকার মত আলোড়ন তুলিয়া জলে নামিল। জলতলের রাঙা আকাশে ঢেউ উঠিল। পুকুরের পাড়ে সজিনা গাছে ফুলের ফুলঝুরি দেখা দিয়াছে। সে ফুলের ছবিগুলিও ছলিতেছিল। গিরি গলা পর্যন্ত জলে ডুবাওয়া সেই ছবি দেখিতেছিল। ধীরে ধীরে তরঙ্গিত জল স্থির হইয়া আসিল। স্থির জলতলে রাঙা আকাশের পটভূমির উপর ফুটিয়া উঠিল—বড় সুন্দর একখানি মুখ। আপনার মুখশ্রীতে গিরি আপনি মুগ্ধ হইয়া গেল। চোখের কোলে কোলে দুঃখের কালো রেখাটি রূপ বাড়াইয়া তুলিয়াছে। সে যেন কাজলের রেখা। জল হইতে হাত দুইখানি তুলিয়া গিরি বুঝাইয়া ফিরাইয়া দেখিল। তারপর দেহখানি তুলিয়া অঙ্গবাস মুক্ত করিয়া আপন দেহের পানে চাহিয়া দেখিতে দেখিতে অকস্মাৎ সে যেন চমকিয়া উঠিল।

তাহার দেহের মধ্যে একটা অপূর্ব পরিবর্তন ঘটিতে শুরু করিয়াছে। কে যেন তাহার দেহশ্রী ভাঙিয়া গড়িতে শুরু করিয়াছে।

লজ্জায় আনন্দে গিরির চিত্র অধীরে হইয়া উঠিল। সে আপনার স্তনদুটি নাড়িয়া চাড়িয়া ভাল করিয়া দেখিল। শ্রামশোভাসম্পন্ন স্তনাগ্র দুটি ফলস্ব শস্ত্রলীধের মত ঈষৎ অবনমিত। সে তাড়াতাড়ি ভিজা কাপড়খানি ভাল করিয়া দেহে জড়াইয়া পূর্ণকুন্তকক্ষে বাড়ি ফিরিল।

কাপড় ছাড়িয়া সে কেরোসিনের ডিবাটি জ্বালাইয়া ঘরের দরজা বন্ধ করিয়া বসিল। ভিবার রক্তাত ক্লীণ রশ্মিতে ভাল করিয়া কিছু দেখা যায় না। সলিতাটা গিরি অসম্ভব রকম বাড়াইয়া দিল।

সে আলোতে সে দেখিল—সত্যই তাহার রূপ অপূর্ব নবরূপে আকার লইতেছে। তাহার রক্ত-মাংসের দেহ লইয়া কোন অজ্ঞাত শিল্পী অদৃশ্য হস্তে যেন দেবতার শ্রীমন্দির গড়িয়া তুলিতেছে। আপনার রূপ দেখিয়া গিরির নিজেরই আশা মিটিতেছিল না।

তাহার তনয়তা ভাঙিল পাঁচুর মায়ের কণ্ঠের আহ্বানে। বন্ধ দরজায় আঘাত করিয়া পাঁচুর মা ভাকিতেছিল বোমা! বোমা!

সে অসম্বৃত বসনে দরজা খুলিয়া দিল।

পাঁচুর মা কহিল—ঘরে এত ধোঁয়া কেন বোমা? আমার যে ভয় হয়েছিল! ওমা—ভিবেটা জ্বলছে যেন মশাল জ্বলছে!

গিরি পাঁচুর মায়ের হাত ধরিয়া কহিল—দেখ ত পাঁচুর মা, দেখ ত।

—কি বোমা?

গিরি প্রদীপ্ত জ্বলন্ত ডিবাটি আপনার অনাবৃত দেহের সম্মুখে তুলিয়া ধরিল।

কহিল—কিছু বুঝতে পারছ না?

পাঁচুর মা একাগ্র দৃষ্টিতে গিরির দেহের দিকে চাহিয়া ছিল।

গিরির যেন বিলম্ব সহিতেছিল না। সে ব্যগ্রভাবে জিজ্ঞাসা করিল—বুঝতে পারছ? একি সত্য?

পাঁচুর মা সম্মুখে গিরির স্থলিত বসনাঞ্চল তাহার দেহে টানিয়া দিল। বলিল—ভয়-সঙ্কো-বেলা, গায়ে কাপড় দাও মা। খোলা গায়ে থাকতে নাই।

গিরির তবু সন্দেহ যায় নাই। সে বলিল—কিছু বোঝা গেল না পাঁচুর মা?

স্নেহভরেই পাঁচুর মা কহিল—বেশ ত বোঝা যাচ্ছে বোমা! তোমার ধোঁকা হবে।

গিরি বোধ করি আপনাকে হারাইয়া ফেলিয়াছিল। সে নত হইয়া পাঁচুর মাকে প্রণাম করিতে গেল। তাড়াতাড়ি পিছাইয়া গিয়া পাঁচুর মা কহিল—ছি-ছি-ছি, ও কি করছ বোমা? আমাকে পাণে ভোবাচ্ছ কেন?

হাসিয়া গিরি বলিল—কোন পাণ হবে না। তুমি আমার মায়ের মত।

পাঁচুর মা কহিল—এমনি আশীর্বাদ করছি আমি বোমা। কিন্তু আমি যে ছোট জাত।

জাত! গিরি সেই বাঁকা হাসি হাসিল।

*

*

*

ছেঁড়া কাপড়ের রঙীন পাড় হইতে সূতা বাহির করা হইতেছিল। কাঁথার উপর নকশা তোলা হইবে। পাঁচুর মা উঠানে একরাশ ধান লইয়া বসিয়াছিল।

লাল সূতার গোছায় পাক দিতে দিতে গিরি কহিল—সব্জে সূতো শুধু হ'ল না পাঁচুর মা। সব্জে সূতো ভিন্নও ত লতা কি বোঁটা তোলা হবে না।

পাঁচুর মা কহিল—এক নেতি সব্জ কস্তা হাট থেকে নিয়ে এলেই হবে।

হরেকৃষ্ণর ভগ্নী রতন আসিয়া দাওয়ায় বসিল। অনাবশ্যক ভাবেই কৈফিয়ৎ দিয়া কহিল—দিন ভাই অনেকটা বড় হয়েছে। বসে বসে ব্যাজার হয়ে উঠল মন। তাই বলি যাই বোঁ কি করছে একবার দেখে আসি।

গিরি ছোট্ট একটি সম্ভাষণ কহিল—এস।

পাঁচুর মা কিন্তু নিজেকে সন্মত করিতে পারিল না। বলিয়া ফেলিল—শাঁখ-কাটা করা ত দেখেছ বোঁমা, আসতেও কাটে, যেতেও কাটে।

রতন কথাটা গায়ে মাখিল না। সে গিরির হাতের কাজের দিকে চাহিয়া কহিল—ও কি হবে বোঁ ?

সংক্ষেপে গিরি কহিল—কাঁথা !

—কাঁথা ! সই-সাজাতী কাউকে দিবি ?

—না।

—তবে কার ? এ যে দেখছি ছোট ছেলের কাঁথা তৈরি হচ্ছে !

গিরি কথা কহিল না। উত্তর দিল পাঁচুর মা। কহিল—বোঁমা আমাদের পোয়াতী।

রতন সবিস্ময়ে গিরির দিকে চাহিয়া রহিল। তারপর পরম উৎকর্ষের সহিতই যেন সে কহিল—এ তুই সামলাবি কি করে বোঁ ?

মৃদুস্বরের এই কয়টি কথা নিঃশব্দ মেয়ে দুইটির কানে বাজের মতই গর্জন করিয়া উঠিল। গিরির হাত হইতে সূতার নেতিটি অকস্মাৎ মাটিতে পড়িয়া গেল। পঙ্কুর মত নিশ্চল মূর্তিতে সে রতনের মুখের দিকে চাহিয়া বসিয়া রহিল। পাঁচুর মায়েরও হাতের কাজ বন্ধ হইয়া গেল।

কয়েক মুহূর্ত নীরবে বসিয়া থাকিয়া রতন উঠিল, কহিল—মাই, বিপিন দাদাকে ধরি গিয়ে—সন্দেশ খাওয়াক।

এক মুহূর্তের জন্ত গিরির চোখ দুইটা ধক করিয়া জুলিয়া উঠিল। পরমুহূর্তেই সে শান্ত হইয়া মুখ নামাইল। কিন্তু বুকের মধ্যে ধৈর্যের বাধ আর তাহার থাকিতেছিল না। রতন বাহির হইয়া যাইতেছিল, সে বলিল—তোমার বিপিন দাদাকে একবার ডেকে দিয়ো ত।

ধীরে ধীরে সে উঠিয়া ঘরে ঢুকিয়া মাটিতে লুটাইয়া পড়িল। বুক চাপড়াইয়া তাহার কাঁদিতে ইচ্ছা করিতেছিল। ভবিষ্যতের বাস্তবতা তাহার চক্ষের উপর ভয়াবহ রূপ লইয়া ফুটিয়া উঠিল।

তাহার মাতৃমন্দিরের শিশু-দেবতার অঙ্গে বর্ষের মাল্লবগুলি নরকের কাদা ছিটাইয়া কর্দমাক্ত

বীভৎস করিয়া তুলিল !

আকাশ-পাতাল চিন্তায় সে কুলহারার মত ডুবিয়া গেল ।

বিপিনের ভরসায় সে বসিয়া রহিল ।

বিপিন সমস্ত গুনিয়া শুক হইয়া বসিয়া রহিল, গিরি তাহার পায়ে আছাড় খাইয়া পড়িয়া কহিল—কি হবে গো ?

বিপিন কহিল—হবে, হবে আর কি ? পদা দাইকে ডেকে বলেছি—সে দুদিনে নব সামলে দেবে ।

গিরির অন্তরায় শিহরিয়া উঠিল, তাহার চোখের সম্মুখে ভাসিয়া উঠিল একদিনের মনশ্চক্রে দেখা ছবি । ধরণীর রাক্ষসী রূপ ! সে একদৃষ্টে বিপিনের পানে চাহিয়া থাকিতে থাকিতে কহিল—যাও, তুমি যাও, চলে যাও, চলে যাও । আমার বাড়ি থেকে চলে যাও—চলে যাও বলছি ।

বিপিন উঠিয়া কহিল—আচ্ছা, আচ্ছা, আমি যাচ্ছি । ভেবে দেখো তুমি, কাল আসব ।

গিরি চিৎকার করিয়া বলিল—না—না—না, এসো না তুমি আর, এসো না বলছি ।

বলিয়া সে মাটির উপর লুটাইয়া পড়িয়া ফোঁপাইয়া ফোঁপাইয়া কাঁদিতে লাগিল । আজ তাহার তাসের ঘর ভাঙিয়া গিয়াছে, তাহা হইতে আজ সত্যই বাহির হইল রাশি রাশি কান্না । জীবনে সে কান্না ফুটাইবার নয়, বুকি মাটির বুক হইতে আকাশ পর্যন্ত সে কান্নার পরিমাণ ফুলাইবে না ।

বহুকাল পর সে একটা সংকল্প লইয়া উঠিয়া বসিল । পাচুর মা বাহিরে নীরবে বসিয়াছিল । তাহাকে ডাকিয়া গিরি কহিল—পাচুর মা, তুমি বাড়ি যাও ।

পাচুর মা চমকিয়া উঠিল, কহিল—কেন ?

—আর তোমাকে দরকার হবে না, পাচুর মা ।

—এ-কথা কেন বলচ বোঁমা ? কি করবে তুমি আমার সত্যি করে বল ।

তাহার কণ্ঠস্বরের উদ্বেগে গিরি ব্যথিত চঞ্চল হইয়া উঠিল । সে একটা দীর্ঘশ্বাস ফেলিয়া কহিল—সে তুমি নাই শুনলে পাচুর মা ।

*

*

*

নিবিড় অন্ধকার রাত্রি আলোকে আলোকময় হইয়া উঠিয়াছে । গ্রাম জুড়িয়া ঘরের পর ঘরের চালের উপর উষ্ণ যুগ্মী লেলিহান আগুনের শিখা দাউ দাউ করিয়া জলিতেছে ।

বিপুল আর্তনাদে নিস্তব্ধ রাত্রির আকাশের কোল পর্যন্ত ভরিয়া উঠিতেছে—জল ! জল ! জল !

হে ভগবান রক্ষা কর ! ঠাকুর রক্ষা কর !

বৈশাখের শুক্লা খড়ের চাল অগ্নির অতি উপাদেয় হইয়া আছে । গ্রীষ্মের বহ্নিদেবতা

দ্বাদশ সূর্যের যোবনে বীৰ্যবান হইয়া উঠিয়াছে। আগুন যেন নাচিয়া নাচিয়া ফিরিতেছিল।

গ্রামপ্রান্তে স্বল্পশ্রোতা নদীটি পার হইয়া সরকারী পাকা সড়কটা চলিয়া গিয়াছে। নদীর ওপারের ঘাটে সেই রাস্তার উপর দাঁড়াইয়া গিরি নির্মিমেধ দৃষ্টিতে এই অগ্নিলীলা দেখিতেছিল। তাহার দু'টি অধর পরিব্যাপ্ত করিয়া ফুটিয়া ছিল নিঃশব্দ নিষ্ঠুর হাসি।

কিছুক্ষণ পর গ্রামের দিকে পিছন ফিরিয়া শুভ্র রাস্তাটির চিরুপথে সম্মুখের দিকে আগাইয়া চলিল। পথের দূরত্বের হিসাব ছিল না। হিসাব রাখিবার প্রয়োজনও নাই। ঘরের বন্ধন, সমাজের নাগপাশ নিজের হাতে আগুন ধরাইয়া নিঃশেষে ভস্ম করিয়া পৃথিবীর বুকে দাঁড়াইয়া আপনাকে সে মুক্ত অনুভব করিল।

রাত্রির অন্ধকার পরিষ্কার হইয়া আসিতেছিল। আকাশ ক্রমশঃ রক্তরাঙা হইয়া উঠিল। তারপর সেই রাঙা দিখলয় ভেদ করিয়া উদিত হইল অতি সুকোমল রক্তবর্ণ প্রভাত-সূর্য।

সে অরণোদয়কে গিরি ভূমিষ্ঠ প্রণাম করিল।

বাইশ

দীর্ঘ চার বৎসর পর এমনি আর একটি অন্ধকার রাত্রে গিরি ওই ঘাটের উপরে বসিয়া ছিল। এতদিন পরে গিরি বাহিরের দুনিয়াকে যাচাই করিয়া ঘরে ফিরিতেছে। বর্ষাকালের মেঘাচ্ছন্ন নিম্প্রভ আকাশ। সম্মুখে হুঁকুল-ফীতা নদী—মাঝে মাঝে আবর্তের শব্দ তুলিয়া বহিয়া চলিয়াছে। গিরি বাধ্য হইয়া ঘাটের মাথায় বটগাছটার তলে আশ্রয় লইয়াছিল। পাশে ময়লা একটা কাপড়ের ওপর ঘুমন্ত একটি শিশু—গিরির সন্তান।

বিপ্ বিপ্ করিয়া যুত্ববর্ণ আরম্ভ হইল। সঙ্গে সঙ্গে সিক্তপঙ্খ পাখির পাখার কাপটার মত আর্দ্র বায়ু উতলা হইয়া উঠিল। শীতে ছেলেটা নড়িয়াচড়িয়া গুটিগুটি হইয়া গুইল। গিরি ডাকিল—নীল! নীল!

ছেলেটির নাম রাখিয়াছে নীলকণ্ঠ।

গিরির জীবন-মন্ডনে যত কিছু বিষ উঠিয়াছে, ওই তাহা নিঃশেষে পান করিয়া আসিয়াছে। যেদিন ও আসিয়াছিল, সেদিনের কথা গিরির মনে পড়ে না। দুঃখতুর্দশাময় জীবনের ইতি-হাসের মধ্য হইতে এ দিনটি তাহার হারাইয়া গেছে। শুধু মনে গড়ে সেদিনও এমনি একটি বর্ষপমুখর অন্ধকার রাত্রি। একটা ছোট শহরের প্রান্তদেশে গাছতলায় প্রকাণ্ড একটা পুরনো বয়লায়ের মধ্যে গিরি আশ্রয় লইয়াছিল।

প্রসবের যন্ত্রণায় গিরি চক্ষের সম্মুখ হইতে আকাশ, অন্ধকার, অরণ্য সব যেন মুছিয়া গিয়াছিল। তারপর যে মুহূর্তগুলি আসিল, সে তাহার চেতনার সম্মুখে একটা অস্বচ্ছ যবনিকার আড়াল দিয়া দিল। গিরির চেতনা হইলে দেখিল সে একটা হাসপাতালে। কোলের কাছে নীলকণ্ঠ।

থাক্ ; গিরি স্বতিকে ভুলিতে চাহিতেছিল। স্বতির পীড়ন তাহার সহ্য হইতেছিল না।

আত্ম বাতাসে শীতাত হইয়া গিরি ছেঁড়া কাপড়টা গায়ে ভাল করিয়া টানিয়া দিতে চেষ্টা করিল। শতছিন্ন সিন্ধু কাপড়খানায় শীত কাটে না। দুই হাত দিয়া গিরি আপনার পঞ্জর দুটা আঁকড়াইয়া ধরিল।

হাড়! শুধু হাড়—কঙ্কালের মাথা! দুর্বল বীভৎস ব্যাধি জলৌকার মত ধীরে ধীরে রক্ত মাংস সব হরণ করিয়া লইয়াছে।

গিরির তাহাতে আক্ষেপ নাই। তাহার চিন্তা যেন প্রতিবাদ করিয়া উঠিল। কেন আক্ষেপ নাই? এই আক্ষেপই জীবনের আজ সব চেয়ে বড় আক্ষেপ! কেন তাহার দেহ গেল? এই বর্বর পৃথিবীতে সে বাঁচিয়া থাকিবে কি লইয়া? একটা দিনের কথা মনে পড়িল।

বড়লোকের দেবালয়ে সে আশ্রয় লইয়াছিল। দেবালয়; অতিথিশালা; উৎসব-আড়ম্বরের অভাব নাই সেখানে। বাড়ির দুয়ারে নীলকণ্ঠকে কোলে করিয়া বসিয়াছিল দুই মূর্তা উচ্ছিন্নের আশায়। দেবালয়ের কর্ত্তী পূজার তত্ত্বাবধান করিতে আসিয়া তাহাকে দেখিয়া কহিলেন—কে লা তুই?

সমস্কোচে গিরি উত্তর দিল—ভিখেরী মা!

—এমন গতর, কাজ করিস নে কেন? কাজ করবি?

গিরি বর্তাইয়া গেল। সে উচ্ছ্বসিত হইয়া কহিল—কেন করবো না মা। পাই নে কাজ—

—বেশ, আমাদের এই ঠাকুরবাড়িতে কাজ কর। এঁটোকাঁটা ঘুচোবি। তুই আর তোর ছেলে খেতে পাবি, মাইনেও কিছু পাবি।

গিরি এই দেবালয়ের বিগ্রহের পায়ে সেদিন অসীম ভক্তিভরে অসংখ্য প্রণতি জানাইয়াছিল। ঈশ্বর সত্যসত্যই সেদিন তাহার নিকটে দয়াল ঠাকুর হইয়া উঠিয়াছিলেন।

অসীম ভক্তি; ক্রটিহীন নিষ্ঠার সহিত সে দেবালয়ের সেবায় আপনাকে নিয়োগ করিল। দিন পনেরো পর বোধ হয়। নীলকণ্ঠের জ্বর হইয়াছিল। অসুস্থ শিশুকে শোয়াইয়া প্রভাতের কাজ সে কোনমতে সারিল। কিন্তু অসুস্থ ছেলেটার ক্রমশ যেন অসুস্থ বাড়িতেছিল। গিরি ছেলেকে কোলে করিয়া বসিয়া থাকিতে বাধ্য হইল।

দ্বিপ্রহরে ভোগের কঁাসর-ঘণ্টা বাজিয়া গেল। গিরি নীলকণ্ঠকে কোলে করিয়া ঠাকুর-বাড়িতে আসিয়া দাঁড়াইল।

রুঢ়কণ্ঠে কর্ত্তার আদেশ হইল—ঠাকুর, ও মাগীকে ভাত দিয়ো না আজ। কাজ না করলে ভাত পাওয়া যায় না হুনিয়ায়।

গিরি ছেলেটাকে একটু ছায়ায় শোয়াইয়া দিল। তার পর বাঁটাগাছটা হাতে করিয়া উচ্ছিন্ন স্থান মুক্ত করিতে প্রবৃত্ত হইল।

আবার তেমনি রুঢ় কণ্ঠে আদেশ হইল—বাঁটা রেখে দাও তুমি। তোমার কাজ করতে হবে না।

গিরি ঝাঁটাগাছটা ফেলিয়া দিল। তার পর ধীর কণ্ঠে সে কহিল—এ কদিনের মাইনেটা আমার দিয়ে দিন মা।

—মাইনে দেব না।

গিরি আর কথা কহিল না। সে ছেলোটাকে বুকে তুলিয়া লইয়া বাহির হইয়া আসিল।

ভিতরে তখন ঠাকুর ব্রাহ্মণ বলিতেছিল—ওর ছেলের অস্থখ মা।

সে কথার কেহ কোন জবাব দিল না। ব্রাহ্মণটি আবার কহিল—ওকে আজকের মত দুটো এঁটো ভাত—

এ কথার জবাব আসিল—না।

বিশ্বব্রহ্মাণ্ডটা গিরির চোখের উপর ঘুরিতেছিল। সে পথের ধারে হাত পাতিয়া দাঁড়াইয়া রহিল।

পথ বহিয়া লোক যায় আসে। গিরি মুহূর্তে কহে,—বাবু!

পথিক ফিরিয়া চায়। শুধু ফিরিতে চায় নয়, দৃষ্টি দিয়া সর্বত্র তাহার লেহন করিয়া যায়। তারপর চলিয়া যায়। কেহ কিছু দিয়াও যায়—একটা পয়সা, একটা আধলা।

একটি ভদ্রলোকের ছেলে শিক্ষা দিতে পকেটে হাত দিল। বাহির হইল একটা টাকা। সে বার বার টাকাটা ঘুরাইয়া ফিরাইয়া দেখিয়া পকেটে পুরিল। আবার কিছুক্ষণ পর সে লোকটি ফিরিল। গিরির কাছাকাছি আসিয়া টাকাটা বাহির করিয়া শব্দ পরীক্ষা করিতে করিতে চলিয়া গেল।

গিরি নীরবে দাঁড়াইয়া রহিল। দুনিয়ার পশু আর তাহাকে বিচলিত করে না। সন্ধ্যা হইয়া গেল। গিরি হাতের পয়সা গণনা করিয়া দেখিল সাড়ে তিন পয়সা হইয়াছে। দুইটা পয়সা তিনটা আধলা। ঘুণাভরে সে পয়সা কয়টা পথের অন্ধকারে ছড়াইয়া ফেলিয়া দিয়া চলিয়া গেল। একটা বাঁধা ঘাটে গিয়া কয় আঁচলা জল খাইয়া সে বসিয়া রহিল।

পয়সা কয়টা ফেলিয়া দেওয়ার জন্ত ক্রমশ তাহার মনে অহুতাপ জাগিয়া উঠিল। সে উঠিয়া পথের সেই স্থানটা হাত দিয়া খুঁজিতেছিল। হাতে ঠেকিল শুধু একটা আধলা। ক্লান্ত হইয়া সে উঠিয়া আসিল।

ঘাটে শুইয়া সে আপনার কথাই ভাবিতেছিল। জীবনের কথা মনে করিয়া রাত্রি কাটাইতে গেলে তাহার সহস্র রজনী প্রভাত হইয়া যায়। নীলকণ্ঠ ঘুমাইয়াছে।

—এই!

শবে চমকিয়া গিরি দেখিল ঠাকুরবাড়ির সেই ব্রাহ্মণ। হাতে একটা পাতায় খান্স লইয়া তাহাকে ডাকিতেছে।

ঠাকুর কহিল—নে, থা।

গিরির অস্তর উজ্জ্বলিত হইয়া উঠিয়াছিল। কিন্তু ওই অন্ন তাহার মুখে তুলিতে কচি হইল না। কহিল—না।

ঠাকুর তাহার মনের কথা বুঝিয়াছিল। সে পাতাটা নামাইয়া দিয়া কহিল—ঠাকুরবাড়ির

ভাত নয়। কিনে আনলাম।

গিরির চোখে জল আসিল। পাতার খাবারে হাত দিতেই হাতে ঠেকিল একটা কঠিন বস্তু। অন্ধকারেও রৌপ্যের রূপ লুকাইল না।

*

*

*

আবার কিছুক্ষণ পর। কে আসিয়া ঘাটে নামিল। গুন্ গুন্ করিয়া লোকটি গান গাহিতেছিল। গিরি পঙ্কর মত অসাড় দেহে পড়িয়াছিল, কোন দিকে তাহার আক্ষেপ ছিল না।

তাহার সে চমক ভাঙিল ঠন্ করিয়া একটা মূহু শব্দে।

লোকটা জলে পা ধুইতে ধুইতে টাকাটা বাধা ঘাটের উপর আছড়াইতেছিল। আর আপন মনেই বলিতেছিল—না—শব্দ ত ঠিক আছে!

এই নিঃশব্দ অন্ধকারের মধ্যে গিরি যেন অল্পভব করিল সমস্ত অতীতটা তাহার মিথ্যা হইয়া গেছে।

তার পর?

তার পর কত মাছুষকেই সে দেখিল। অধিকাংশই পাষণ্ড নৃশংস। মোটর ড্রাইভার সেই লোকটা। কালো ধূলিধূসর চেহারা, জবাফুলের মত লাল চোখ।

সে বর্বরটাকে তাহার হত্যা করা উচিত ছিল।

নীলকণ্ঠকে সে টুঁটি টিপিয়া মারিবার চেষ্টা করিয়াছিল।

ছায়াছবির মত তাহারই পদচিহ্নিত ধরিত্রীর অংশগুলি চোখের উপর তাহার ভাসিয়া চলিয়াছে।

অকস্মাৎ গিরি অস্থিরভাবে উঠিয়া দাঁড়াইল। জলের ধারাগুলি তীক্ষ্ণ হইয়া মুখে-চোখে বিধিতেছিল। কিন্তু সেদিকেই তাহার গ্রাহই ছিল না।

নিবিড় অন্ধকারের মধ্য হইতে কে যেন তাহাকে ডাকিতেছিল—আয় আয়।

এ সেই! যে একদিন হিমশীতল অঙ্গুলি তাহার ললাটের সন্মুখেই ধরিয়াছিল। গিরি সভয়ে সরিয়া আসিয়াছিল। অন্ধকার গৃহকোণ হইতে যে একদিন তাহাকে ডাকিয়াছিল, বিষ নে! সে তাহাকে পরিত্যাগ করে নাই। এতদিন পরে সে-ই আজ আবার অকস্মাৎ আসিয়া তাহার জীবনে দেখা দিয়াছে।

গিরি দুই চক্ষু বিক্ষারিত করিয়া চাহিয়া দেখিল। কোথাও কিছু দেখা যায় না। এ বিপুল অন্ধকারের মধ্যে সমস্ত পৃথিবী আজ মিথ্যা হইয়া গেছে। শুধু পদতলে দু'কূল-ফাঁতা আবর্তময়ী নদী অন্ধকারের মধ্যে চক্ চক্ করিতেছিল। ওই নদীর মধ্য হইতে ডাক উঠিতে ছিল। গিরি একদৃষ্টে নদীর বুকের দিকে চাহিয়া রহিল। মন্ডর পদে জলের দিকে সে অগ্রসর হইয়া চলিল।

অকস্মাৎ ওপারে কোথায় সশব্দে নদীর কূল ভাঙিল। সেই শব্দে চমকিয়া উঠিয়া গিরি বোধ করি আশ্চর্য হইয়া উঠিল। সে ডাকিল—নীল!

সঙ্গে সঙ্গে ফিরিবার চেষ্টা করিল। যেমন-তেমেন চেষ্টা নয়, ছুটিয়া পলাইবার চেষ্টা করিল।

কিন্তু শিচ্ছিল তটভূমিতেই সেই অদৃশ্য শত্রু বসিয়া ছিল। সে গিরির দুর্বল কম্পিত পদ ধরিয়া আকর্ষণ করিল। গিরি পদাঙ্কলিতা হইয়া নদীর জলের মধ্যে পড়িয়া গেল।

তেইশ

এই কয় বৎসরে এপারের গ্রামখানির মধ্যে বহু পরিবর্তন ঘটিয়া গিয়াছে। বিপিন নাই, পাঁচুর মা মরিয়াছে। আরও কত লোক গিয়াছে। কত নতুন মাহুঘের মেলা। শ্রীমন্তের ঘরখানা একটা মাটির স্তূপে পরিণত হইয়াছে। চিহ্নের মধ্যে বাঁচিয়া আছে একটা করবীব ঝাড়, আর তাহারই সমরেখার ওদিকে সেই লেবুগাছটা। বাস্তবের মাটির উর্বরতায় গাছ দুইটা ঘন বর্ষে সতেজ স্বাস্থ্যে বিহ্বত হইয়া বাড়িয়া উঠিয়াছে। ঋতুতে ঋতুতে পুষ্পসজ্জারে অপরূপ শ্রী ধরিয়া উঠে তাহারা। বর্ষার নিশীথ রাত্রে লেবুফুলের উগ্র গন্ধে স্তব্ধিত বর্ষণ-সিক্ত বায়ু চারিদিকে তাহার বার্তা বহিয়া বেড়ায়। করবী গাছটা রক্তরাঙা ফুলে সর্বাক্ষ ছড়াইয়া বাতাসে দোলে, তাহারও ফুলে ফুলে একটি মুদ্রা স্নিগ্ধ গন্ধ উঠে। মাহুঘের স্বথঃখের কোন ছায়াই তাহাদিগকে স্পর্শ করে নাই।

গ্রামের লোকে বলে, এই গাছ দুইটার তলে নিশীথ রাত্রে কাহাকে নাকি দেখা যায়। শীর্ণা এক নারী অতি দুঃখে যেন ঘুরিয়া ঘুরিয়া বেড়ায়। তাহার সর্বাক্ষ যেন দন্ধ হইয়া গেছে। কোলে তাহার অর্ধদন্ধ একটি শিশু। মধ্যে মধ্যে সে নাকি বিনাইয়া বিনাইয়া কাঁদে। লোকে তাই ওদিক মাড়ায় না। গাছের ফুল গাছে ফুটিয়া শুকাইয়া বরিয়া পড়ে। লেবুগাছটায় ফল পাকিয়া রসভারে মাটিতে পড়িয়া মাটিতেই মিশাইয়া যায়। বীজ হইতে অসংখ্য চারা অঙ্কুরিত হইয়া উঠে। কতক তাহার পশুতে নষ্ট করে, কতক শুকাইয়া যায় উত্তাপে।

শুধু একটা ছেলে মাঝে মাঝে ওখানে যায় আসে। পাকা লেবু সংগ্রহ করিয়া এখানে-ওখানে বিক্রয় করিয়া বেড়ায়। এই বয়সেই ব্যবসা শিখিয়াছে ও। উলঙ্গ ধূলিমাখা দুনিয়ার ছেলায় বর্ধিত শিশু আপনার উদরাস্রের সংস্থান আপনি করে। গৃহস্থের দুয়ারে গিয়া হাত পাতিয়া দাঁড়ায়। পাখির মত আশীর্বাদের বুলি আওড়ায়। সমস্ত শব্দগুলার অর্থও হয়ত সে জানে না।

গৃহস্থের দুয়ারে গিয়া ডাকে—অনাথ, দয়া করো গো মা। কল্যাণ হবে মা।

কল্যাণ মানে হয়ত শিশু জানে না। অনাথ যে কি সে ধারণাও তাহার নাই।

সব দিন আশীর্বাদে গৃহস্থের হৃদয় গলে না। রূঢ়বাক্যে তাহাকে খেদাইয়া দেয়। তার জন্মও কোন অভিযোগ নাই। কোন দুঃখ নাই তার।

সে তখন ব্যবসায়ী সাজিয়া বলে। ছেঁড়া গানের কাপড়ের আঁচল হইতে লেবু বাহির করিয়া বলে—লেবু লেবে গো? লেবু?

তাহাতেও দয়া না হইলে, গৃহস্থকে ভেড়াইয়া পলাইয়া যায়। অন্তরালে গালিও দেয়।

আবার দশদিন বিশদিন গ্রাম-গ্রামান্তরে চলিয়া যায়। দশদিন বিশদিনের অদর্শনে বিন্দু

বিন্দু করিয়া কল্পনা গৃহস্থের বৃকে জমিয়া থাকিবে এ জ্ঞানটুকু তাহার হইয়াছে।

কত নূতন গৃহস্থ জিজ্ঞাসা করে—কে রে তুই?

ছেলেটা উত্তর দেয়—আমি গো—নীলকণ্ঠ।

—নীলকণ্ঠ! কাদের ছেলে রে?

—সেই ক্ষেপীর ছেলে গো আমি। হই গায়ের সেই ক্ষেপী গো! মা কোথা গিয়েছে আমাকে ফেলে। ভিক্ষে করি গো আমি।

—আহা-হা, থাকিস কোথা রে?

—গাঁয় গাছতলাতে পড়ে থাকি।

ধরিত্রীর জননীর নিজের হাতে মাহুষ করা সন্তান ও। এই পরিচয় ছাড়া অপর পরিচয় সব তাহার মুছিয়া গেছে। ও বহুমতীর সন্তান, জীব, মাহুষ!

সংসারে এইটাই বোধ হয়—বোধ হয় কেন নিশ্চয়ই সবচেয়ে সত্য, সবচেয়ে বড় পরিচয়। আদিম মানব এই পরিচয় লইয়াই সংসারে আসিয়াছিল। কিন্তু মাহুষ সংসারে যেদিন মালিক হইয়া উঠিল সেই দিন সে নিজেকে করিল প্রধান। শ্রমী ক্ষেত্র সব মুছিয়া দিয়া আপনাকে আদি করিয়া মানবের ইতিহাস রচনার পদ্ধতি বাঁধিয়া দিল। তাই আজ আপনার পরিচয়ের পূর্বে আর একটি মাহুষকে খাড়া করিতে না পারিলে মাহুষের সমাজে তার ইতিহাস কলঙ্কিত—সে হয় অপাংক্তেয়।

গৃহস্থ সাবধান হইয়া কহে—সরে দাঁড়া রে, সরে দাঁড়া না বাপু! ছোঁয়া পড়বে যে। যত অজ্ঞাত কুজাত কি এইখানেই আসবে রে বাপু!

নীলকণ্ঠ রাগে না। শুধু ও নয়, এ সংসারে নীলকণ্ঠের দলই রাগে না।

ছেলেটা নির্বিকার ভাবে সরিয়া দাঁড়াইয়া বলে—যাও মা যাও।

ও গায়ের ধর্মপরায়াণা বিধবা সেদিন ঝাঁটা লইয়া তাহাকে তাড়া করিয়াছিল। তাহাতেও ওর বিকার নাই। দূরে দাঁড়াইয়া বিধবাকে সে ভেংচি কাটিয়া কহিল—দাঁড়া দাঁড়া—দেব একদিন তাতেই হাঁড়ি ছুঁয়ে।

কেহ কল্পনা করিলে সে কল্পনার সুবিধা পথের শিশু সূচতুর ভাবে গ্রহণ করিতে শিখিয়াছে।

তাহার দুঃখের ইতিহাসে কেহ দীর্ঘশ্বাস ফেলিলে, নীলকণ্ঠ কোমল কণ্ঠে কহে—চারটি মুড়ি দেবে গো? জল খাব।

জলখাবার মিলিলে ও বেশ মিষ্ট করিয়া বলে—একখানা ছেঁড়া কাপড় দেবে মা? আর একটা পয়সা? একদিন লেবু এনে দোব তোমাকে। পাকা পাকা লেবু।

কোমরে আবার একটা গের্জলে বাঁধিয়া রাখিয়াছে, তাহাতে থাকে দুই-চারিটা পয়সা—ওর সঞ্চিত সম্বল।

নীলকণ্ঠের সঙ্গীও একজন মাঝে মাঝে মেলে। বেকা বুড়ী তার নাম। তার মাখাটা গলার উপর ধর ধর করিয়া অবিরাম কাঁপে। লোল হাত-পাঙলাও কাঁপে। বৃক শিঠ ধমুকের মত ঝাঁকিয়া গেছে। কম্পনগ্রন্থ অপটু হাতে একগাছা লাঠি ধরিয়া বুড়ী গ্রামান্তরে

ভিক্ষা মাগিয়া বেড়ায়। ভিক্ষার পথে নীলকণ্ঠের সঙ্গে দেখা হয়। কত অন্ধকার সন্ধ্যায়, কত বাদল দিনের পিছল পথে নীলকণ্ঠ বুড়ীর হাত ধরিয়া বুড়ীর বাড়ি পৌছাইয়া দেয়। পথে চলিতে চলিতে বুড়ীকে কেলিয়া দিবার ভান করে। বুড়ী গাল দেয়—মর—মর। মরবি রে খালভরা, মরবি। রক্তের তেজ চিরদিন থাকে না।

নীলকণ্ঠ কোতুকে খিল্ খিল্ করিয়া হাসে।

আবার পাঁচদিন যদি বুড়ীর দেখা না পায় তবে একদিন বুড়ীর বাড়ি গিয়া খোঁজ করে—বৈক্য বুড়ী আছিল না মরেচিস্ ?

বুড়ী ঘাড় কাঁপাইতে কাঁপাইতে কহে—কে, কে রে নীলে ? আয় আয়। বড় জ্বর রে।

—কি খেলি ?

—কি খাব ? ভিখ্ না করলে—তা তুই যদি—

নীলকণ্ঠ আর শোনে না। নির্বিকারচিত্তে অনির্দিষ্ট পথ বহিয়া চলিতে আরম্ভ করে। ঘাইবার সময় গালি দিয়া যায়—ভাগ্ বোট তেমুণ্ডে বুড়ী, মব্ না তুই।

কিন্তু ফিরিবার সময় ছেঁড়া আঁচল হইতে কতকগুলো মুড়ি ঢালিয়া দিয়া যায়। কোনদিন বা একটি পয়সা কেলিয়া দিয়া যায়। কহে—মুড়ি কিনে খাস।

কতদিন আবার বুড়ীর সঙ্গে পথ চলিতে চলিতে মনের কথা হয়।

নীলকণ্ঠ বলে—আচ্ছা বুড়ী, বড়লোকগুলো যদি মরে যায় ত কি মজা হয় বল্ ত ?

বুড়ীর মাথায় আসে না তাহাতে কি এমন মজা হইতে পারে। সে-শিহরিয়া বলে—ও সব বলতে নাই, শুনতে পেলে ওরা মারবে।

—মারবে ? হিঃ—শুনচে কে তাই মারবে ?

ধনীর প্রতি ঘৃণা—ধনের উপর লোভ এই শিশুর বুকে কে দিল ? সর্পের মুখে বিষ যে দেয় সেই কি ?

এমনি সময়ে বৈশাখের এক খর প্রভাতে—রোদ্দ তখন সবে প্রখর হইয়া উঠিতে শুরু করিয়াছে, এক আগন্তুক আসিয়া শ্রীমন্তের ধংসাবশেষ ভিটাটির পাশে উপস্থিত হইল। স্থানটাকে যেন সে চিনিবার চেষ্টা করিতেছিল। লোকটির মাথায় একরাশ চুল। অর্ধেক তাহার পাকিয়া গেছে। মুখে দীর্ঘ দাড়িগোঁফ। দেহখানার কাঠামো দেখিয়া মনে হয় এককালে সে দেহ পাখরের মত দৃঢ় ছিল। কিন্তু আজ তাহা শিথিল হইয়া যেন ভাঙিয়া পড়িতে চায়। মুখেচোখে এবং সর্বদেহ ব্যাপিয়া একটা শ্রান্তির চিহ্ন। সে যেন বিষ্রাম চায়।

সে শ্রীমন্ত !

ভিটাটিকে সে চিনিল ওই গাছ দুটির চিহ্ন দেখিয়া। কয় ফোঁটা জল তাহার চোখ হইতে ঝরিয়া পড়িল। আপন ভিটার জন্ত, গিরির জন্ত অশ্রু তাহার সঞ্চয় করা ছিল। গিরির মৃত্যুসংবাদ গিরির মৃত্যুর পূর্বেই শ্রীমন্ত পাইয়াছিল। জেলে থাকিতেই সে বাড়ির সংবাদের জন্ত কর্তৃপক্ষের নিকট আবেদন করিয়াছিল। জেলের নিয়মামুখারী জেলের কর্তা সংবাদ দিলেন শ্রীমন্তের বাড়ি যে খানার এলাকাত্ত্বন্ত সেই খানার ভারপ্রাপ্ত কর্মচারীকে।

ধানার কর্মচারীই সংবাদ দিয়াছিল—

শ্রীমন্তের স্ত্রী গিরিবালা পুড়িয়া মরিয়াছে ।

সে আঙুনে তাহার ঘর ও পরে সমস্ত গ্রাম পুড়িয়াছে ।

আঘাতটা শ্রীমন্তকে বড় বাজিয়াছিল । সে আঘাতের বেদনা ভুলিবার নয় ।

জেল হইতে বাহির হইয়াই গিরিমাটি কিনিয়া সে কাপড় রাঙাইয়া ফেলিল । একবার মনে হইয়াছিল গোঁরী মাকে তাহার দেখিয়া আসে । গোঁরীর শব্দরবাড়ির গ্রামের প্রান্ত পর্বন্ত গিয়াও সে ফিরিয়া আসিয়াছে । দেখা করিতে লজ্জা হইয়াছিল । সংবাদ পাইয়াছে সে ভাল আছে । তাহার শনি ছাড়িয়াছে—হরিলাল মরিয়াছে । দূর হইতে আশীর্বাদ করিয়াই সে ঘুরিতে ঘুরিতে আসিয়া পদার্পণ করিল আপন ভিটাতে ।

সে আশ্চর্য হইয়া গিয়াছিল । অথচ এ সংকল্প তাহার মনের মধ্যে ছিল না ।

গাছ ভরিয়া রাঙা করবী ফুটিয়া আছে । কয়টা পাকা লেবুর মিষ্ট গন্ধে স্থানটা ভরপুর । শ্রীমন্তের চোখে আবার জল আসিল । তাহার মনে পড়িল গাছটা গিরির স্বহস্তরোপিত । ছোট গোঁরী খেলা-ঘরের মাটির কলনী দিয়া কত জলই না সেচন করিয়াছে ইহাতে !

বসিবার জন্য সে একটু ছায়া খুঁজিতেছিল । দেখিল করবীর বৃহৎ ছায়াযুক্ত তলদেশটি কে যেন পরিষ্কার করিয়া রাখিয়াছে । শ্রীমন্ত সেই ছায়াতলে আশ্রয় লইল ।

অকস্মাৎ একটা দমকা বাতাসে ঝরিয়া পড়িল কতকগুলি শিথিল-বৃন্ত ফুলদল । যেন কে ঐ পুরানো ফুলগুলি আগন্তকের শিরে বর্ষণ করিতেই গাছটির নিকট গচ্ছিত রাখিয়াছিল । শ্রীমন্ত সেই ছায়াতলে শুইয়া কত অতীতের কথা ভাবিতে ভাবিতে ঘুমাইয়া পড়িল । ঘুম ভাঙিল তাহার কাহার ডাকে—

—গোসাঁই ঠাকুর, গোসাঁই ঠাকুর—

শ্রীমন্ত চাহিয়া দেখিল একটা উলঙ্গ শিশু কাছে দাঁড়াইয়া তাহাকে ডাকিতেছে ।

সে শিশুর মুখপানে চাহিয়া কহিল, কি ?

উলঙ্গ শিশু কোমরের গেঁজলেটার দড়িতে পাক দিতে দিতে কহিল—আমার ওটা খেলাঘর ।

শ্রীমন্ত মিষ্ট স্বরে কহিল—তোমার খেলাঘর ত আমি ভাঙি নাই ।

মিষ্ট স্বরের আভাস পাইয়া শিশুটি তাহার সহিত আত্মীয়তা করিতে বসিয়া গেল । প্রথমেই কহিল—তুমি গাঁজা খাও না গোসাঁই ?

শ্রীমন্ত হাসিয়া কহিল—থাই ।

—তা খাও । আমাদের মহারাজ গাঁজা খায় আর বলে—শিবকে জটা, গজাবারি, আগলাগাকে খায় ত্রিপুরারী ; হর হর বোম হর হর বোম শূলী শঙ্কর—চেং চণ্ডী !

শ্রীমন্ত সতাই আপন পোটলা খুলিয়া গাঁজার সরঞ্জাম বাহির করিয়া বসিল । গাঁজা তৈয়ারী করিতে করিতে সে কহিল—কাদের ছেলে তুমি ?

—কে জানে ? আমার মা ছিল কেপী । হই শহর বলে সেই গাঁ আছে, সেই গাঁয়ে আমাদের বাড়ি ।

—বাবা ? বাবা নাই বুঝি তোমার ?

—তা জানি না আমি ।

আবার চুপিচুপি সে কহিল—জান গৌসাই, লোকে বলে আমার বাবার ঠিক নাই ।

শ্রীমন্ত নীরবে গাঁজা তৈয়ারি করিতেছিল । আপন মনেই কোন খেয়ালে গান ধরিয়া দিল—

দেখে এলাম শ্যাম, সাধের ব্রজধাম—শুধু নাম আ—ছে ।

গাঁজা তৈয়ারি হইয়া গিয়াছিল । শ্রীমন্ত কহিল—শুকুনো পাতা কুড়িয়ে আন ত থোকা ।

থোকা তড়াক করিয়া উঠিয়া পড়িল । পাতা কুড়াইয়া আনিয়া কহিল—আমি থোকা কেন হব, আমার নাম নীলকণ্ঠ ।

শ্রীমন্ত হাসিয়া কহিল—তুমি খুব ভাল ছেলে নীলকণ্ঠ !

সোৎসাহে নীলকণ্ঠ কহিল—আমাকে তোমার চেলা করবে গৌসাই ? আমি খুব ভিক্ষে করতে পারি । খুব জোরে জোরে বলব হর হর বোম্ হর হর বোম্—ভিক্ষা মিলে মায়া—

—আমার সঙ্গে যেতে পারবে তুমি ?

—খুব । আমি ত ভিক্ষে ক'রেই খাই । তিন চার কোশ ভিক্ষে করতে চলে যাই বলে ।
হুই বামদেবপুর, তি-শুলো, আকধারা—

গাঁজা সাজিতে সাজিতে শ্রীমন্ত হাসিয়া কহিল—বেশ, আমার সঙ্গে যাবে তুমি ।

পরম উৎসাহভরে নীলকণ্ঠ কহিল—কবে যাবে তুমি ?

—কাল ।

—আজ কোথা থাকবে ?

—এইখানে ।

ভীত মূহুর্তে নীলকণ্ঠ কহিল—এখানে ভূত আছে জান ? রোজ কেঁদে কেঁদে বেড়ায় ।

শ্রীমন্তের গাঁজা টানা বন্ধ হইয়া গেল । সে নীলকণ্ঠের মুখপানে চাহিয়া ব্যগ্রভাবে প্রশ্ন করিল—
—ঠিক জান তুমি ?

নীলকণ্ঠ চোখ দুইটা বড় বড় করিয়া কহিল—হ্যাঁ গো, কত লোক দেখেছে । সর্বাঙ্গ তার পুড়ে গিয়েছে । কেঁদে কেঁদে বেড়ায় ।

শ্রীমন্ত গাঁজা খাইয়া নিঃশেষে চোখ বুজিয়া বসিয়া রহিল । তাহার নিম্নলিখিত দুইটি চোখ হইতে আবার দুইটি জলধারা গড়াইয়া পড়িল ।

সন্ধ্যার অন্ধকার ঘনাইয়া আসিল । পাখির দল ফলরব করিয়া যে যাহার আশ্রয়ের পানে চলিয়াছে । গ্রাম-গ্রামান্তর হইতে দিন-মজুরের দল সারি বাধিয়া ফিরিতেছে । শ্রান্তকণ্ঠে তাহীদের গান শোনা যাইতেছিল—

দিন কাটিলো খেটে খেটে, রাত কাটিবে ভাড়া ঘরে ।

নীলকণ্ঠ কহিল—আমিও তোমার কাছে থাকব সম্মোদী ঠাকুর ।

শ্রীমন্ত কহিল—ভয় করবে না ?

—তুমি থাকবে যে ! আর দুজন থাকলে ভূত আসবে না ।

অকস্মাৎ রুচবরে শ্রীমন্ত কহিল—না। যা তুই এখান থেকে।

নীলকণ্ঠ কহিল—না; তুমি পালিয়ে যাবে।

কেন পরের ছেলে এ আবদার করে, শ্রীমন্তর ভাল লাগিল না। শিশুটির সাম্মিধ্যের জন্ত সে যদি দেখা না দেয়।

অতি রুচভাবে সে কহিল—ভাগ্।

নীলকণ্ঠ সভয়ে দূরে সরিয়া গেল।

প্রহরের পর প্রহর রাত্রি চলিয়াছে। নিস্তরু ধরণী। শুধু রাত্রির রহস্তময় শনশন শব্দ শোনা যাইতেছিল। শ্রীমন্ত জাগ্রত চোখে বসিয়া আছে ব্যাকুল প্রত্যাশায়। সাম্রাজ্যে দক্ষ-অন্ধা গিরিকে একবার দেখিবে সে।

সহসা নিকটের আমগাছটায় কি একটা শব্দ হইল। শ্রীমন্ত চকিত হইয়া সেই দিকে চাহিল। কোথায় কি!

কোন নিশাচর পাখির পাখা ঝাড়ার শব্দ।

উপরে নীল আকাশে অগণ্য তারা বিকমিক করিতেছে। লেবুর মিষ্ট গন্ধে, করবী ফুলের মিশ্র গন্ধে প্রাণটা যেন উদাস হইয়া যায়! কিন্তু কোথায় গিরি?

তৃতীয় প্রহরে কালি চাঁদের পাণ্ডুর রূপ হইতে কাকজ্যোৎস্নার আলোক ফুটিয়া উঠিল।

শ্রীমন্ত অবসাদ ঘুচাইতে আবার গাঁজা লইয়া বসিল। গাঁজা খাইয়া বসিয়া থাকিতে থাকিতে অকস্মাৎ সে হাসিয়া উঠিল।

পরনিন্দকের দল সব। গিরি প্রেত হইয়াছে। সে স্বর্গে গিয়াছে।

আপন মনেই সে বলিয়া উঠিল—ধোয়!

পথে নামিতে গিয়া সে দেখিল পথের পাশেই নীলকণ্ঠ শুইয়া আছে।

শ্রীমন্ত থমকিয়া দাঁড়াইল। শিশু পথ আগলাইয়া শুইয়া আছে। মরা জ্যোৎস্নায় অঘটন-মলিন শিশুমুখখানি যান ছবির মত ফুটিয়াছিল। কি ভাবিয়া শ্রীমন্ত তাহাকে ডাকিল—এই!

শিশুর ঘুম ভাঙিল না। শ্রীমন্ত পায়ে করিয়া এবার একটা ঠেলা দিয়া কহিল—এই—এই ছোঁড়া।

ঘুম ভাঙিয়া নীলকণ্ঠ উঠিয়া বসিল। চোখ রগড়াইতে রগড়াইতে শ্রীমন্তের মুখের দিকে চাহিল। তাহার উর্ধ্বমুখে মাথার উপরের চাঁদের পরিপূর্ণ কিরণ পড়িয়াছিল। শ্রীমন্ত তাহার মুখের দিকে চাহিয়া হাত ধরিয়া কহিল—যাবে তুমি?

শিশু কাপড়ের পুঁটলিটা বগলে তুলিয়া কহিল—হঁ।

—এস তবে।

দম্মখেই অসীম-বিস্তার ধরণীর বুক চিরিয়া ঘুরিয়া ফিরিয়া চলিয়া গিয়াছে—বহু পক্ষিকের পদরেখা আঁকা পথখানি।

চলিতে চলিতে নীলকণ্ঠ পিছাইয়া পড়িয়াছিল।

শ্রীমন্ত তাহাকে কোলে তুলিয়া লইয়া সেই পথ ধরিয়া চলিল।